

**EKALESIA FAAPOTOPOTOGA KERISIANO
SAMOA**

**TUSI MO FAIA'OGA O A'OGA ASO SA
*SUNDAY SCHOOL TEACHERS TEXTBOOK***

2024



**VASEGA MATUTUA
SENIOR CLASS
(14 – 16 tausaga)**

**MATAGALUEGA O A'OA'OGA KERISIANO
*DEPARTMENT OF CHRISTIAN EDUCATION***

EKALESIA FAAPOTOPOTOGA KERISIANO SAMOA
CONGREGATIONAL CHRISTIAN CHURCH SAMOA

TUSI MO FAIA'OGA O A'OGA ASO SA
SUNDAY SCHOOL TEACHERS TEXTBOOK

2024



VASEGA MATUTUA
SENIOR CLASS
(14 – 16 tausaga)

MATAGALUEGA O A'OA'OGA KERISIANO
DEPARTMENT OF CHRISTIAN EDUCATION

ASO SA: 28 IANUARI 2024

MATAUPU: **APERAAAMO, O LE ULUA'I O LE TOATELE** (*Abraham, the first of many*)

SINI: Ia a'oa'o tamaiti, ia latou iloa, o Aperaaamo, o le tamā o le toatele i la le tino nei, o ia foi o le tamā o le au faatuatua.

TUSI FAITAU: Isaia 51: 1 – 3

FESOASOANI MO FAIAOGA:

O le a taoto le gafa o Semu le atalii o Noa, na tupuga mai ai Aperaaamo, ona e lavelave ai le mataupu. A o le augā tupulaga o i ai Aperaaamo, o iinā o fia amata mai ai le mataupu i lona valaauina e le Atua. O lo o faamatala i le Kenese 12: 1 (ff), le tala i le valaauina o Aperaaamo e le Atua. O le valaau foi ua tatou iloa, o le valaau o le lē mautinoa, auā e le o tā'ua se nuu po o se mea e alu i ai. Ae le'i fesili foi Aperaaamo i le Atua i lea itu. Pau le mea ua tatou iloa, na ona sau lava o le valaau, tulai loa Aperaaamo ma alu e aunoa ma se upu. O i tonu tatou te iloa ai, e le gata o lona ususitai, a o lona talitonu ma lona faatuatua i le Atua. Na iloa e Aperaaamo i lona faatuatua, o le Atua ua valaauina ia, o le Atua pule aoao o mea uma, o Ia o le alofa e faamaoni i so o se tagata na te talia ma faia lona finagalo. O le malosi sili lea na ia unaia Aperaaamo e alu, "o le faatuatua."

O le mea moni i la tatou faavasegaina faa-le-tagata, e le faigatā ona te'ena e Aperaaamo le valaau a le Atua. Auā o le lā e mautu lona aiga, i le itu tau le tamaoiaiga i le tino. O lo o siomia foi e le fiafia le mafutaga i le aiga ma le nuu. Peitai, o le faigofie ona tuu mea uma ae tulai e alu, ona o i lona loto le talitonuga atoatoa

i le Atua, e taunuu folafolaga uma o fetalai i ai, e ui e faigata i la tatou matau faa-le-tagata.

O le tusi atu la a le Perofeta i le nuu, ē sa totoe, ma e ua toe foi mai i le tafeaga; o le tusi faalototele ma faamafanafana. O le Atua le papa na lavea'iina ma faasaoina latou mai le mea semanu a fano ai, o le Atua lava lenā o Aperaaamo lo outou tamā, i le la le tino, o ia foi lo outou tamā i la le faatuatua. E tāua tele iā Isaraelu le toe vaavaai i ai, ma taofi mau i le faatuatua o Aperaaamo lo latou tupuaga, e a'oa'oina ma lelei ai. Auā o le talitonu faamaoni lenā, ma le faatuatua mausali i le Atua, e ala mai ai le faamafanafanaina e le Alii o Siona; ma toe faamautu ana mea sa faatafunaina, ma faamatagofie lona laufanua e pei o Etena. Na maua ai e tagata uma le fiafia ma le olioli, ma pepese ai ma faafetai i le Atua.

Fanau, o le famanatu tāua lea mo tatou i lenei Aso Sa. Ia tatou iloa, o Aperaaamo na tatou tutupu mai ai i la le tino, o ia foi le uluai faatuatua, tatou te fa'aa'oa'o i ai. O le taulaga na faia e Iesu, o le atoaga lava lea o le Alofa faaola o le Atua i le lalolagi, lea sa mamanu mai e Aperaaamo lo tatou uluai, ina ia tatou ola ai.

GALUEGA FAATINO: (Faalauteleina o le iloa)

1. Tusi mai le gafa o Aperaaamo, amata mai ia Tara (pei ona faamauina i le Kenese 19: 26 – 32)

PESE: 235 (Le Alii e, le Atua)

A'OA'OGA:

1. O Aperaaamo le fa'aa'oa'o o le lelei.
2. Faatuatua faamaoni i le Atua e manuia ai.
3. Talia le valaau mai a le Alii.

.....

ASO SA: 4 FEPUARI 2024

MATAUPU: **FILIFILIA FAAPITOA MO LE TALALELEI** (*Set apart for the Gospel*)

SINI: Ia a’oa’o tamaiti ia latou iloa, o Paulo, o le Aposetolo e ese le ala na filifilia ai e Iesu, mai isi ona so’o; mo le galuega faa-aposetolo.

TUSI FAITAU: Roma 1: 1 – 6

FESOASOANI MO FAIAOGA:

O Paulo o tā’ua nei i la tatou tusi faitau, sa igoa muamua iā Saulo, lē sa logologoā ona tala i le sauā i le au Kerisiano i le amataga, a’o le’i liliuina o ia e avea ma tagata talitonu iā Iesu Keriso. O Paulo, o se tagata sa loto-mau ma faamaoni i le Lotu Iutaia sa tapuai ai. O lona loto-mau lenā, sa inoino ai lava i se isi talitonuga e ese mai le Lotu Iutaia. Ma o le ala lenā, sa fai ai ma ana vaisū, le sasa ma saisai mai tagata sa mulimuli iā Iesu. A o i ai la Paulo i le tasi aso i le faatinoga o ona tiute faa-le-lotu, sa faafuasei ona taia ese malamalama ese, na te lei iloa muamua. Ma palasi ai le eleele. A o le malamalama lenā o Iesu Keriso Toetu Manumalo, ua na suluia le pogisa ma le valea sa i ai Saulo, po o Paulo i lea taimi, ma liliuina ai loa e fai ma auauna o le Tala Lelei a le Atua. [(Silasila i le Galuega 9: 1(ff)) o lo o i ai le tala atoa lea. O le tāua o le iloa o le vaega tonu lea, ona o i o faasino i ai la tatou mataupu “Filifilia faapittoa mo le Tala Lelei.” O le filifilia faapittoa o Paulo iinei mo le Talalelei iā Iesu, e ese mai le filifiliaina o soo e toa 12 o Iesu.

O le tusi la lenei a le Aposetolo i le Ekalesia i Roma, o lo o ia tautino ai lava, o ia o le auauna o le Tala Lelei a Iesu Keriso, na tofia faapittoa lava ia e le Alii, e talai le Tala Lelei a le Atua. O le Tala Lelei lava lea, sa muai talatala mai ma folafola mai e

Perofeta o i le Tusi Paia. O le tala iā Iesu le Alo o le Atua, Le na toe faatuina mai le oti, e ala i le mana faaola o le Atua lona Tamā. O le Alofa Tunoa lava lenā, ua le gata ina maua e Paulo, ae ua tofia ai foi o ia e fai ma Aposetolo. O le Apoetolo mo tagata uma o mulimuli iā Iesu, ae na tuuina atu ai foi ia te ia ma le auaunaga faapittoa, o le tala’iina lea o le Tala Lelei i nuu ese. O le faamoemoe o le Tala Lelei ua tuu atu e tala’iina, ina ia le gata ina anaana nuu uma i le Atua, ae ia ta’uta’u foi e tagata uma lona suafa paia ma le mamalu, ina ua talitonu ma faatuatua i le Atua. Ua tatou iloa le tala i le auaunaga a Paulo, o se auauna na ofo atu atoa lona ola mo Iesu lona Matai, Lē na ia filifilia faapittoa o ia mo le Tala Lelei a le Atua. O le Tala Lelei, o le tala lava lea i le Alofa o le Atua i le lalolagi, na ia toe faatuina ai Iesu, faatasi ma ē e faatuatua ia te ia, pei o Paulo.

GALUEGA FAATINO: (Tatala le iloa i le Tusi Paia)

Ta’u uma mai tusi o le Tusi Paia na tusia e Paulo, ae fia foi le aofai?

PESE: 119 (Ina faafofoga mai ia)

A’OA’OGA:

1. Talia le Alii pe a valaau mai.
2. Talitonu faamaoni, o Iesu le Tupu.
3. Fai oe ma faapittoa a le Alii i ana feau.

.....

ASO SA: 11 FEPUARI 2024

MATAUPU: **O MA’A MA TAULAGA: O LE A E FAUSIA AI SE EKALEZIA?** (*Stones & Sacrifices: What makes a church?*)

SINI: Ia a’oa’o tamaiti ia latou iloa, o tagata o ma’a-ola ma taulaga ola, o fausia ai le Ekalesia a Keriso, pe a talitonu ma faatuatua moni iā Ia.

TUSI FAITAU: 1 Peteru 2: 4 – 5

FESOASOANI MO FAIAOGA:

E ui na o le lua fuaiupu o la tatou tusi faitau, ae a matuā vaavaai totoa i ai, ma vailiili lelei lona uiga, ona tatou iloa lea o lo o faasagatonu lava i le mataupu. “O ma’a ma taulaga; o le a e fausia ai se Ekalesia?” O le fesili o faaiu ai le Mataupu, o lo o faasino lava i ma’a ma taulaga o amata ai. E mafai la ona toe faaupu faapea le mataupu, mo lona faafaigofieina, e pei ona tuliloa i le sini – “O tagata, o ni ma’a ma ni taulaga, e fausia ai se Ekalesia?” O le tali sa’o lava, “Ioe.” O lona uiga loloto lea, tatou te vaavaai i le Mataupu e faapea; O le Ekalesia, e le o se falesa, a’o tagata. O le falesa e tapuai ma faatino ai le auaunaga a le Ekalesia; E ui tatou te iloa foi o le falesa po o le malumalu, o le faailoga o le auai o Keriso i totonu o a tatou potopotoga, o se faailoga foi o faamanatu mai ai le Atua e tatau ona viia ona avea ai lea le falesa i lona natura masani, o le Ekalesia, po o le potopotoga a ē o mulimuli iā Iesu. E i ai foi isi ata masani, e pei foi ona faatusa e Paulo le Ekalesia i le tino (The Body). E galulue itu-tino uma, mo le lelei o le tino atoa. O le Ekalesia, o Keriso e amata ai ma ogatotonu i ai, ae o le potopotoga o tagata talitonu e toatele faatasi ma Ia. O Keriso lava o le maa faavae, o luga o Ia o fausia ai le Ekalesia, ma ua valaauina tatou, ina ia tatou faataitai iā Ia. O le tusi atu la a le Aposetolo o Peteru, o le faamalosiā ma le faaloto-tele, i le au Kerisiano o sauāina ma ua taapeape solo. Ia faamalolosi ma ia atiina a’e faatasi outou pei o maa-ola (f 6) o fausia ai le fale-faa-le-agaga. ‘Aua le melea se tasi auā o le

aveesea o se ma’a e tasi mai le faavae o le fale, o le a manunu ma lē maopoopo ai. O tagata uma taitoatasi (ma’a uma) e tofu ma le vaega tāua e fai, ina ia faatumauina ai le Ekalesia po o le fale-faa-le-agaga atoa.

Ua le gata la ina avea ma ma’a-ola o fausia ai le Fale-faa-le-agaga, po o le malumalu paia o le Atua, a ia avea foi i latou ma ositaulaga o le malumalu, e avatu taulaga faa-le-agaga e mālie i le Atua, ona o Iesu Keriso.

Pei a o le malumalu po o le falesa, ua lē na o lona tino mai, ae o le nofoaga foi mo tapuaiga. E faapenā outou, ua le na o ni maa-ola o fausia ai le fale faa-le-agaga, ao outou lava foi o Ositaulaga, o osia taulaga malie ma le paia mo le Atua, mai o outou loto faatuatua ia Keriso Iesu.

Fanau, o le faamanatu tāua lea mo tatou i lenei Aso Sa. O lo tatou au-faatasi o le tasi i le isi faatasi ma Keriso, o le faailoga e le gata i le malosi, a’o mautinoa foi le viia ai o le Atua. Ia fai oe ma maa-ola o fausia ai le fale-faa-le-agaga o le Atua, ma avea foi oe ma ositaulaga e avatu le taulaga e malie i le Atua, e ala i lou ola faatuatua.

GALUEGA FAATINO: (Tatala le mafaufau)

Faamatala mai i sina parakalafa pu’upu’u lava, le uiga o le avea o oe ma ma’a-ola o le fale o le Atua, ma le avea foi o oe ma ositaulaga o lea fale (malumalu)

PESE: 352 “Le Atua mamana e..”

A’OA’OGA:

1. Fai oe ma maa-ola o faavae ai le Fale o le Atua.
2. Ave le taulaga e malie i le Atua.
3. O le Ekalesia o tatou uma.

.....

ASO SA: 18 FEPUARI 2024

MATAUPU: E ONO MAFAI LAVA E LE ATUA ONA FAAUMATIA TAGATA.
(*God could have destroyed humanity*)

SINI: Ia malamalama le vasega e ono mafai lava e le Atua ona faaumatia tagata, auā o Ia o le puna o le ola, o lo o ia te Ia le pule e aumai ai ma toe avatu ai.

TUSI FAITAU: Kenese 7: 17 – 24

FESOASOANI MO FAIAOGA:

O le tatou tusi faitau o le mataupu i lenei Aso Sa, o lo o faailoa mai ai le umi o aso na totō ifo ai uaga ua afua ai ona malo le vai i le fogaeleele. Ua faaumatia ai mea uma o i ai le manava ola i luga o le fogaeleele. Ua vagana ai mea sa i totonu o le vaa, ma Noa ma tagata sa i ai ia te ia na faasaoina.

Fai mai le tatou mataupu i lenei taeao, e ono mafai lava e le Atua ona faaumatia tagata. Fai mai le Evagelia a Ioane 1: 3; Na Ia faia mea uma lava. E leai foi se mea na faia, e le i faia e Ia. O lo o ia te Ia le pule e aumai ai, o ia te Ia foi le pule e avatu ai. Na faia e le Atua le lalolagi ina ia mafai e tagata uma na Ia faia, ona ola fiafia faatasi ma Ia i aso uma e le aunoa i le lalolagi.

Ina ua agasala le tagata, ona le mafai lea ona mafuta mai le Atua i lana tagata, auā ua leaga o ia. Auā o le Atua e inoino i le agasala, e le mafai foi e se tagata leaga ona mafuta mai i ai o Ia. O le uluai tupulaga lava na tatou molimauina ai le faatinoga e le tagata o le agasala, ina ua fasiotia e Kaino lona uso o Apelu. O le leaga ua na faaumatia le amiotonu.

Ua oo mai i lona sefulu o auga tupulaga, ua silasila mai le Atua i tagata o le lalolagi, ua na o le tuinanauga o le agasala ua pulea i latou. Ua na o Noa ma lona aiga, o lo o latou iloa o Ia o le Atua,

o le punavai ola. E ono mafai lava e le Atua ona faaumatia tagata uma, ae fai se isi amataga fou.

Peitai, ua silasila alofa le Atua ia Noa ma lona faatuatua ia te Ia, o le a aafia fua o ia i ana fuafuaga e faaumatia ai tagata agasala. O lea na ia poloai mai ai, ia fau se vaa, e faasaoina mai ai o ia ma lona aiga ma nisi mea o le foafoaga, auā ana fuafuaga mo tagata e usitai ma faalogo ia te Ia le Atua pule aoao. O le mea lea na poloai ai le Atua ia Noa, ia fau se vaa. O le vaa o lona faaolataga lea mai le malaia, o le a oo mai i le lalolagi, o faatonuga uma lava o le faiga o le vaa, na usitaia e Noa ma e 120 tausaga na faia ai le vaa. O le faailoga o le faatuatua ua matua ua lava.

Fai mai e fagafulu aso na i ai uaga i le fogaeleele ma ua neetia ai le vaa mai le fogaeleele, ma ua alu foi le vaa i le fogavai, auā ua malo lava le vai i le lalolagi. Ua oo le maualuga o le vai i tumutumu o mauga, ma ua faaumatia ai mea uma ua i ai le manava ola, i luga o le fogaeleele, seia vagana ai Noa ma lona aiga ma mea uma faatasi ma ia i le vaa. E ono mafai lava e le Atua ona faaumatia tagata, pe afai latou te le liliu mai ma foi i le Atua. E ono faaumatia foi Noa pe ana le faalogo i poloaiga a le Atua ma usitai i ai. E saunia foi e le Atua le faaola mo ona tagata, e faia lona finagalo ma alolofa ia te Ia. E alofa lava o Ia i e alolofa ia te Ia.

O le mea e sili lona matagofie i le tatou mataupu o lo o faailoa mai ai lo tatou faamoemoe lelei. O tagata amiotonu, ma fanau amio lelei, e siitia a'e i latou i luga o le fogaeleele, po o le a lava le mea ua saunia e le Atua, mo le faasaoina o i latou ua fai le alofa mo Ia. O Iesu Keriso o le vaa o le Faaolataga. O lana Tala Lelei i lona fanau mai, ma lona maliu tiga i le satauro ma lona toe soifua manumalo mai le oti ma le tuugamau e ono mafai ai ona faaolaina tagata uma ia te Ia, a e le faaumatia. Ia manuia le Aso Sa.

Uiga o Upu ma Fasi Fuaiupu:

- i) opeopea - faatafetafea
- ii) neetia - siitia i luga o le suavai
- iii) malo le vai - ua pule le vai
- iv) sefulu lima kupita -

GALUEGA FAATINO: FA’AALIGA MANATU

O oe o le tama ma le teine ua a’oa’o i le poto salalau, aemaise le a’oa’oina i le aoga faifeau ma le Aoga Aso Sa.

Tusi mai i se afa laupepa ou manatu, pe mata na soo atoa le lalolagi i le lolo. Fua i le aofaiga o le lalolagi i ia taimi, aemaise ai o le laueleele na nofoia e tagata i ia taimi amataga o lo tatou ola.

- 1. Ta’u lou manatu
- 2. Le mafuaaga o ou lagona.

PESE: 122 (Pese ma Viiga)

A’OA’OGA:

- 1. E ono mafai e le Atua ona faaumatia i tatou pe a tatou le alolofa ia te Ia.
- 2. Ia ola mama mai le agasala.
- 3. E inoino le Atua i le agasala.

.....

ASO SA: 25 FEPUARI 2024

MATAUPU: UA VAEVAEINA LE MALO
(The Kingdom divided)

SINI:

Ia malamalama le vasega, ua vavaeina le malo, ina ua lafoa’i le Atua ma lona alofa, ae fai o latou lava loto.

TUSI FAITAU: 2 Nofoaiga Tupu 36: 11 – 20

FESOASOANI MO FAIAOGA:

O le tusi faitau o la tatou mataupu i lenei Aso Sa o se vaega o mafuaaga ua faailoa mai ai le vavaeina o le malo o Iuta, ma faatafea ai i Papelonia. Fai mai le Salamo 127: 1; “Afai e le atiina ae e le Alii le fale, e galulue fua o e atiina a’e, afai e le leoleo e le Alii le aai, e mataala fua le na te leoleoina.”

Fai mai le Perofeta o Isaia i le fetalaiga a le Atua, i lana pese i le tovine o Iuta ma Ierusalema Isaia 5: 4; “Se a ea se mea e toe faia i la’u tovine ou te le i faia? Se a foi le mea ua fua mai ai i vine leaga, a ua ou faatalitali ia fua mai ai vine lelei?”

Ioe, o le uiga lena o le malo ua latou le fiafia ma ua inoino i mea ai o le Agaga mai le Atua e ola manuia ai i aso uma. O le luasefulu tasi tausaga o Setekaia na fai ai o ia ma tupu, ma e sefulu tasi tausaga o lana nofoaiga, ina ua ave faatagata o taua i Papelonia i le tausaga 586 B.C.

Na taumafai malosi ai le Perofeta o Ieremia ina ua mavae le tafeaga muamua i le tausaga 597 BC, ina ia aua nei latou tetee i le malo o Papelonia, a ia latou talia. Auā o le mea mai le Atua. A ua fai ma mea ua faamaa’aina atili ai le loto o le tupu o Setekaia ma perofeta pepelo, faatasi ma alii ma tagata o Iuta. Ua logo foi e le perofeta o Ieremia tagata ua faatafea i Papelonia, ia ‘aua nei faalogo i perofeta pepelo, ua fai mai e vave ona a’e le tafeaga. Ae leai, ua logo atu e Ieremia i lana tusi i tagata o le tafeaga, e 70 tausaga o le umi o le tafeaga. O le mea lea ia outou atia’e outou aiga, ma fai faatoaga ma pisinisi auā lo outou manuia. O upu nei na matuā lotoa ai le tupu o Setekaia ma atili ai ona faamaa’a lona loto ma au faatasi ma Aikupito ma faasagatau atu ai ia Papelonia.

O lona iuga o le lē usitai, o le liliu atoa mai loa o Papelonia ma lona malosi, ua matua faatafunaina le malumalu i Ierusalem, ma talepe ona pa i lalo. Ua afio ‘ese foi le mamalu o le Atua mai Ierusalem. A o Setekaia ma lana fanau ma alii o le nuu uma ua ave faatagata o taua i Papelonia. Ua faavaai foi Setekaia a o fasiotia lana fanau, ona faaiu ai lea i lona faatauasoia. O lona tolu ai lea o vaega o tagata ua tipotiina i Papelonia i le tausaga 586 B.C.

O le faatoilaloina o Ierusalem ma le vaevaeina o le malo o Isaraelu i le tausaga 586 BC, ua le iloa atu ai ni mea se tolu e sili ona pele ma taua i ona tagata, mo latou olaga. Ua le toe i ai se malumalu, ua le toe i ai se nofoaiga a tupu, ma ua le iloa atu ai ma lo latou laueleele o lo latou faasinomaga. O le faanoanoaga sili o le tafeaga, aemaise le malo ua vaevaeina, e le o le ave faapagota o tagata, e le o le faatafunaina o le aai ma le malumalu. O le tuua ma le afio ese o le mamalu o le Atua mai i lona lotolotoi ai i totonu o tagata ua taua o lona nuu filifilia.

A o le feau lava ia o le tatou mataupu. Ia aua lava le lē fia faalogo ma sopo loa lau vaai i mea e te manuia ai ma e lelei ai. Ia e alofa atu i le Atua ma lou loto atoa, ma lou agaga atoa ma lou malosi atoa. Ia e alofa atu i le lua te tuaoi, e pei o oe lava ia te oe. O le mea lea na te leoleoina oe mai faaososoga uma. E taitai foi ia te oe i aso uma, ona le vaevaeina lea o lou loto o i totonu ia te oe.

O Iesu Keriso na Ia le tuua ai lava le finagalo o lona Tamā lo tatou Atua, o le mea lea na le mafai ai e mea leaga na vaevaeina lona finagalo ae na tumau e oo lava i le iuga o lana galuega faaola. Ia manuia le Aso Sa.

Uiga o Upu:

- i) fouvale - taulu’ilu’i
- ii) faamalōlō - faama’a’a le loto
- iii) faataugaina - faaleaga

GALUEGA FAATINO:

- 1. Faamatala auiliili mai mea na faaleagaina e Papelonia i totonu o le aai o Ierusalem.
- 2. O a mea taua e tolu ua aveesea talu le faatafunaina e Ierusalem ma le tafeaga i Papelonia?

PESE: 11 (Pese ma Viiga)

A’OA’OGA:

- 1. Ia muamua le Atua i mea uma.
- 2. E vaevaeina le malo, pe a leai le amiotonu a le Atua.
- 3. Ia faavae i le Atua au fuafuaga uma.

.....

ASO SA: 3 MATI 2024

MATAUPU: O SE AAI UA FAATAFUNAINA
(*Abroken city*)

SINI: Ia malamalama le vasega, so o se galuega tele ua tatou sauni e faia, e mafai lava ona toe faaleleia, pe afai tatou te faalagolago ma faatuatua i le alofa o le Atua.

TUSI FAITAU: Neemia 1: 1 – 2: 10

FESOASOANI MO FAIAOGA:

O le tatou mataupu o lenei taeao, o le tala ia Neemia ma lana galuega o le toe fausia o le pa i Ierusalem. O ulua’i tagata lava o le tafeaga na vave ona toe foi i Ierusalem, ua latou toe fausia

le pa o le aai i Ierusalemā. Peitai, na toe soloia ma toe faaleagaina e tagata loto vale o Samaria ma nuu tuaoi.

Ua oo atu le tala ia Neemia i le faatafunaina o le pa i Ierusalemā, ona tagi lea ma faanoanoa lona loto. Ua naunau lona loto ua fia alu e fai se galuega lelei mo le aai ua faatafunaina. O le tausaga e 445 BC na tupu ai lenei mea i le taimi na tulai mai ai le tupu o Aretaseta o le malo o Peresia. Ua naunau le loto o Neemia ua fia alu i Ierusalemā se'i fai se galuega e toe fuatāina ai le aai ua faatafunaina. Ua le utuva ona tatalo ma anapogi ma faanoanoa i aso uma i le Atua, ia maua sona avanoa lelei mo ana fuafuaga toe fuatai mo le aai i Ierusalemā. O lona Agaga e aiaina le tupu, e aumai se faatagaina mo ia.

O Neemia o le ave uaina a le tupu. Ua silasila mai le tupu ia te ia i aso uma e alu atu ai e ave atu le uaina, ona foliga faanoanoa. Ona fesili lea o le tupu, pe ua faanoanoa aisea i aso uma? Ona fefe lea o Neemia, ma talosaga mo sona avanoa lelei sei alu ai i le aai o Ierusalemā ua faatamaia, o lo o tatanu ai ona matua, sei toe faafouina mea ua faatafunaina. Na talia lelei e le tupu o Aretaseta lona fanoga ma avatu ai le avanoa, faatasi ai ma lona loto fesoasoani ia Neemia.

Ua le gata ua avatu tusi mai le tupu e faatagaina ai le galuega toe fuatāina o le aai i Ierusalemā i aunoa ma se toe faalavelaveina e se tagata. A ua avatu le faatagana o laau o le vao a le tupu, e au mai e fai ai laau o le faitotoa o le aai ua faatafunaina. Fai mai Neemia, ona tuu mai lea e le tupu ia te a'u e tusa ma le aao alofa o lo'u Atua na ia te a'u. O Neemia o le tagata faatuatua ma faalagolago ma faamoemoe i le Atua, a oo ina toto ifo manuia, o le viiga o le faafetai e toe foi i le Atua, auā ua mafai mea uma o lona auai faatasi mai.

O le isi mea ua naunau ai Neemia e fai lenei galuega, ona ua leai ni tagata o totoe o Isaraelu, o i ai le loto nuu moni. Auā ua ave lava le faatafunaina o le aai, ma le tafeaga ua leiloa atu ai mo latou faamoemoe. O se gaiouga lelei lea i le manatu o Neemia e toe fa'aosofia ai lagona ma loto nuu o tagata o Isaraelu ma toe

fia foi atu ai, e toe fuatai lo latou malo ma le laumua o Ierusalemā ua faatafunaina.

O le tusi faitau o le tatou mataupu i lenei taeao, ua tatou iloa ai uiga lelei o le tagata o Neemia. O le tagata e alofa i le Atua i lona malosi ma le agaga ma le loto atoa. O le tagata faatuatua, e ave le viiga ma le faafetai i le Atua pe a manuia mea na te faia. O le tagata loto nuu, e fiasia e atina'e lona nuu i mea e manuia ai. O le tagata loto alofa, e faasoa ana mea e maua i tagata matitiva ma le vaivai.

E ui ina o se galuega tele le toe fuatāina o le aai ua faatafunaina, ae na mafai ona o lona faatuatua ma faalagolago ma faamoemoe i le Atua.

O le a'oa'oga foi lea mo tatou le fanau, ia tatou faatasi ma le Atua i taimi uma e manuia ai o tatou olaga. O Iesu Keriso le na maua'a lona finagalo i lona Tamā, ina ia faaolaina mai i tatou mai lenei lalolagi ua faatafunaina o le agasala, e ala i lona maliu ma lona Toetu manumalo mai le oti ma le tuugamau.

Uiga o Upu:

- i) gaogaoina - ua leai ni tagata
- ii) Susana - o le aai o le lotoa a le tupu.

GALUEGA FAATINO: Sailiiliga

O lo o faamatala mai e le tusi faitau uiga lelei o Neemia. Saili mai i le tatou Tusi Faitau na faitauina, po o a ni uiga lelei o Neemia.

PESE: 356 (Pese ma Viiga)

A'OA'OGA:

1. Ia muamua le Atua i mea uma.
2. E mafai mea uma ona o le Atua ua ia i tatou.

3. Ia e maua le loto nuu moni.

.....

ASO SA: 10 MATI 2024

MATAUPU: FAITAUINA E ESERA LE TULAFONO (*Ezra reads the law*).

SINI: Ia malamalama le vasega o lo tatou faitau soo ma faalogo i le a’oa’o mai o le Tusi Paia, e te maua ai le fiafia ma iloa le finagalo o le Atua.

TUSI FAITAU: Neemia 8: 1 – 18

FESOASOANI MO FAIAOGA:

O le mataupu o lenei Aso Sa, “FAITAUINA E ESERA LE TULAFONO”, o le a fesiligia ai se mafuaaga o le faitauina e Esera o le tulafono, faatasi ai ma se aoga o le faitauina o lea tulafono.

O le tusi a Neemia e pei ona i ai le mataupu o lenei aso Sa, o loo tusiaina i le taimi o le toe fo’i o tagata Iutaia mai le tafeaga i Papelonia. O le taimi ua mae’a toe fausia pa o Ierusalema, e ala i le ta’ita’iga a Neemia. Peita’i, o lo o moomia ai ma le toe fausiaina o pa o le ola faa-le-Agaga o tagata o le nuu. O le mea ua tupu, ua tele le felanulanua’i o tagata Iuta. E fai o le fo’i mai o le tafeaga, a’o tagata foi na totoe i le nuu e le’i o i le tafeaga. Ua fefiloi ai le toto Iuta, ma toto mai nuu ese. Ua fenofoa’i tagata Iuta ma tagata o nuu ese, ma ua fai ma ala o le feteena’iga i mafauauga ma le tapua’iga e ala i talitonuga, ma o le mafuaaga lea o le faitauina e Esera le faitaulaga ma le tusiupu, o le tulafono.

O le faamoemoe, ina ia toe faatonutonuina tagata uma e uiga i tulafono a le Atua, ma ia toe faafou la latou feagaiga ma le Atua, e pei ona sa faia i le amataga. Auā ina ua faatafeaina tagata Isaraelu mai o latou lafanua, e matuā moomia lava ona toe faamanatu ia i latou lo latou faasinomaga ma lo latou valaauina, o tagata filifilia e le Atua i le lalolagi mo le faamoemoe o lona finagalo tuufaasolo.

E lē gata i lea, o le toe faitauina e Esera o le tulafono, ina se’i toe fa’aolaola ma toe faamalosi le ola faatuatua o le nuu atoa. Le faatuatua i le Atua e ala i le faamoemoe ma le faalagolago i le Atua i mea uma o le ola, faatasi ai ma le ola fesoota’i lelei o le va tagata, o le tasi i le isi. Ia ola felagolagoma’i ma fetausia’i, ma toe atina’e le nuu ina ia malosi ma mautu. O se faamanatu i le nuu ina ia toe faafou le sootaga ma lo latou Atua, ma ta’ita’iina mea uma i le potu ma le atamai o le Atua i o latou olaga.

Mo Esera lava ia, e le i fa’avaivai i le faitauina o le tulafono. O lo o manino mai le tala sa faitauina, le tulafono, e afua mai le malamala ae o le taeao se ia oo i le aoauli. O lo o atagia ai le tāua o le tulafono, ina ia faitauina uma upu o le tulafono a le Atua. O se galuega o lo o fai mae’ae’a lelei, ina ia nofo silafia e tagata uma o e o lo o faitauina atu i ai le tulafono.

O lo o ta’ua i le tala o lenei aso Sa, le nofoaga sa faitauina ai e Esera le tulafono i le nuu, “**o le faitoto’a o le vai**” (**water gate**). O le toe fausiaina o pa o Ierusalema e Neemia, na fausia ai ma faitoto’a e 12 o le pa. O le faitoto’a lona 7, e ta’ua o le “faitoto’a o le vai”. O le 90 pasene o le suavai e ulufale atu i totonu o Ierusalema, e ala atu i le faitoto’a o le vai. Ma o se tasi o faitoto’a aupito sili ona aogā, i faitoto’a e 12 o le pa, ona e faamoemoe i ai le ola atoa o le nuu.

O lea ua faapotopoto uma ai le nuu, mo le faafofoga ae se’i faitauina le tulafono. O le faailoga o le nuu ua galala i le fia inu i le vai o le ola faa-le-Agaga, o lo o a’oa’o mai i tulafono a le Atua.

Ua le o le suavai taumafa le faamoemoe mo le ulufale atu i totonu o le nuu, i lagona o tagata. A o le suavai faa-le-Aagaga mo le toe faaulufale atu, i loto ma agaga o le nuu.

E manatu ai, o mafuaaga ma a'oa'oga ia ua maua i le tala o lenei aso Sa. O lo o tele ma o loo fou pea tulafono a le Atua o loo faitauina mo i tatou uma i aso Sa ta'itasi, e ala mai le Tusi Paia, ma le lauga mai a le faifeau. O lo o faitauina foi tulafono a le Atua i totonu o o tatou aiga, e ala mai i matua ma e matutua. O lo o faapena foi i totonu o potu aoga, ma so o se mea lava, tatou te maua ai a'oa'oga mai le Atua. Pau lava lo tatou tiute, o le faalogo ma talia lelei, usita'i ma fa'aaloalo i ai, auā o le finagalo lea o le Atua mo i tatou uma.

GALUEGA FAATINO: Taligā Fesili.

E lelei pe a saunia e lau Susuga i le faiaoga ni fesili, e fesiligia ai le fanau e tusa o le tala sa faamatalaina.

PESE: Faitau le Tusi Paia ma Tatalo i aso uma

A'OA'OGA:

1. O le Tusi Paia, o lo o faamauina ai tulafono a le Atua mo i tatou.
2. Fiafia e faitau ma ola i tulafono a le Atua.
3. Toe faafou le olaga tuai i le olaga fou mai le Atua.

.....

ASO SA: 17 MATI 2024

MATAUPU: **E VALAAU E IESU I TATOU I O TATOU IGOA I TAIMI FAIGATA.**
(Jesus calls us by name in times of struggle).

SINI: Ia malamalama le vasega e silafia e Iesu le tagata ma lona igoa aemaise le ituaiga olaga o tatou ola ai.

TUSI FAITAU: Mareko 5:1-20

FESOASOANI MO FAIAOGA:

O le igoa, o se vaega e tāua tele i le tagata. E iloa ai lona faasinomaga, o lona tupuaga, o lona aiga ma ona matua. E tofua le tagata ma le igoa. O le faamoemoe, ina ia valaauina ai ma iloa ai e le isi tagata.

O le tala i lenei aso Sa, o loo faamamafaina ai le fesili a Iesu i le tamāloa na ulutinoina e temoni po o agaga leaga, lea na oo ane ma faapa'ū i ona vae ma talosaga mo se sa'olotoga. E lē o manino i le molimau a le tusitala le igoa o le tamāloa na oo ane ia Iesu. Peita'i o le fesili a Iesu i le tamāloa po o ai lona igoa, ua manino mai ai le tulaga o loo faafeagai ma si tamāloa. E lē gata i lea, a ua vavala mai ai ma le faasinomaga o lo o fai ma pologa o sia tamāloa.

O le fesili a Iesu, "**o ai lou igoa?**". O se faatupu manatu i nai mafaufauga e tutupu mai ai e faapea, "*afai o Iesu o le Alo o le Atua, e na te silafia mea uma lava, ae aiseā ua na lē silafia ai le tamāloa o lo o la talanoa?*"

E mafai ona faapea se lagona, o loo silafia lelei e Iesu lē o lo o la talanoa. O le mafuaaga foi lea o lona fetalai ane, "Alu ia i fafo oe i le tagata, o oe na, le agaga leaga". O lo o silafia lelei e Iesu, o le mafuaaga o le pologa o lē ua alaga ane, o le malosi o le agaga leaga po o temoni. Peita'i, o le fesili i le igoa, o lo o manino mai ai le pule ma le malosi o Satani, o lo o i le tamāloa. A toe faaupu la le fesili a Iesu, e mafai ona faapea, "O ai oe lea e te faapologaina lenei tamāloa?"....

O le finagalo o le Alii ina ia faaleo mai le igoa, ina ia nofo malamalama i ai i latou o lo o faalogologo ane. O se faiga ina ia

ta'utino ma faailoa ifo se fia malosi ma se fia sili o Satani, i le malosi silisiliese o le Alii o Iesu.

O le tali ane a le tamāloa ia Iesu, “O Lekeono lo’u igoa; auā e to’atele i matou”. O le fesili e tula’i mai, “**o Lekeono, o le igoa sa’o o le tamāloa na alu ane ia Iesu?**”.

O le mafuaaga o le fesili, ona o le igoa Lekeono (legion), o le ta’uina lea o se faaputuga po o se tuufaatasiga o fitafita Roma sa i ai, pe tusa lona aofa’iga ma le 6,826. O le to’atele o fitafita i se faaputuga e tasi. Ma o le mafuaaga lea o le fa’aaogaina o le upu Lekeono (legion) i totonu o le tala. Ua faaleoina ai se fuainumera telē o fitafita a Satani, e pei o temoni ma agaga leaga o lo o fuifui faatasi ma nonofo faatasi i le olaga o si tamāloa. O lona uiga, e foliga mai i le tala, e lē o Lekeono le igoa sa’o o si uso na alu ane ia Iesu. O le vaega mulimuli o le tali a le tamāloa, “...auā e to’atele i matou” e foliga mai ai, e lē o le tamāloa na tali ane, a’o temoni ma agaga leaga. O lo o numera tele le tali i le to’atele o i latou. Peita’i, ua na o le to’atasi le tamāloa, se’i vaganā ai le molimau a Mataio, e to’alua tamāloloa na o ane ia Iesu.

O le ata atoa o le tala o lenei Aso Sa ma le taumafai e tau faamanino ma tau feso’ota’i ma le autu o le mataupu, o lo o atagia ai le taumafaiga ina ia matuā faamati’e le pule aoao ma le silisiliese o le Atua e ala ia Iesu, ia Satani ma au i le lalolagi nei. O le upu moni, o loo silafia lelei e Iesu o tatou tagata, ma o tatou igoa. Peita’i, o le fia pule ma le fia malosi o Satani ma ana au, ua fai ma pologa i le tagata, ma ua taumafai e faaleaga ma faaumatia le ola o le tagata ina ia fano. O le mafuaaga lea o le fesili mai o le Alii i le igoa. O le fala lafo ua fofola mai e le Alii o Iesu ma faailoa mai, e oo lava foi ia Satani ma au, e fesili lava i ai le Alii o Iesu. Taimi faigatā o le olaga o le taule’ale’a na pologa ma saisaitia i faiga a Satani, lea ua valaau i ai Iesu, “O ai lou igoa?”. E moomia le faailoa o le igoa, e iloa ai le mafatiaga o lo o faafeaga ma le tagata.

GALUEGA FAATINO: Faatinoga.

Ia faatino le tala o lenei Aso Sa. O le vaega tāua e fia faamamafaina, o le valau atu o Iesu i le na alu ane ia te Ia, “O ai lou igoa?”.

PESE: Ua valaau Iesu mo oe i lou aiga.

A’OA’OGA:

1. Aua ete popole, e valaau mai Iesu ia te oe.
2. O Iesu lava tatou te mapusaga i ai.
3. Ia e manumanu i lou igoa.

.....

ASO SA: **24 MATI 2024 (Aso Sa Laupama)**

MATAUPU: **FAASESĒ E IESU
MANATUNATUGA O TAGATA
LAUTELE.**

(Jesus defies public expectations).

SINI: Ia malamalama le vasega, o le afio atu o Iesu i Ierusalem, e lē ina ia faatoilaloina o le Taulaga o le Faaolataga, e ala i lona maluu ma lona Toetu manumalo.

TUSI FAITAU: Mareko 11:1 - 11

FESOASOANI MO FAIAOGA:

O le mataupu o lenei aso Sa, o lo o aga’i i manatunatuga o tagata lautele ma le faasesēina e Iesu o ia manatunatuga. Ae a toe faamatala le upu manatunatuga, e aiga tutusa ma le upu

mafaufauga, o le upu talitonuga, o lagona e tutupu. O ni lagona ma ni manatu e tutupu a'e, ina ua i ai ni feteena'iga o se tu ma se amio ua faia, mai i faiga ua masani ai ma le olaga sa tutupu a'e ai.

O le tala sa faitauina, o le faamatalaina o le malaga a Iesu i Ierusalem. Ua masani le faalogo i lenei tala, i lona faamatalaina "o le malaga faa-tupu a le Alii o Iesu", e pei ona i ai lenei aso Sa, o le aso Sa o le Laupama. O le faamanatuina ma le fa'atāuina o le malaga atu a le Alii i Ierusalem, lea e manatu le au Kerisiano, o le aga atu lava lea o le Alii o Iesu i ona puapuaga.

E ui lava la o le malaga faatupu a le Alii o Iesu, ae na fai ma ala o le fesiligia ma le tutupu a'e ai o manatunatu o tagata lautele, e uiga i lea malaga.

O lo o manatu le au Iutaia ma tagata lautele, i le Mesia na valoia, o lē e sau ma le pelu ma le malosi faa-fitafita, e na te faato'ilalo le malosi o le malo o Roma. O lē e ti'eti'e mai i le solofanua ma lana pelu, e aumaia le fa'aolatotoga ma le loto malosi o le au Iutaia, e tau ai mo ona fili. O le faasesēina e Iesu o lea mantunatuga, na Ia filifilia ai le tama'i asini e afio atu ai i Ierusalem. O le ti'eti'e i le tama'i asini, o le faailoga o le loto maulalo ma le agamalū. Ua lē o se malaga o se fa'afetoaiga o malosi, a o se malaga o le filemu.

O le isi manatunatuga, o le folaina o ofu ma la o laau i le ala, a'o ti'eti'e atu le Alii o Iesu i le tama'i asini. O le tu ma le aga lea e faia, pe a afio atu se tasi na fa'aeaina se pologa, po o se tagata ua manumalo mai se taua. Peita'i, ua lē o lea le faamoemoe o le malaga a Iesu.

O le manatu o tagata ia Iesu, o lē ua afio mai le suafa o le Alii. O lē e fa'aola ia i latou uma, mai lima o fitafita Roma. Ma o le uiga lea o la latou alalaga "OSANA". O le tagi faatauanau ina ia fa'aola ma fa'asa'oloto (*The crowds shouted "Hosanna," which is an exclamation of praise and a cry for help. It was a plea for salvation and deliverance. The people's use of "Hosanna" indicated their recognition of Jesus as a potential deliverer.*)

Peita'i, o le faasesē a Iesu, ona o le fa'aolaina lava ia e moomia e le tagata, o le fa'aolataga i le faa-le-Agaga, e i le va lava o le tagata ma le Atua.

O le afuaga lea o lona aga atu i ona puapuaga, e tusa o lana malaga. O le faamoemoe ina ia faataunuuina le fa'aolataga mo le lalolagi uma i lona maliu ma lona toetu manumalo. O le malaga se'i a'oa'oina ai le vaai, o manatunatuga ma mafaufauga o tagata uma, i le aano moni na Ia afio mai ai i le lalolagi. Ma o le faamoemoe foi lea o lenei aso Sa mo le au faatuatua uma. Ina ia toe to manatu ai i le tāua ma aogā o le malaga faa-tupu o le Alii Faaola o Iesu, ua mafua ai lo tatou faaolaina mo le faavavau.

GALUEGA FAATINO: Faatinoga

O le aso Sa lenei o le laupama e faatino ai le malaga faa-Tupu a le Alii o Iesu i Ierusalem. O le tala e faatinoina lava i tausaga ta'itasi, ma e talitonu le faamoemoe, ua silafia uma.

PESE: Osana pepese tamaiti uma.

A'OA'OGA:

1. Ia lagona le tāua o lenei aso Sa, ma le aga atu o Iesu i ona puapuaga.
2. Aua tatou te manatunatu leaga i nisi tagata.
3. Talitonu ma le faamaoni, ae le o le tuufesili ma faifai.

.....

ASO SA: **31 MATI 2024 (Aso Sa Toetu)**

MATAUPU: **MAI LE POGISA (Out of the darkness)**

SINI: Ia malamalama le vasega, o le toetu o Keriso, ua faamalamalamaina ai le pogisa o le lalolagi.

TUSI FAITAU: Ioane 20:1 – 10

FESOASOANI MO FAIAOGA:

O se tasi lenei o Aso Sa tāua i le Kalena o le au Kerisiano uma i le lalolagi. O le Aso Sa na susulu ai le malamalama o le Toetu, mai le pogisa o le oti ma le tuugamau, ina ua toetu manumalo mai ai lo tatou Alii o Iesu Keriso.

O le tusi faitau o lenei Aso Sa, o lo o faamatalaina ai e Ioane lana molimau i le Toetu o Keriso. O le i ai o Iesu i totonu o le tuugamau, o le i ai lava lea i le pogisa. A manatu i le tuugamau, e leai lava se vaega e ono susulu atu i ai se malamalama, ua na o le pogisa faasoloatoa. Peita'i, o fafo atu o le tuugamau o Iesu, o lo o taoto ai isi pogisa.

O lo o manino le tala i lona faamatalaina, i le oo atu o Maria le Makatala i le tuugamau, ma le vaaiga ua tupu ina ua aveeseina le maa sa pupuni ai le gutu o le tuugamau, faatasi ai ma le oo atu o Peteru ma le tasi soo e lē tā'ua lona igoa i le tuugamau. O lagona o lea taeao o lo o taoto i totonu o le tala ma le vaaiga o loo faamatalaina, o lagona o le lē mautonu ma le popole. O lagona o le misialofa ia Iesu faatasi ma le masalosalo, ua fefiloi faatasi ma le ita, ina ua lea'i le Alii o Keriso ma totonu o le tuugamau. Ma o pogisa lilo ia o lo o taoto i fafo mai o le tuugamau. O le pogisa ia Maria le Makatala, ma le pogisa o le au soo, ia Iesu sa o latou mafuta ma feoa'i, a'o i ai i le galuega tala'i. O lo o atagia ai le lē manino, o Iesu na afio mai e maliu, ma o le a toetu mai i le aso tolu. Ua galo i le au soo, le uiga o le fetalaiga a le Alii o Iesu, e uiga i le malumalu e talepe ma toe fausia i aso e tolu (Ioane 2:19-22). O lona uiga, sa feoa'i lava Iesu ma i latou, a o lo o pogisa lava i le mea o le a tupu ia Iesu, e pei ona i ai le aso lenei.

O le pogisa la o Simona Peteru ma le isi soo, faatasi ai ma Maria le Makala, o foliga ia o le pogisa o le lalolagi ia Iesu ma lona afio mai i le lalolagi.

O le tāua o le molimau a Ioane i le Toetu o Iesu, ona o loo faamatalaina ai le taunuu atu o Simona Peteru, ma ulu atu i totonu o le tuugamau. A faamatalaina i se uiga faafaigofie, o lea lava ua oo atu Simona Peteru se'i momoli atu lo latou pogisa sa nunumi solo i fafo mai o le tuugamau, se'i faamalamalama i totonu o le tuugamau, e ala i le loto talitonu ma le mautinoa. Le pogisa faa-le-agaga o le tagata ia Iesu le Faaola, lea ua faamalamalamaina i totonu o le tuugamau, ina ua vaai tino ma mautinoa ai.

O le vaaiga i ie na tanuma'i o lo o ta'ata'ai ma le solosolo sa i le ao o Iesu i le tuugamau, o lagisoifua poo pine faamau ia mo Simona ma le isi soo faatasi ma Maria le Makala, e le'i aveeseina pe na gaoia e se tagata le tino o Iesu. O molimau ola ia e faailoa ai, ua toetu manumalo le Alii o Iesu Keriso mai le tuugamau. Ma o le ala foi lea o le toe foi o le au soo i o laua aiga, ona ua vaai ma mautinoa ai. Auā ana lē mautinoa, semanū ua o e saili le tino o Keriso.

O le fesili mo i tatou uma lava, po o tumau ea lo tatou pogisa i lo tatou Alii Faaola o Keriso? Ua a'oa'o mai lenei tala mo i tatou uma, ina ia o tatou talitonu ma le faamaoni ua Toetu manumalo lo tatou Alii o Keriso. Ia manino foi tagata Kerisiano uma, o le pogisa o le tuugamau, ua faamalamalamaina e le manumalo o Keriso.

GALUEGA FAATINO: FAATINOGA

O lenei lava aso Sa o le “Toetu”, e masani lava ona faia ai le faatinoga o le tala i le “Toetu”. E fautuaina ai lenei vasega ina ia faatino pea le tala o le “Toetu”, ae fa'aaogaina ai le molimau a Ioane.

PESE: 51 Pese ma Viiga

A’OA’OGA:

1. Ua na o Keriso e malamalama ai lo tatou ola pogisa.
2. O le manumalo o Keriso, o le Tala Lelei mo tagata uma.
3. Aua tatou te masalosalo ia Iesu lo tatou Faaola.

.....

ASO SA: 7 APERILA 2024

MATAUPU: GALUEGA O LE LELEIGA
(A ministry of reconciliation)

SINI: Ia malamalama le vasega, o le Alofa Tunoa o le Atua na Ia faia ai le leleiga e ala ia Keriso.

TUSI FAITAU: 2 Korinito 5: 11 – 21

FESOASOANI MO FAIAOGA:

O le galuega o le leleiga e tusa ai ma le manatu o le Aposetolo o Paulo. O le mea na faia lava i le Alofa Tunoa tele o le Atua; A o le matafaioi lea a le au Aposetolo e i ai ma ia. O le faailoa atu lea ma talai atu i tagata e ala i lo latou talitonu ma faatuatua i le galuega tele na faia e le Atua. O le mataupu o le leleiga pei ona molimau ai Paulo, ua uma ona faia i le mana o le Alofa Tunoa o le Atua mo ona tagata. E pei ona tusia i le fuaiupu e sefulu valu (18) o le Korinito e lua (2) “O mea uma foi mai le Atua ia, ua uma ona faaleleia e Ia. O i tatou ia te Ia, e ala ia Iesu Keriso, ua tuuina mai foi ia te i matou le galuega o le leleiga.”

Fai mai Paulo, O lenei sa ia Keriso le Atua, ua faaleleia e ia le lalolagi ia te Ia. Ua le ta’ua a latou agasala ia te i latou, ua ia tuuina mai foi ia te i matou le upu o le leleiga. O lenei o savali i matou a Keriso, peisea’i ua aioi mai le Atua ia te outou e ala ia i

matou, matou te ole atu, o sui i matou o Keriso, ia outou lelei ma le Atua.

A o le fesili; Aisea tatou te manaomia ai se galuega o le leleiga? O se mafaufauga ua iloa lautele, o le leleiga e tupu ina ua i ai se faafitauli po o ni eseseega o ni tagata se toalua po o ni faapotopotoga o tagata, ma e tasi le mea e moomia, o le loto faamagalalo. O le fefaamagalalo’i, ona sologa lelei foi lea ma faauma ai ma le faafitauli. Peitai, ina ua manino la tatou vaai i le mataupu o le lelei, ua tatou iloa ai e le faapena le faigofie o galuega o leleiga.

Peisea’i o le afuaga o le leleiga o lo o ta’ua mai i le fuaiupu e (21) o le tusi sa faitauina. O Iesu na te lei iloa se agasala. A o lona afio mai i le lalolagi, o le nofoaga o le agasala ma militino faatasi ma manatu ai ua aafia i le agasala. O le tala i le tusi a Luka mataupu e valu (8) i le tala i le faamaloloina o le afafine o Iairo. O le afio atu o Iesu e faamalolo le afafine o Iairo, le pule i le sunako, na faalavelaveina ai, ina ua pa’i atu ia te Ia le fafine sa i ai le ma’i punatoto i tausaga e sefulu lua (12)

O se fafine sa le tatau ona i ai i lenei tumutumu o tagata, auā e aafia ai le motu o tagata, e tusa ai o tulafono a le lotu Iutaia. O le pa’i atu o se fafine agasala i nisi tagata, o le a agasala ai foi ma i latou. Ae maise ai le le tatau ona pa’i atu i se tane po o se alii. E ui lava i lea, sa tu Iesu ma faalogo i lenei fafine ma lana faamatalaga atoa o lona ma’i ma le mafuaaga ua o’o mai ai i lea tumutumu o le motu o tagata. E tasi le mea na manao ai lenei fafine, tau lava ina pa’i atu i se vaega o le tino o Iesu, ona malolo ai lea. O le manatu o le fafine, o le mea ua faia e Iesu mo ia, o le leleiga lea o ia ma ia lava, i lona lava tino, ina ua malolo, a o le faaleleiga mo ona lava tagata, ae maise ai le faalelei atu i le Atua.

Auā o lea lava ua fetalai atu i le Atua e ala ia Iesu, “O lou faatuatua ua e malolo ai, alu ia oe ma le manuia.” O lo o momoli mai foi i le fuaiupu lea e luasefulutasi (21), le atoaga ma le faavae mautu mo lo tatou leleiga. O le fesili, e faapefea ona faia e le Atua le leleiga i lona atoatoa ma mautū? E faapefea

ona Ia talia tagata agasala e toe foi atu ia te Ia i le salamō ma le faatuatua faamaoni? O le tali, O le Alii o Iesu. Na Ia matuā tapena ma le atoatoa o faafitauli ma faigata, o a taou agasala, na Ia faaleleia ai i tatou i le Atua.

I se isi faaupuga, O le Atua na Ia faia Keriso ma agasala mo i tatou. O Keriso e lei iloa se agasala, ma Ia avea ai i tatou ma amiotonu ia te Ia. O a tatou agasala ua tuu atu i luga ia te Ia, a e le o i totonu ia te Ia. O lo tatou talitonu ma le faatuatua faamaoni ia te Ia, ma ola i le soifuaga o Keriso i aso uma, e avea ai i tatou ma amiotonu i le Atua.

A o se feau tau momoli mai lea mo tatou i lenei mataupu o lenei Aso Sa. O le galuega o le leleiga i lona atoatoa ma le faamaoni. O Iesu Keriso na te lei iloa se agasala, ua Ia tauave a tatou agasala. A o i tatou foi tatou te lei iloa se amiotonu, a ua fai i tatou ma amiotonu i le Atua ona o Keriso.

GALUEGA FAATINO: Suesuega i le Tusi Paia.

Vaevae le vasega i vaega e fa (4).

- Vaega 1 - Suesue i le fuaiupu 18
- Vaega 2 - O le fuaiupu e 19
- Vaega 3 - Fuaiupu e 20
- Vaega 4 - Fuaiupu 21

Ia faamatala i ni a latou lava upu le uiga o fuaiupu, ua vaevaeina atu.

A’OA’OGA:

1. O le Alofa Tunoa o le Atua na Ia faia ai le leleiga mo i tatou.
2. E finagalo Iesu ia tatou lelei ma isi tagata.
3. Ia ola fealofani ma fefaagaloa’i

.....

ASO SA: 14 APERILA 2024

MATAUPU: FAAEAINA MA LE LOTO FAAFETAI (*Triumphant and thankful*)

SINI: Ia malamalama le vasega, e ao ina fai pesega ma vivii i le Atua i le loto faafetai pe a faaeaina i tatou.

TUSI FAITAU: Esoto 15: 1 – 18

FESOASOANI MO FAIAOGA:

E lua ni vaega taua o lo o momoli mai i le mataupu o lenei foi Aso Sa. O le faaeaina, ma le loto faafetai. O le faaeaina, o se mataupu e tele nisi upu e tai uiga faatasi ma le felanulanuai o ona faauigaina. E pei la, o le faaeaina i ni tofiga maualuluga. O le tofia e fai ma palemia o se atunuu, o le filifila e avea ma fofoga fetalai o se palemene. O le fai ma minisita o le kapeneta ma isi lava tofiga ma valaauina faapea i totonu o faiga malo. E oo lava foi i le avea ma pule sili o se matagaluega, tasi foi na faaeaina.

O le faaeaina ina ua manumalo i ni taaloga. O le avea ma siamupini i ni taamilosaga lakapi i totonu lava o le atunuu ia, po o taamilosaga foi faava-omalō. O le manumalo i le siamupini o fusuaga, ma isi lava taaloga eseese.

E mafai foi ona faapea, o se tasi po o ni tagata ua lavea’iina ma faasaoina mai ni tauiviga o tiga ma ni puapuaga sa fetaiaina ai le ola. Ua maua le toafilemu ma le sologa lelei, ina ua lavatia le ola onosai ma le faamoemoe i le Atua e tali mai i mafatiaga. A o le loto faafetai, o se mataupu e tu tasi lava lona uiga. O le loto faafetai i le Atua ona ua faaeaina. Ae peitai, e matafelefele ona faatinoga ma lona faamatalatalaina.

O lona uiga o le ola faaeaina, o lona manaoga tu tasi lea, e ave i ai lana faamuamua. O le loto faafetai. O le tagata faaeaina, o lana avanatau e ao ina faamuamua, o le faafetaia lea o le Atua, na faapogai i lona faaeaina.

E peiseai o se ata manino lea o lo o molimoli mai i le Tusi Faitau o lenei aso. O le faaeaina po o le faasaoina mai o le fanauga a Isaraelu, mai ia Farao ma lana au tau o lo o mulimuli mai ma le sami ulaula o lo o i o latou luma atu.

O le vaega la lea o le tusi sa faitauina; o pesega ma viiga a le fanauga a Isaraelu i le Atua e faafetaia ai lona alofa, ina ua fasaogalemuina ma faasaoina lo latou ola. O pesega ma viiga i le Atua o nisi ia o autu masani e tauta'ua ma lagonaina pea i totonu o Afioga Paia a le Atua. A o se mataupu o lo o tumau pea lona taua ma le aoga i le faatinoga o tapuaiga i le Atua i aso nei.

Atonu foi ai o le isi lea manatu ua faatauina ai pese ma viiga e momoli ai le loto faafetai o lo fa'auau ai pea i le faitauga o le Tusi Paia i le lua vaiaso o lumanai. O lo o taua ai nisi o pesega ma viiga o lo o i totonu o le Tusi Paia, mai le taimi o Mose, seia oo i le tusi a Fa'aaliga.

O le uiga lea o le mataupu o lenei aso, “**O le faaeaina ma le loto faafetai**” O le lagiina faapese o viiga o le Atua ona o lona alofa i le fanauga a Isaraelu. Ma o lo o tupu tonu i le taimi ua faasaoina ai le fanuaga a Isaraelu mai le itutaua a Farao. E le gata i le faasaoina mai ia Farao ma lana au tau, a o lo latou faafetaia o le Atua ona o le galuega tele po o le vaega na Ia vaeluaina ai le sami ulaula ae savavali ai le nuu i le iliti tai matutu.

O le pese ma viiga i le Atua, o Le na faatuatua i ai e taitaiina i latou i le saogalemu. A o se taimi foi e toe manatu ai i tua le fanauga a Isaraelu i mea na tutupu a o fa'auau mai le latou faigamalaga, ma latou iloa ai le galuega tele na faia e le Atua mo i latou. O le pui-pui ma leoleo, fafaga ma faafeinu. A o lea foi na faasaoina i latou e le Atua mai ia Farao ma ana au. O le mea

lea ua latou ave ai le viiga ma le faamua i le Atua, ona o latou loto faafetai aua ua Ia lavea'iina i latou.

O se faamanatu foi lea mo tatou, ina ia 'aua nei galo le faafetai i le Atua pe a faamanuia mai o Ia ia i tatou. Atonu o se mea telē le vavega na faia e le Atua e ala i le vaeluaina o le sami ulaula, e lē toe tupu lona mea i o tatou taimi, Ae o lo o tatou vaai pea o le malamalama o le isi aso fou, ua matua tataua lona e ave ai se tatou faafetai i le Atua ona o lona alofa tausi ia i tatou i lea aso ma lea aso.

Aua foi nei galo, o a lava tofiga ma valaauina ua faaeaina ai i tatou e le Atua, ia tatou faafetaia ma vivii ai o Ia. O le manatu ua faatatauina mo lenei foi Aso Sa – “O le Alii o lo'u malosia, ma la'u pese, ua fai foi o ia mo'u olataga, o lo'u Atua lenei ou te faaneenee i ai, o le Atua o lo'u tama, ou te vivii lava ia te Ia.” (Esoto 15: 2)

GALUEGA FAI: Tusiga solo.

E tusi sau solo e faatatau i lou loto faafetai i le Atua pe a faaeaina oe i lau aoga. E tolu (3) fuaiupu o le solo, fa (4) lana i le fuaiupu e tasi. A maea ona tusi, ona e tago lea e su'e se fati e lagi faa-pese ai.

A'OA'OGA:

1. Aua nei galo le loto faafetai i le Atua, pe a faaeaina oe.
2. Faafetai i le Atua i mea uma ua faia mo oe; e pei o le faamalalo i lou ma'i, o le poto ua e maua ma le malosia i aso uma o le ola.

.....

ASO SA: **21 APERILA 2024.**

MATAUPU: **PESE O LE TOAFILEMU** (*The songs of silence*)

SINI: Ia malamalama le vasega, o le Pese o le Toafilemu, o viiga o le olioli ma le manumalo o le Atua e ou mea uma o le foafoaga.

TUSI FAITAU: Salamo 98: 1 – 9

FESOASOANI MO FAIAOGA:

O le uiga o le upu pese, o ni leo, ia po o ni pa’o, ia po o ni mafauauga foi ua tuufaatasia, ua mafai ona lagonaina, ina ua tāina i se fati (rhythm) ma ua usuina, ia pe ua tuufaatasia foi ma ni musika e faalogologo ai. E tele ituaiga pese eseese, o pese vave, o pese o viiviiga, o pese faifailemu, o pese e faatatau i mafutaga ua motusia, o pese lotu, ia ma le anoanoai o mau ituaiga o pese eseese i le olaga nei o lo o tou soifua ma tatou ola ai. Peitai, o le pese o lo o faamamafaina, o le **Pese o le Toafilemu**.

O lo o tatou i ai i se olaga e fegaoioiai e le muta, e tumu i mau leo eseese. E tau le maua se taimi tatou te ulufale ai i se olaga o le lē gaioia ma le to’afilemu. A’o tatou mafaufau ai i pese e pei ona i ai lenei vaiaso, faamata e mafai ona tatou faaopoopoina ni pese o le olioli, pese o le tagiaue, o viiga, e fesiligia ai, le pese o le foafoaga o lo o tatou peseina nei?. Ae faamata tatou te maua se avanoa e faalogologo ai i le pese o le Agaga, lea e faatonu ai, ta’ita’i ai ma faamanuiaina ai tatou?.

Ioe, e eseese lava, ma e tofu foi i tatou ma tali. Peitai, o le Salamo sa faitauina, o le pese o le toafilemu, o le pese o le olioli ma le manumalo. Lea ua ta’u manino mai ai le afio mai o le Alii e pulea ona tagata. Lea foi na faataunuaina uma e Iesu i lona afio mai e laveai le lalolagi mai le agasala e pei ona taua i le (98:2,3), ae mautinoa e toe afio faalua mai o Ia, e faamasino le lalolagi, (98:8,9). Ioe, o le ata o le Atua e tumu i le alofa ma le faamaoni atoatoa. O le Atua e agalelei, e le manatua e Ia agasala talu lona alofa mutimutivale. Pe afai tatou te viivii ma

foi atu e auauna ia te Ia i le Agaga ma le faamaoni. O se feau lea o le Tala Lelei mo i tatou uma. O le pese o le toafilemu, o le pese lava lea o le olioli ma le manumalo tatou te maua i le Atua foafoa. O le faailoga o le manumalo ai o le Alii o Iesu i le fili ma le tiapolo. O i latou uma foi o e usitai ma faia lona finagalo, e manumalo uma faatasi ma Ia, i lona toe afio faalua mai e faataunuu lana faamasinoga tonu i le lalolagi, ma latou pepese ai i le pese o le toafilemu.

GALUEGA FAATINO : FA’AALIGA O MANATU.
(General Discussion).

Faamatala mai i ni au lava upu le uiga o le Salamo 98 sa faitauina, e atagia mai ai le uiga o le **Pese o le Toafilemu**.

Tali: O fuaiupu uma lava sa faitauina o lo o atagia mai ai, le ao ona vivii i le Atua o mea uma na ia faia, o tagata atoa ai ma le siosiomaga. O le ata o le toafilemu tatou te maua i le ola e faavavau, pe a o tatou manumalo faatasi ma Iesu ina ua tatou usitaia ma faia lona finagalo.

PESE: 2 (Ina vivii i tatou nei)

A’OA’OGA:

1. Ia olioli ma fiafia e pepese i le alofa o le Atua.
2. E manumalo i tatou pe a tatou au faatasi ma Iesu.
3. O le Atua e pule aoao i lana Foafoaga Paia.

.....

ASO SA: 28 APERILA 2024.

MATAUPU: EFESO. (*Ephesus*)

SINI: Ia malamalama le vasega i le Ekalesia i Efeso, i le taimi na tusia ai e Paulo le Tusi ia Timoteo.

TUSI FAITAU: 1 Timoteo 1:1 – 17

FESOASOANI MO FAIAOGA:

E faafeiloai atu i lenei uluai aso, o vaiaso e lua ua suesueina ai le tusi a Paulo i lona atalii faa-le-Agaga o Timoteo, o se ta'ita'i talavou o le Ekalesia i Efeso.

O le fesili, Sa faapē'i mai Efeso? O ona po nei ua suia lona taulaga ia Turkey. I le taimi na tusia ai le tusi lenei a Paulo, o se taulaga sa matuā tāua tele ma e matagofie i le vaai. I lalo o le taitaiga a le malo o Roma, sa avea ai Efeso ma se tasi o taulaga poo se setete (state) o le malo Roma i totonu o Asia. Sa fai ma laumua o fefaatauaiga, a'oa'oga o ana tu ma aga, a o le fatu atoa o le malumalu o Atemi o se tasi o mea logologoa e fitu i le lalolagi i aso ua mavae. O se malumalu mo tagata Eleni e tapuai i atua o sailiga, o Atemi o le gagana faa-Roma o le atua fafine o Tiana, ua faasina i ai le toatele ma fai ma o latou atua.

Na tusia lenei tusi i le 64 tausaga tuana'i le Mesia e Paulo a o i ai i Maketonia i le taimi a o faafalepuipuina o ia e le malo o Roma. Sa avea Efeso ma nofoaga e faamautu ai Paulo ma Timoteo ma faasalalauina ai le Tala Lelei, peitai sa i ai le feteena'iga ma le tele o a'oa'oga sese i le tau amataina mai o le Ekalesia. E mafua ia tulaga ona o le tele o tapuaiga eseese i atua ese ma atua mamate i ia ona po.

A o tatou vaavaai faa-le-mafaufau i ai i le Tusi muamua lenei a Paulo ia Timoteo i lenei vaiaso, e i ai ni vaega pei e le logomalie, ona o le gagana ma ona tulaga ua autausagā ma ua pāsiā ona aso. Ae o le tatalo faifaipea lea a i tatou, o lo tatou malamalama lelei i a Efeso ma le filifiliina o le lotu Kerisiano, o le a mafai ai ona o tatou malamalama atili i le talaaga o le tusi ia

Timoteo pe a o tatou vaai i ai i se isi vaaiga fou tau i le malamalamaaga.

A o se a'oa'oga mo i tatou le fanau, o lo tatou vaavaai manino lea ma le totoa i le tele o mau aoaoga eseese ua ofi mai i nei ona po i totonu o o tatou nuu ma si o tatou atunuu, e ono faaseseina ai i tatou mai lo tatou talitonuga moni i lo tatou Alii faaola o Iesu Keriso. Ia avea i tatou ma kerisiano loto tetele e pei ona faamalosia foi o Paulo ia Timoteo, ina ia tumau i le faatuatua ma ia aua nei taaina gofie i a'oa'oga sese, ae ia fiafia pea e faailoa ma tala'i atu le Tala lelei o le faaolataga ia Iesu Toetu i e o lo o tapuai i atua ese, ma salamo ma liliu ese mai atua mamate, ae ia talia le Tala Lelei o le malo o le Atua faavavau.

GALUEGA FAATINO: Tusitusiga

Faailoa mai po o le a se faa-naunautaiga o Paulo, na ala ai ona ia tusia le Tusi lenei ia Efeso?

PESE: When we walk with the Lord

A'OA'OGA :

1. Ia loto tele ma tumau i le faatuatua i le Alii o Iesu.
2. 'Aua le fefe e ta'u atu le Tala Lelei.
3. Ua nao Iesu le ala i le ola e faavavau.

.....

ASO SA: 5 ME 2024.

MATAUPU: **OLAGA FAA-SOO.** (*Discipleship*).

SINI: Ia malamalama le vasega o le olaga faa-soo, o le ofo atu o le ola e auauna ai ma

talai atu le Tala Lelei o le Faaolataga ia Iesu Keriso Toetu.

TUSI FAITAU: 1 Timoteo 6: 11 – 21

FESOASOANI MO FAIAOGA :

O lo o tatou i ai pea i le faitauga o le Tusi muamua a Paulo ia Timoteo. Talu ai ona o Efeso e mauoloa ma tele ona tamaoiga O le ala lea o le faamalosi a Paulo ia Timoteo, ina ia taumamao mai le manao i tupe ma tamaoiga o lenei lalolagi faapei ona faia e nisi. Aua o le olaga faa-soo a ia, e ao ona faamuamua le alofa ma le ola faasoa atu i isi. E le afaina le tele o tamaoiga e maua, a ia iloa ona faafoi le viiiga i le Atua e ou manuia ma tamaoiga uma, ia iloa ona faasoa i galuega tatau, ma agalelei ma fesoasoani atu ai i e o puapuagatia ma fia maua se fesoasoani. Ia iloa ai o lo o ola le faatuatua i totonu o le tagata kerisiano, ma ua ia tuua tuinanauga o le lalolagi, ae fai mea tonu e tusa ma le finagalo o le Alii o Iesu.

Na ta'ua foi e Paulo e tatau i le Kerisiano i ai le faatuatua ola, ia aoao atu, galue malosi ma ofo atu atoa le ola e faatino ai mea tonu uma. Ia faapei o e ta'aalo i afeleti le taofia o mea uma e le tatau i taimi o tapenaga. E oo foi i le amio ma le ola usiusitai ia iloa ai i tatou mo so tatou sao mo le Alii, ae le o faapei o e matamata. Ia iloa ai foi e isi le tulaga o lo tatou sao faa-Kerisiano mo le Alii.

O le taua lea o le Tusi lenei a Paulo ia Timoteo. E faamalosiau ai ia Timoteo faapea le au-faigaluega (toeaina, faifeau, aoao, ma tiakono, ma e uma ua maufofi i tulaga uma e tatau ona soifua ma ola ai i totonu o le Ekalesia. Ia atagia i o tatou tagata faatuatua ma le loto faamaoni le galuega a Iesu na afio mai ai i le lalolagi ia viia ai le Alii, ma ia manino ma maufuina ai o lo o tatou faia le galuega faa-soo o le faailoa atu o le Tala Lelei a le Alii i nuu uma o le lalolagi.

GALUEGA FAATINO: TUSIGA SOLO.

Tusi mai sau solo e lua pe tolu fuaiupu tai fa pe tai ono laina i le fuaiupu, e faatatau i le Manatu Autu, Olaga Faasoo.

PESE: Ia fai ma sulu e mumu.

A'OA'OGA:

1. Ia avea i tatou ma ē faia le galuega faa-soo o Iesu.
2. O le loto maulalo, loto alofa, agamalu, ma loto fesoasoani, o nisi ia o lagona o le galuega faa-soo.
3. Aua le fefe e ta'uta'u atu le Suafa o Iesu i e o o loo ola i le pogisa.

.....

ASO SA: 12 ME 2024

MATAUPU: MANUMALOINA O SE MANAMEA
(Winning a Bride)

SINI: Ia malamalama le vasega, ua na o le Atua lava e maua ai le manumalo.

TUSI FAITAU: Kenese 24: 15 – 27

FESOASOANI MO FAIAOGA:

I so o se tausinioga lava, e tasi lava le auga ma le faamoemoe, ia ausia pe ia maua le manumalo. E leai lava se tasi e tausinio ina ia faiaina pe toilalo foi, aua o mata lava o le maasiasi ma le faalumaina. O le ala lea e ao ai lava ona matua tapena ma sauniuni le o le a auai i se tausinioga i le tino, mafaufau ma le agaga. O tausinioga uma foi, e le maua se manumalo i se

faamaualuga o se tasi i sona malosi ma se iloa e faatino ai le tausinioga. E pei lava o se tasi o fuaitau masani; “O LALO LAVA E MAUA AI MALO” aemaise ai, ia faalagolago i le Atua, aua o Ia lava o le Atua o le manumalo.

Peitai i le mataupu o lenei taeao, e le o se tausinioga i ni taaloga po o se tauiviga e pei ona masani ai i le va o ni vaega se lua. A o le tausinioga sa feagai ma le auauna a le toeaina o Aperamo ina ua uma ona faamanuia i ai ma faatonuina e alu e sue mai se manamea po o se ava a le tama o Isaako i le aiga o Aperamo. Sa lei faatamala le auauna i ana tapenaga e pei ona ia ave ai kamela e sefulu mai kamela a lona matai o Aperamo ma mea lelei uma, faatasi ai ma lana tatalo i le Atua ina ia faamanuia mai i lana sailiga ina ia manumalo i se manamea ma lona matai o Isaako.

I ia ona po, sa faitauina tagata mauoa po o le tele o le tamaoiga i lafu manu ma faatoaga. O le ala lea na alu ai le auauna ma kamela. E faapea foi i le sailiga o ni tamaitai e fai ma ava a alii. E saili agai i vaieli, aua o le galuega lea sa feagai ma tamaitai; o le o lea e asu vai mai i vaieli mo le fa’aaogaina. O i tonu lea na feiloai ai le auauna a Aperamo ma Repeka le afafine o Petueli, le atalii o Nakori le uso o Aperamo. Na taunuu ai tuutuuga na manatu i ai le auauna, o le na te asu ane sina vai mo ia ma ana kamela, o ia tonu lea.

Na faatino uma e le auauna mea uma na manatu i ai e avatu ma Repeka ona laua agai lea i le aiga o le tamaitai ina ua ia fesiligia sona aiga. O ina na mautinoa ai e le auauna ua faamanuia le Atua i lana sailiga aua o le aiga lava o lona matai o Aperamo ua saili i ai. O le ala lea na ia ifo ai i le Atua ma faafetaia le Alii aua o lana faasinoga lava ma lana taitaiga ua manumalo ai ia Repeka e fai ma manamea a Isaako le atalii o lona matai.

Tamaiti, o le manumalo a le auauna e lei mai le tamaoiga na alu ma ia po o sona malosi ma se iloa ua na maua, o lona faalagolago lava i le Atua na tatalo i ai ma tuu i ai lona faamoemoe na afua ai ona manumalo. E faapea foi i tatou, e tele

ma anoanoa’i tauiviga ma tausinioga o lenei soifuaga o loo taatitia mai mo i tatou.

Aua nei o tatou faatamala ai pe tatou te finau ai i so tatou malosi ma se iloa ua tatou maua nei o tatou faamaualuluga ai ma tatou maasiasi ai. A ia tatou tauivi ma tausinio e pei ona faia e le auauna a Aperamo; tatalo ma faamoemoe i le faasinoga a le Atua ona tatou maua lea o le manumalo. O le fegai ai ma aoaoga, o faafitauli ma tofotofoga e fetuleni mai aua lo outou soifua talavou, o aiga, nuu ma lo outo taumafai ai mo le Atua ma lana Tala lelei, ua na o le Atua lava tatou te manumalo ai. O Iesu Keriso la tatou uo, na manumalo a’ia’i lava i le oti ma le tuugamau ona sa faamoemoe lava i lona Tamā o i le lagi, ina ia taunuu le faaolataga mo i tatou.

GALUEGA FAATINO: Tusitusiga.

Faamatala mai i au lava upu pe faapefea ona e tapena mo se tauiviga po o se tausinioga i le tino, mafaufau ma le agaga. Ia le silia ma le tasi le laupepa (A4) le umi o lau tusitusiga.

PESE: 168 (Pese maViiga)

A’OA’OGA:

1. Faalagolago ma faamoemoe i le Atua e manumalo ai.
2. Aua le faamaualuga ona o se malosi ma se iloa ua maua.
3. Tapena ma sauna lelei i se faamoemoe taua.

.....

ASO SA: 19 ME 2024

MATAUPU: NA FAATASIA UMA LAVA
(All were together)

SINI: Ia malamalama le vasega, na faatasia le au soo ina ia toe faamalosia i latou mo le galuega faa-aposetolo.

TUSI GALUEGA: Galuega 1: 12 – 26

FESOASOANI MO FAIAOGA:

O le a se taua o le toe potopoto ai o aiga mo tapuaiga afiafi o aso taitasi? A o le a foi se taua o le potopoto ai o nuu mo ni a latou fonotaga? Ae a le ekalesia i le Aso Sa i tapuaiga fai? E i ai le talitonuga o faatasiga nei i aiga, e le gata o le viiga e ave i le Atua; ae toe ao manogi ai tagata o le aiga i se tuualalo a o se upu faamalosi a matua ma taitai o aiga aua tagata taitoatasi ma lana pito laau mo le lelei o le aiga. E toe saili ai foi po ua atoa le fuainumera o i latou e tataua ona i ai. E faapea foi i nuu ma alalafaga, aemaise le ekalesia po o le au kerisiano. E faalaulelei ai mea ua lauleaga ma avatu ai upu faamalosi, a o se faamafanafanaga e le gata i le soifua tautua mo le nuu, a o le auaunaga e faia mo le Atua ma lana Tala Lelei.

E faapea foi se mafuaaga i le faatasia ai o le ausoo e toasefulu ma le toatasi i Ierusalem ina ua o mai mai le mauga o Olive na tuu eseeeseina ai i latou ma Iesu ina ua afio ae i le lagi. O lea ua latou faatasia ai ma fafine atoa ai ma Maria le tina o Iesu ma ona uso. Ua latou finafinau i le tatalo ina ia faatumauina ai lo latou faamalolosi a o latou talia ai le faataunuuina ai o le fetalaiga a Iesu e ala i le afio ifo o le Agaga Paia ia te i latou.

O le faitau aofai o i latou sa i ai e toaselau ma le luasefulu na faalogologo ai i le upu a Peteru e uiga i le mea na faia e Iuta le Sekara. O le na fai ma ta'ita'i ia te i latou na pupu'e ia Iesu. O le na faitauina faatasi ma i latou i le tofi o le soo po o faiva faa-aposetolo ia Iesu. O se faataitaiga leaga mo e ua mulimuli ia Iesu. A o se faamanatu foi mo i latou i le iuga o le tagata le faamaoni i luma o le Atua ma lona valaauina mo le feau ma le galuega ua tofia i ai.

O le mea lava lea na faatauina ai e faitaulaga sili le fanua o Akeletama, o le fanua o le toto, aua o tupe na faatauina ai le faamaoni o Iuta na ia faalata ai le Alii. O le mea foi lea e le nofo ai se tasi ona o le totogi o le amio leaga na faia e Iuta na faatauina ai lenei fanua. O le faamalosi foi lea mo le o le a filifilia e sui tulaga ia Iuta, e pei ona faia ai le vili faatasi ma lo latou tatalo i le Atua e faasino mai mo i latou se e ao ona filifilia o i laua o Iosefa ma Matatia. O e sa latou faatasia ma molimau ia Iesu mai i le taimi o le papatisoga a Ioane seia oo mai i lona toe afio ae i le lagi. O lea na filifilia ai Matatia ina ua faasaga i ai le vili na faia, a ua manino lava lona tulai mai faatasi ma i latou uma o faatalitali i le afio ifo o le Agaga Paia; aua o le galuega lava e ao ona faia ma le faamaoni i le Alii.

O le ala foi lea e ao ai ona tatou faamaoni i le Atua ae aua nei o tatou faalataina o Ia; aua e le o se tu ma se aga lea o se tagata ua fai ma soo o le Tala Lelei ia Iesu Keriso lo tatou Alii Faaola.

GALUEGA FAATINO: Tusiga Solo

Tusi sau solo i le autu, “O a’u o le Soo o Iesu.” Ia le silia ma le tolu fuaiupu, e tai fa laina i le fuaiupu. Ia aofia ai se faamalosiau e pei ona taua i le tala sa faamatalaina.

PESE: 185 (Pese ma Viiga)

A’OA’OGA:

1. Ia fai i tatou ma soo o le Tala Lelei.
2. E taua lou faamaoni i le Atua.
3. Aua nei o tatou faalataina lo tatou Alii.

.....

ASO SA: 26 ME 2024

MATAUPU: **TITO: O SE ATALII FAAMAONI I LE FAATUATUAGA**
(Titus a loyal child in the Faith)

SINI: Ia malamalama le vasega, e taua lo tatou faamaoni i so o se valaauina ua tofia i ai i tatou.

TUSI FAITAU: Tito 1: 1 – 5

FESOASOANI MO FAIAOGA:

O so o se tagata lava ua valaauina e galue mo so o se faamoemoe po o se tofi i totonu o aiga, nuu, malo ma le ekalesia. E ao ona faamaoni i ona tiute fai, aua ua tuu atu i ai le faatuatuaga o le a ia faatinoina i le mea e gata ai le mafai, ina ia tino mai lona tulai mai i se tulaga lelei ma le atoatoa, aemaise lava pe a tofia se tasi e fai ma taitai. O ia lea o le a pau i ai le mamafa o mea uma, aua o ia lea na te faatulagaina mea uma mo le lelei o se faalapotopotoga. O ana faaiuga fai e lelei ai, o ana faaiuga foi e leaga ai ma malepelepe se faapotopotoga.

O le ala lea o le faaigoa ai e le tatou mataupu o le tagata lenei o Tito, o se atalii faamaoni i le faatuatuaga po o le Tala Lelei a Iesu Keriso. O Tito, o le tasi lenei o atalii faaleagaga a le aposetolo o Paulo sa latou galulue faatasi ma Timoteo i le galuega faa-aposetolo. E tau le iloga tele le igoa lenei o Tito, peitai o ana galuega lelei sa faia na tupu ai le faamafanafanaina o Paulo ona o tala ave o lana galuega.

O le tusi la lenei a le aposetolo o Paulo ia Tito, e faamalosiiau ai ia te ia ma faamanatu ai ia Tito le mafuaaga na ala ai ona ia tofia o ia e galue i le nuu o Kereta. Na te faatonuina mea o totoe, ma ia tofia toeaina i lea aai ma lea aai e fesoasoani i le tauaveina o le feau ma le galuega. O lea lava ua manino ai le tele o le

faatuatuaga a le aposetolo o Paulo ua tuuina atu ia Tito aua le tauaveina o le galuega. I le manatu o Paulo, e tataua ona matua filiga ma faamaoni Tito i tagata ina ia tupu le Tala Lelei ma le ekalesia i le taimi lea i lona tau amataina mai.

Tamaiti, e leai se eseese o taimi na galulue ai le au aposetolo i le lalolagi i lona vaiata ma le gasologa o le taimi nei. Sa tele talitonuga eseese, tele fefinuaaiga, peitai o le mea e tataua ona faamamafa; o le tagata ma lona soifua galue mo le Atua. E le na o faifeau e feagai ma le galuega, o tagata uma. E ao la ona tatou galulue ma le faamaoni, i lo tatou valaauina faatagata kerisiano. E tele foi isi mau valaauina eseese mo i tatou i totonu o aiga, nuu, o aoga, o fale faigaluega. E faatulaga lava e oe lou tagata i totonu o nei nofoaga ina ia pupula atu ai le malamalama o le Alii. Ia e faamaoni ai ina ia faia oe ma faataitaiga lelei mo isi ina ia mafai ona maua ai se suiga. Na faamaoni lava Iesu Keriso i lona valaauina ina ia taunuu le faaolataga mo le lalolagi, o lea ua ia nofo ai i le itu taumatau o le nofoalii o lona Tama i le lagi e fautua aim o i tatou ina ia tatou maua le ola ma saga maua atili ai lava.

GALUEGA FAATINO: Tusiga Pese

Tusi sau pese i le autu, “**AUAUNA FAAMAONI**” ia tau o le tasi le fuaiupu ma le tali.

PESE: 177 (Pese ma Viiga)

A’OA’OGA:

1. Ia faamaoni i lou valaauina.
2. Aua le faapalapala ma le faatamala.
3. Faamaoni i le Atua, ona faamaoni mai foi lea o le Atua ia i tatou i ona manuia.

.....

ASO SA: 2 IUNI 2024

MATAUPU: MAMĀ I TOTONU (*Inner Purity*)

SINI: Ia malamalama le vasega, e taua le loto mama aua e tupu mai ai mea lelei.

TUSI FAITAU: Mareko 7: 1 – 23

FESOASOANI MO FAIAOGA:

O soo se mea lava e palapala i le vaai, e leai se matagofie o i ai. E leai foi se isi e tosina i ai le vaai, pe manao i ai le loto ina ia fai mona. E manaomia se galuega e faia ai ina ia faamamaina ma tino mai i se matagofie e faaosofia ai le vaai, ae ao foi ona faatumauina pea i lea mama ina ia tumau lona matagofie.

E faapea foi i le tagata, aua e leai ni mea mama e tupu mai i le tagata loto palapala ma eleelea. E le mafai foi ona tupu mai le amio lelei i se tagata e le mama lona loto, ua na o le leaga lava aua e le lelei manatunatuga e faamaite mai i le loto.

O le anavatau lea mo le kerisiano o loo taumafai ai Iesu e faamatalatala i le motu o tagata ma lona ausoo ina ua fesiligia e le au faresaio ma le au tusiupu, e uiga i lona ausoo i le aai e aunoa ma le fafanoina o latou lima. O e latou mau, o uputuu ia mai e anamua e ao ona usitaia e so o se Iutaia. Peitai, na tali manino lava Iesu i ai, ua latou fa'aaogaina uputuu ia mai le amataga e faamalieina ai le mea o loo naunau i ai o latou loto; ae tuua poloaiga mai le Atua. A ua faigofie foi ona latou taofi mau i uputuu mai le amataga ma upu mai ia Mose, a ua faigata ona latou taofi mau i poloaiga a le Atua. O se faataitaiga lelei lava lea o le tagata e le mama lona loto, aua ua latou taumafai i se auala e faaleagaina ai le galuega a Iesu. O le ala lea o le fetalai o Iesu ma ta'ua ai faresaio ma tusiupu o tagata pepelo, e pei o upu a Isaia, "Ua vivii mai lenei nuu ia te au i o latou laugutu, a o loto ua taumamao ia te au."

O lea na fetalai ai loa i le motu o tagata ma ona soo, e leai se mea o lo o i fafo o le tagata e alu ane i totonu ia te ia e mafai ona leaga ai o ia; a o mea e sau mai totonu ia te ia, o mea ia e leaga ai le tagata. O lea foi na ia toe faamanino lava i lona ausoo ina ua latou toe fesiligia o Ia. O mea uma e alu atu i totonu o le tagata, e le alu lea i le loto, a o le manava ma toe sau ai i fafo i le maliuga. A o le mea e sau mai le loto, e leaga ai le tagata ona o manatu leaga, o le mulilua, o le faitaaga ma le tele o amio leaga e tupu mai ai.

O lona uiga, e ao lava ona faamama le loto o le tagata, aua e tupu mai ai le amio lelei, ma le matagofie e tatau ma le Tala Lelei a le Atua. O le ala lea e le mafai ai ona tupu mai ai le amio leaga i le ua mama lona loto. E faapea foi ona le mafai ona tupu mai o se amio lelei i le ua leaga lona loto.

O le feau lea mo i tatou le fanau, e ao ona faamama o tatou loto ina ia tupu mai le amio lelei ma mea matagofie e tatau ma le Tala Lelei ia Iesu Keriso lo tatou Faaola. Ia faatumauina foi le faamamaina o tatou loto ina ia tumau pea lo tatou matagofie i luma o le silafaga a le Atua, aua o Ia lava o le Atua e mama ma paia; e leai foi se leaga e tupu mai ia te Ia. Tatou te faia ai mea sili mo Ia ae le o mea leaga ma mea inosia aua tatou te oo ai i le faafanoga e faavavau.

GALUEGA FAATINO: Taliga Fesili

Tali mai fesili nei, i ni fuaiupu se 2 pe 3.

1. Toe faamanino mai lava i lou lava malamalamaaga le uiga o le fetalaiga a Iesu, o lo o i le fuaiupu e 15.
2. Aisea e ao ai ona tatou tumau i le loto mama
3. Faapefea ona faatumauina lo tatou loto mama?

PESE: 109 (Pese ma Viiga)

A’OA’OGA:

1. E tupu mai le amio lelei pe a tatou loto mama.
2. Ia fai le lelei ae le o le leaga.
3. Ia faia ma le mama la tatou tautua i le Atua.

.....

ASO SA: 09 IUNI 2024

MATAUPU: ALA O LE ATUA, ALA O LE TAGATA (*Ways of God, ways of man*)

SINI: Ia malamalama le vasega o lē savali i ala o le Atua, o le ui atu lava lea i ala i le manuia.

TUSI FAITAU: Mareko 8: 31 – 38

FESOASOANI MO LE FAIAOGA:

O lea lava fa’ato’ā mae’a lava le fafagaina e Iesu o le motu o tagata, aemaise le vavega na Ia faia e ala i le faapupulaina o le tauaso. Peita’i e le i talitonu lava tagata e ui i le matautia o mea na Ia faia, aemaise lava i le au faresaio. E atagia lena vaaiga ina ua fesili Iesu, i lona au so’o po o le a se molimau a tagata ia te Ia, po’o ai Ia? Ae sau le tali fai mai o oe o Elia, o oe o Ioane. A o le a la le tali a Peteru, fai mai Peteru “O oe o le Keriso”.

Lea na afua ai ona faamatala ai e Iesu i lona au soo, valoia lona maliu ma lona toetu pe a mavae aso e tolu. E pei ona i ai le fuaiupu e 31 – 33, o loo tautala ai le fai evagelia, o ala na o le Atua. O le ala lena na fofola e Keriso e tapena ai le faaolataga mo le lalolagi. O le fesili ae faapefea la ala o le tagata e pei ona i ai le manatu autu? E papa’u lava le vaai a le tagata, e pei foi ona i ai le masalosalo a Peteru. Le ala lena na faapea atu ai Iesu ia

Peteru “Ina alu ia i o’u tua Satani e! Auā e te le loto i mea a le Atua, a o mea a tagata”.

Silafia lelei e Iesu le masalosalo o le loto o Peteru, ai ua faapea Peteru i lona loto, e le tatau ona taunuu nei mea. O ala na a Satani e le loto i mea a le Atua, e le fiafia i mataupu ma ala e tatau mo le Atua. Ae na o mea a tagata, na o viiga e maua mai i tagata ma fiafiaga o le lalolagi, ae galo ai ona viia le Atua.

Lea lava ua fofola manino mai e Iesu ala o le Atua e pei ona i ai le manatu autu. O le tagata e fiafia e mulimuli i ala o le Atua, ia faafitia mea faafiafia o le lalolagi, ma ave e ia lona satauro. O le a le uiga o ia upu, o le faafitia o mea faafiafia? Ia faasatauro manaoga faa le lalolagi, ma mea faafiafia, ae ave atoa le ola mo le Atua.

O ala ia o le Atua, e tatau e le tagata ona ia savalia ma mulimuli i ai. Ioe, e le faigofie le mulimuli i ala o le Atua, lea ua manino le faitauga o lenei aso fai mai e lafoa’i mea uma lava, o mea ua fiafia i ai. Faasatauro manaoga ma fiafiaga o le tagata, ae amo le satauro ma mulimuli ia Iesu. O lo tatou ola, e pule ai le Atua. O le lalolagi nei ma le ola nei, e i ai le taimi e muta ai. O ala foi o le tagata, ala o le masalosalo, ala o le le mautonu pei ona i ai le tama o Peteru.

Peitai lea ua manino lava ala o le Atua e pei ona molimau ai le fai evagelia i le 34 – 38.

O le fesili la mo le tatou vasega i lenei taeao, e faapefea la ona faatumauina i taua i ala o le Atua? Ina ua faafitia e i tatou, tatou lava, ma amo a tatou satauro ma mulimuli atu ia te Ia. O le maliu ma le toetu manumalo o Keriso mai le oti ma le tuugamau, o le faailoga lava lea o lona alofa tunoa mo i tatou uma. Lea ua maua ai e i tatou le ala i le ola faavavau, pe afai tatou te salamo ma faatuatua moni ia te Ia.

GALUEGA FAATINO:

Faamatala uiga o fuaiupu o ta’ua i lalo:

Fuaiupu 34 – “Ai se fia mulimuli mai te au, ia faafiti o ia ia te ia, ma ave e ia lona satauro, i le mulimuli mai ai ia te au”

Fuaiupu 35 – “Aua ai se fia faasaogalemuina lona ola, e maumau ai ia te ia; a o le faamaumau lona ola ona o a’u ma le Tala Lelei, e faasaoina ia”

PESE: Pese ma Viiga (157)

A’OA’OGA:

1. Mulimuli i ala o le Atua e manuia ai
2. Ave lou ola ia aoga mo le Atua
3. Tapenaina ma saunia o tatou loto ma agaga e afio tumau ai Keriso.

.....

ASO SA: 16 IUNI 2024

MATAUPU: **IGOA, IGOA, IGOA**
(Names, names, names)

SINI: Ia malamalama le vasega, e tofu lava le tagata ia ma le taua o lona igoa

TUSI FAITAU: 1 Nofoaiga Tupu 1: 1 – 27

FESOASOANI MO LE FAIAOGA:

O le tusi o Nofoaiga Tupu, o loo faamatalatala mai ai le talaaga o le lalolagi, aemaise o le tala i le nuu o le Atua. E amata mai lava le amataga i le foafoaina o le lalolagi, seia oo ina pau Ierusalem i le seneturi lona fitu a o lumanai le fanau ai o le

Mesia (7th Century BC). Peitai lea lava e amata ai lava le faitauga o le Nofoaiga Tupu i le aumaia o igoa, i le Talafaasolopito o le nuu o le Atua. O lona uiga, e tele le taua o igoa.

E faapena, i la tatou aganuu ma agaifanua. E mafai ona faapea, o igoa e fai ma pine faamau o se nofoaga. Ae a faaigoaina i tatou e o tatou matua, e ese le taua o tatou igoa e fai ma faasinomaga i totonu o tatou aiga. E faapena foi la i le Tusi Paia ma lona Tala faasolopito mai lava i le amataga i le foafoaina e le Atua o le lalolagi, na faaigoa e le Atua mea uma lava o le foafoaga. E faapena foi la ina ua uma ona fai o le tagata, ona ia faaigoaina lea. O lona uiga, e taua tele o tatou igoa.

I le amataga o le tusi o 1 Nofoaiga Tupu, o loo amata mai lava i le gafa o Atamu seia oo mai ia Aperamo le uluai Eperu na valaauina e le Atua. E foliga mai o loo faataoto mai e le tusitala le tala faasolopito o le nuu o le Atua ma lona tupuaga. E amata mai lava ia Atamu ma Eva o uluai tagata o le lalolagi. Faasolo mai lava ina ua finagalo le Atua e tuuina mai le lolo e faamama ai le lalolagi ona ua tele le agasala, ma toe amata ai le isi lalolagi fou.

O le vaitaimi la lena o le tulai mai o le toeaina o Noa ma lana fanau, ma e i ai le talitonuga o tagata nei poo fanau a Noa o le tupuaga lea o le lalolagi. Aua a silasila foi le tusi o Nofoaiga Tupu, i le gafa sa faitauina e tolu vaega o loo vaevaeina ai. Fuaiupu e 5 – 7 o le gafa o Iafeta, fuaiupu 8 – 13 o le gafa o Hamo, ma le fuaiupu e 17 – 27 o le gafa o Semu. O gafa uma nei o loo faamauina i le Tusi o Kenese: 10, lea ua toe aumai e le tusi o 1 Nofoaiga Tupu sei faamatala ai le talaaga o le nuu o Israelu.

O le uiga o le igoa o Iafeta, o le matagofie ma toe faatoateleina (may he extend; beautiful). O le igoa Iafeta o se igoa Eperu, o lona uiga ina ia faatoateleina ai le lalolagi ina ua mae’a le lolo. O Hamo o le tupuga o tagata uli (black people), fai mai na nofo i le itu i Matu o Aferika, o le uiga o lona igoa o le vevela, mafanafana, ma le auauna (hot, warm, servant). O Semu, o le

tupuaga lea o tagata Asuria, tagata Moapi, o Amoni, Etoma, o le au Arapi ia faapea ma tagata Eperu. E tupuga mai ai Aperaamo na tofia e le Atua, e tau mai ai foi i le gafa o Iesu e pei ona faamauina e Luka 3: 36.

O le uiga o le igoa o Semu i le Eperu, igoa poo le ta'uta'ua (name and renown). O lona uiga o se igoa e sili atu i lo se isi lava igoa. E mafai ona feso'ota'i ma le upu Eperu o le (neshemah) o lona uiga o le manava. O le manava na manavaina ai le ola ma faauluolaina ai le lalolagi. A le igoa lena lea ua tau mai ia Aperaamo taunuu ai le folafolaga a le Atua, ou te faia oe ma nuu tele, o lau fanau e pei o fetu o le lagi ma oneone o le sami. Le igoa lena ua manavaina ma uluola ai le lalolagi seia o' lava ina ua afio mai Iesu i le Feagaiga Fou ma faaauau mai lava i le taimi nei. O igoa, igoa, igoa, na faamauina mo le talafaasolopito o le nuu o Isaraelu, ina ia manino ma malamalama ai le tagata i lona faasinomaga ma lona tupuaga.

Tatou vasega, e taua o tatou igoa na faaigoaina ai i tatou e o tatou matua. O pine faamau, e fai ma faailoga; a o igoa foi e faaauauina ai gafa ma sootaga i totonu o aiga. A o le fesili mo i tatou, o ai le igoa na afio mai e faaola ia te oe ma au? O le tali, o Iesu Keriso, o le igoa o le faaolataga mo le lalolagi agasala, lea ua maua ai e i tatou ola faavavau.

GALUEGA FAATINO: Fetufaa'iga

Tuu le avanoa i tamaiti, o le vasega e ta'u ai lona igoa ma faamatala le uiga o o latou igoa. Pe aisea ua faaigoa ai oe i lena igoa.

Faataitaiga: o lo'u igoa Faalefu, na faaigoa ai au e lo'u tama. O Faalefu o le igoa o lo'u great grand father. O Faalefu foi, o le igoa o le tulaga maota o le matou aiga i Aopo, o le maota o Faalefu.

PESE: J-E-S-U-S (fati: You Tube Sunday School songs for kids)

There is a name I love to sing and Jesus is the name O J E S U S

There is a name I love to sing and Jesus is the name O _ E S U S

There is a name I love to sing and Jesus is the name O __ S U S

There is a name I love to sing and Jesus is the name O ___ U S

There is a name I love to sing and Jesus is the name O ____ S

There is a name I love to sing and Jesus is the name O _____

And Jesus is the name O

A'OA'OGA:

1. E taua o tatou igoa na faaigoaina ai i tatou.
2. Faafetai i le Atua ona o lou igoa.
3. O Igoa o pine faamau ma faailoga ia o se nofoaga.

.....

ASO SA: 23 IUNI 2024

MATAUPU: TALI ATU I LE FAASAGATAU MAI
(Responding to hostility)

SINI: Ia malamalama le vasega, na manumalo Isaraelu i le latou taua ma Amoni ma Suria, auā o le fingoala lea o lo latou Atua.

TUSI FAITAU: 1 Nofoaiga Tupu 19: 1 – 15

FESOASOANI MO LE FAIAOGA:

Ina ua mavae le oti o Naasa le tupu o Amoni, ona auina atu ai lea e Tavita ana auauna e faamatalaloto (show kindness), faamafanafana po o le agalelei atu i le nuu o Amoni, ona o le maliu ai o le tupu o Naasa. Peitai, na ese foi le mafaufau o tagata o Amoni i le o’o atu o ave feau po o auauna a le tupu o Tavita. Fai mai le tuualalo a alii o le nuu o Amoni ia Amoni le tupu fou, “Fa te oe ea, ua ava mai Tavita i lou tama, ina ua aauina mai nisi e faamatalaloto ia te oe? Ua le o mai ea ana auauna ia te oe e iloilo, ma faaumatia, ma agaga i le nuu?”

O le ala lea na o latou pupue ai auauna a Tavita, ai o manatu o alii o le nuu o Amoni faapea le tupu o Anuni, e pepelo Tavita ma le mea ua ia faia. Lea na o latou tafi ai a latou ‘ava, ma sesele ese o latou ofu i totonu e pau atu i o latou nofoaga. O ni faiga faa le alofa, ma ni aga mataga lea na faia e tagata Amoni i auauna a Tavita. O le seleina o ‘ava ma le aveesea o ofu, o se ata vaaia lea o ni tagata pologa. O lona uiga, e sili atu i auauna a Tavita ona feoti ina ua leai ni a latou ava; ua faa foliga i latou o ni pologa i le vaai a tagata o Amoni. E le gata i lea, e pei o le laei lea i le itu i Sasa’e sa faatauaina e tagata Eperu, o le faatutupuina o le ‘ava. Peitai lea ua faaali i ai uiga faa le alofa o tagata Amoni. E o’o foi i le aveeseina o ofu o auauna, e pei o se mea ula i tagata Amoni, aemaise o le aganuu faa Eperu o le peritomeina. Lea sa o latou faia ai i auauna a Tavita, aua foi la o tagata nei, o tagata o nuu ese, o tagata e le i peritomeina.

Manino lava i le aumaiga o le tala, ua tapena le taua e Tavita ona o lona ita tele ia Amoni. Fuaiupu e 6 – 8, o le tu lava lea ma le aga i na ona po pe a o’o ina masii se taua, e alu le avea’i i isi nuu e ave ai tupe, o auro, ma ario mo se fesoasoani i le taimi o le taua. Aua foi la ua silafia lelei e Amoni e leai se faamoemoe ola mo i latou lava latou te mafai ai ona puipui i latou mai ia Isarelu, le ala lea ua latou aapa atu ai mo se fesoasoani..

Silafia lelei e Tavita, aua foi e au le Atua ma ia, lea na ia auina atu ai Ioapo ma ana ‘au malolosi e tau ma Amoni. O le agaga lea

o Tavita, e faamoemoe i lana au tau, aua a leai sana au tau, e vaivai foi o ia. E faapena foi i lana ‘au tau, e faamoemoe foi la latou pito laau i le faatonuga mai lo latou ta’ita’i. Fai mai le faamalosi ‘au a Ioapo i le fuaiupu e 13 “Ia e faamalosi, ma ia faamalolosi i tatou ona o lo tatou nuu, ma aai a lo tatou Atua; a ia faia e le Alii le mea e finagalo i ai o ia”.

E le i tuulafoaiina e le Atua, Tavita ma Ioapo ma Apisai ma le itu taua a Isaraelu. Fai mai le fuaiupu e 14 ma le 15 ona sosola ai lea o le au tau a Amoni ma Suria ai luma o Ioapo ma Apisai. Ioe e le i finagalo Tavita e faasaga tau atu ia Amoni, o le tali atu a Tavita ia Amoni aemaise o le maliu ai o le tupu Naasa, ina ia faamafanafana ia i latou. Peitai, o ala o le alofa ae faasaga mai e ala i le taua. O le fesili, o le a la le tali atu a Tavita ia Anuni ma le nuu o Amoni? Na matua’i fasia ma tulia e le ‘au tau a Isaraelu. O le tali atu lena a Tavita i le faasagatau mai o Anuni ma le nuu o Amoni ia te ia.

Uiga o Upu:

- i) Faamatalaloto – faamafanafana
- ii) Faaoloatauaina – totogi tupe, foai atu le tamaoiga

GALUEGA FAATINO: Taliga Fesili

1. O ai le tupu o Amoni le vaitaimi o loo tusia ai le tala?
Tali: Anuni
2. Aisea na o ai auauna a Tavita i Amoni?
Tali: Na auina e Tavita e faamafanafana i le nuu, ona o le maliu ai o le tupu o Naasa
3. O a faiga faa le alofa na faia e le tupu o Anuni i auauana a Tavita?
Tali: Fuaiupu 4

4. Na faapefea ona tali atu Tavita i le mea ua faia e Anuni i ana auauna na o ma le sāvali?

Tali: Na ia auina Ioapo ma ana au fitafita uma e tauina le taua ma Amoni

PESE: Pese ma Viiga (166)

A’OA’OGA:

1. E ‘au le Atua ma i tatou i taimi uma
2. ‘Aua e te faia se mea, i se tasi ou uso, e te le mana’o e fai atu e se isi ia te oe
3. E le o le malosi, a o le Agaga o le Atua e mafai ai mea uma.

.....

ASO SA: 30 IUNI 2024

MATAUPU: O LE A LE FILIFILIGA O LE A E FAIA? (*What choice will you make*)

SINI: Ia malamalama le vasega, o le tagata e filifili e fai le Atua ma ona tapasa, o le filifili lava lea i le manuia e faavavau

TUSI FAITAU: Teuteronomie 30: 11 – 20

FESOASOANI MO LE FAIAOGA:

E foliga mai o lea ua apoapoa’i Mose i le nuu o le Atua, a o i ai i latou i le itu i Sasa’e o le vai o Ioritana. O lea ua sauni o le a ulufale i le nuu na folafolaina ina ua mae’a le 40 tausaga o faataamilomilo i totonu o le vao. O le faataamilo ai o le nuu o Isarelu i totonu o le vao mo le 40 tausaga, o se filifiliga na faia

lava e Israelu ona o le le usiusitai. O se mea foi sa le tatau lava ona tupu ina ua latou maua le avanoa e tatau ai ona taunuu i le nuu folafolaina.

Peitai, silasila atu le Atua ua tulaga faaletonu lava lona nuu, le ala lea na ia faataamilo ai i totonu o le vao se ia a’oa’i lona nuu faigata. Lea la ua toe maua lo latou avanoa, faatasi ai ma le apoapoa’i a Mose, ina ia o latou faia o se filifiliga tatau, e tapenaina ai i latou e ulu atu i le nuu folafolaina.

O le vaega o le tusi lea na faitauina, o le faamalosi lea a Mose mo lona nuu o Israelu. O le faamanatu foi a Mose mo auga tupulaga e le i feola i totonu o Aikupito i le ola pologa, a ia tapenaina i latou e filifili mo le Atua e ulufale atu ai i Kanana. Fuaiupu 11 – 14 o lo o talanoa ai i poloaiga ma le valaau a le Atua mo le ola o le tagata. Ioe o le Atua e latalata mai i le tagata, pe afai e iloa e le tagata ona fai o mea e tusa ma lona finagalo Fuaiupu 15 – 16, e mafai ona taoto ai le manatu autu o lenei aso, o le a le filifiliga o le a e faia? Ioe, o le filifiliga e tatau ona fai mo le nuu o Israelu, e tatau ona savavali ma mulimuli i ala o le Atua e pei ona a’oa’oina ai. Ia alofa i le Atua ma tausii ana poloaiga, ona faapaleina lea i faamanuiaga e tele e pei ona poloa’i mai ai o Ia.

Fuaiupu 17 – 20, o le taua o le faalogo ma usitai e manuia lea; a o lē liliu ese mai fofoga o le Atua, e i’u lea i le malaia. O lo o faamamafa mai i le vaega lenei o le faitauga, le ola tapuai o tagata Israelu. Ioe, o le ulu atu i le nuu folafolaina e tele le mau atua ese e ono liliu ai mafaufau o le nuu o le Atua. Peitai lea ua faamalosi Mose, fai mai le fuaiupu e 19 “Ou te valaau i le lagi ma le lalolagi i le aso nei e fai ma molimau ia te outou, ua ou tuuina atu i ou luma o le ola ma oti, o le manuia ma le malaia; o lenei, ia e filifili i le ola, ina ia ola ai oe atoa ma lau fanau”

O lona uiga, o le tagata e filifili i le Atua, e tau mate lava lona tali, ae pale i manuia o le Atua. Afai o lea e fai mai le manatu autu, o le a le filifiliga o le a e faia? O le tali, o le filifiliga e tatau ona fai, ia alofa atu i le Alii lou Atua, ma lou loto atoa, ma lou agaga atoa. Aua o le ola e mai le Atua ia, o lona uiga o le ola

e filifili e ave mo le Atua e ala lea i lau tapuaiga, ona faafualoa ai lea o aso o le soifua ma le ola.

Tamaiti, e taua lau filifiliga tataou, e te filifili ai i ala o le Atua. E ala i lau auaunaga i so'o se itu. Ma lou ola ofoina mo le Atua, mulimuli ma usitai i poloaiga e pei ona a'oa'o mai ai Keriso ia i tatou. Fai mai le tulafono e 5 "Ia e ava i lou tamā ma lou tinā ina ia faalevaleva ai ou aso i le nuu o le a foa'iina mai e le Alii lou Atua ia te oe". O Iesu Keriso na filifili i le satauro ina ia faaolaina le lalolagi agasala, ona o lona alofa mo i tatou uma.

GALUEGA FAATINO: Faatalatalanoaga.

Faataitaiga: Sa valaaulia e lau uo o Sione oe e te lua o i le tifaga, peita'i e valaau atu Sione, ua i ai le mea e te lua o ai ma Simi. O le fesili, o le a lau filifiliga (choice) e tataou ona fai? O le a le taunuuga (consequence)? O le fea la itu e te aga'i i ai (what would you choose)?

PESE: Ua ou filifili e mulimuli ia Iesu

A'OA'OGA:

1. Filifili i le manuia ae le o le malaia
2. Ia filifili faatasi ma le Atua
3. Ia e ava i lou tamā ma lou tinā ina ia faalevaleva ai ou aso i le nuu o le foaiina mai e le Alii lou Atua ia te oe.

.....

ASO SA: 07 IULAI 2024

MATAUPU: SUIGA LELEI MO FALEPUIPUI
(Prison reform)

SINI: Ia malamalama le vasega, o suiga lelei po o suiga fou e alia'e mai le falepuipui, o suiga e amatamea ai le Atua.

TUSI FAITAU: 2 Nofoaiga Tupu 16: 7 – 10

FESOASOANI MO FAIAOGA:

O le faamoemoe a ia ma le manulauti o le falepuipui, e tuuina i ai tagata ua solia tulafono faavae e lima taitaiina ai se faalapotopotoga. I le manatu ma se lagona, ia mafai e faasalaga o lo o ua mae'a faataoto e le pulega ma le matagaluega o so o se falepuipui, ona toe faafo'i ma toe faatulaga le tagata i le mea tonu ma le mea sa'o e tataou ona savali ai. O lona uiga, o le falepuipui lava ia, o se nofoaga e mo tagata soli tulafono, tagata amio leaga, e tuli ai le faasalaga ina ia salamō ma a'oa'oina ai le mafaufau, loto ma le agaga.

Peitai o le molimau a le tusitala aemaise o le faagasologa o le tala sa faitauina. E peiseai e foliga mai o lo o feteenai ai ii le uiga loloto ma le faamoemoe o le falepuipui, ma le mataupu ua tulai mai i le va o Hanani ma le tupu o sa Iuta.

A silasila i le tala, o le mea moni ma le amiotonu o lo o alu atu ma Hanani. O le afuaga o le manumalo ma le tala o le faeaina. Auā e le salā lava le mau faa-Feagaiga Tuai, o le usitai ma faia le finagalo o le Atua o le tagata manuia lena, a o le faatu'iese, o i talofa ia te ia.

O lo o manino lava le feau tau molimoli o lo o alu ma Hanani, "o le faalagolago i le Atua ma le loto atoa, faatasi ma le amio ia sao ona faatino, o ataata na o le manumalo." "Ao le tagata e faalagolago i mea o le ola nei e maua ai sona toomaga ma sona manuia, talofa e, ia te ia."

Le feau lea o lea na alu ma Hanani ia Asa le tupu o Iuta, ina ua mautinoa e Hanani ua faalagolago Asa i le tupu o Suria ae faagalalo le Atua. Peitai ane, ua le o faatasi le taumafai atu o Hanani ma le finagalo o le tupu o sa Iuta. Le naunau atu o

Hanani e faailoa ia Asa le mea moni e ao ona mulimulita'i i ai, ae ua avea ma ala ua tuuina ai o ia i le falepuipui.

A o se tala ese lenei o se falepuipui ma le ituaiga tagata ua tuuina i ai. O le tagata e leai sana sala po o sona faaletonu, ae ua tuuina e fai ma pagota. O se tagata sa molimau mo le laveaiina o se soifua o se isi mai le puapuaga, ae ua faa-falepuipuiina ai.

Le fanau e, o se faamanatu foi lea mo i tatou, o le mea na faia e Hanani o se fautuaga ua tataua ma tala feagai. I le faamoemoe e laveaiina Asa mai le malaia tele, pe a fa'auau pea ona faalagolago i se isi malosi e ese mai le Atua. E ui lava ina ua molimau atu ma se nau alofa atu, ae talitua limaina, ae lei popole lava i ai Hanani. Silafia lelei e Hanani, o loo soifua le Atua e na te tapenaina isi auala lelei mo ia.

O le mea foi lea ia manatua e tatou le fanau, e le oge auala le Atua, po o a lava foi taumafaiga a le fili e osofai'a lo tatou ola ma faasese ia i tatou, 'aua tatou te vaivai ai, e tapena e le Atua isi auala e sili atu mo i tatou, pe afai e tumau lo tatou faalagolago atu ia te Ia.

GALUEGA FAATINO: Tusiga Solo

Tusi sau solo i le autu ua tuuina atu. Faamolemole lau susuga le faiaoga e tapena ane e oe ni A4 mo tusiga solo a le fanau.

“Suiga Fou”

PESE: Pese 368 (Pese ma Viiga)

A'OA'OGA:

1. O suiga lelei e afua mai le Atua
2. 'Aua le faavaivai pe a feagai ma faafitauli o le ola.
3. Faalagolago i le Atua i taimi uma.

.....

ASO SA: 14 IULAI 2024

MATAUPU: **MANUMALO I LE SAMI 'ULA'ULA**
(*Victory at the Red Sea*)

SINI: Ia malamalama tamaiti, a taunuu manuia se faamoemoe, ia iloa ona faafoi le viiga ma le faafetai i le Atua.

TUSI FAITAU: Esoto 15

FESOASOANI MO FAIAOGA:

Ua tatou masani i tu ma aga a le tagata manumalo ia po o le tagata ua faaeaina. O le taimi e pese leo tele ai ma le agaga fiafia ma le agaga vivii a'e i le Atua faatasi ma ona loimata ua le mātu i le tagi. Ae mafua i se a?

E mafua ona ua taunuu manuia se faamoemoe sa feagai ma ia. Afai foi ae tomanatu i le tuanai ma le tau asaina mai o le vao filifili, e le faigofie a o lenei ua 'ae'ae i manū ona o le alofa o le Atua.

E faapena se lagona na faamaite e le perofeta fafine o Miriama le tuafafine o Arona. Ua ia ave le topa i lona lima faatasi ma isi fafine uma o Isaraelu, ua latou ta ma pepese ma sisiva i luma o le Atua. I le mafaufauga o le Atua na Ia taitaiina mai i latou i le isi itu o le sami ulaula. O lea ua tutu i le matafaga o le sami ulaula ma vaavaai atu i le felafuaiina e peau o le sami o tino oti o le au tau a Aikupito, o e na tuliloa ia te i latou ina ia o latou fasiotia.

A o le fesili la, O le a le tala o lea e faamatala e le tagata Isaraelu i upu o lana pese o lo o usuina?

Ioe, a lea e tali lava e le tusi sa faitauina. O le tala i le faaolataga na faia e le Atua mo Isaraelu. Aua o le mataupu lenei e 15 o le tusi a Esoto, o le tali lea a le tagata ua na iloa ma ua na molimauina le maoae ma le silisili ese o le Atua. A lea fai mai le

tala, e tutu Isaraelu i le matafaga o le sami ulaula ma vaavaai atu i gatai. O se vaaiga uiga ese le matautia na vaai i ai, o fitafita, o solofanua ma kariota, o le autau atoa a Farao lea o lo o opeaoepea i le sami.

Ae a fesili, Aisea? O le iuga o le tagata loto maaa ma le faamaualuga, o le iuga o le tagata faausausili ma le fia malosii i le Atua. Ioe, afai tatou te faitau i le mataupu e sefulu fa o le tusi lava lenei a Esoto, ona tatou iloa lea, e matautia le faalavelave semanu e oo i le nuu. A lea fai mai le tala, ua oo mai le solaaga i le sami ulaula, ua leiloa e le nuu po o fea a o i ai, vaai atu i tua, ua latalatala mai Farao ma le autau a Aikupito, vaai atu i luma, o le moana sausau. O le a le mea ua fai, tagi loa ma faasea. Aisea? O le otiga tagata le mea lea ua vaai i ai. Peitai, na faasalavei le Atua i le va lea ma ia faia le vavega. O le a lea vavega? Savali le Eperu i le ilititai matutu o le sami ulaula, ae sau le Aikupito, gotouga ifo i le moana sausau.

O le ala lea o le pese o le Isaraelu, o le pese faafetai, o le pese vivii, o le pese o lo o faailoa ai le agaga ua tumu i le faagaetia aua ua silisili ese le alofa o le Atua i le tagata. Pese ona o le faaolataga. “Ou te pese i le Alii aua ua matua manumalo o Ia; o le solofanua atoa ma le na tietie ai, ua Ia lafoina i le sami. O le Alii, o lo’u malosii ia, ma la’u pese, ua fai foi o Ia mo’u olataga; o lo’u Atua lenei, ou te faaneenei i ai; o le Atua o lo’u Tamā, ou te vivii lava ia te Ia. O le Alii o le toa lava Ia, o le Alii o lona suafa lea.”

O le pese o le loto ua taumasuasua i le olioli loloto, atoa ai la ma le tautinoga o le faatuatua ua faia e le Isaraelu ina ua na iloa mautiloa, ana le seanoa le Atua, ma le pule mai luga, e le iu i se manuia lo latou faamoemoe. Ioe, ua lagona e le tagata lona faatauvaa, ua ia iloa foi lona gaogaonii ma lona le atoatoa ina ua faafesagai ma le paia silisili ese o le Atua.

Le fanau e o le faamanatu foi lea mo i tatou. Ia o tatou manatua ona faafoi le loto faafetai ma faaneetaga i le Atua pe a mae’a se faamoemoe. O le talitonuga lava ia o le tagata Kerisiano, o le Atua lava le faapogai o manuia uma. O Ia foi e tu i matagi ‘olo o

la tatou folauga faalefaatuatua. Ia ‘aua foi gei galo, a mae’a fuafuaga ma a’oa’oga o le aso, ia faafoi lava le faafetai i le Atua, auā o Ia ua afua ai ona a’e manuia faiva o lea aso ma lea aso.

GALUEGA FAATINO: Tusiga Pese

Tusi ma fatu sau pese mai i lou lava siosiomaga, e faailoa ai lou agaga faafetai i le Atua ona o lona alofa.

PESE: Pese 139

A’OA’OGA:

1. Ia iloa ona faafoi le viiga i le Atua, pe a mae’a ma tau manuia se faamoemoe.
2. O le pese e faailoaina lagona o le loto.
3. ‘Aua nei galo lo’u Atua.

.....

ASO SA: 21 IULAI 2024

MATAUPU: E LE FAAGALOINA (*Not forgotten*)

SINI: Ia malamalama tamaiti e ao ina manatua pea lē sa agalelei atu ia te oe i le taimi sa e manaomia ai se fesoasoani.

TUSI FAITAU: Filipi 1: 1 – 11

FESOASOANI MO FAIAOGA:

Ua iloga ma ua tumatie Samoa i le Pasefika ma le lalolagi atoa, i lana tu ma lana agaifanua. O se aganuu e malu ma puipuia ai le va feagai o le isi i le tasi. A o se aganuu foi e faavae i le alofa

ma le agafesootai, e afua ai foi ona malu sootaga. Sootaga o matua i fanau ma fanau i matua; le tuagane i le tuafafine, le tuafafine i le tuagane. Aemaise ai o le sootaga faakerisiano. O le sootaga o le tagata i le Atua, e afua ai ona faatino galuega uma, ma matau i le Atua. E mafua ona alofa i le uso a tagata, ona o le alofa na faamaite e le Atua i le loto. Le alofa lena e lagona ai le mafanafana o sootaga, e afua ai ona loto fesoasoani. Fesoasoani ina ua moni le alofa i le uso puapuagatia.

E tai foliga faapena se lagona na tusi ai le Aposetolo o Paulo i tagata Filipi ao faa-falepuipuiina i Roma. I le manatu maualuga o Paulo, e le gata ina seia faafetai lo latou agalelei ma lo latou alolofa ua pai tumutumu mo ia, a o se avanoa sei toe faamanatu ai ia Filipi, lo latou faatuatua ma lo latou ola talitonu i le Atua ia faamausaliina. O faigata ma faafitauli o lo o feagai pea ma le au kerisiano, pei foi ona feagai ma ia i le falepuipui, e le faavaivai ai, ae peitai ua faatuputeleina ai lona malosi ona ua ia mautinoa o lo o auai faatasi ma le Atua.

Manatu Paulo, o le olioli o se meaalofo mai le Atua e tupu mai puapuaga. E aiga le puapuaga ma le olioli. O puapuaga o Paulo i le falepuipui, o le faateleina foi lea o lona olioli. Fai mai lana mau: “Afai e faamaligiina lou toto i luga o le taulaga ma le galuega...ou te olioli ai, tatou te olioli faatasi foi ma outou uma lava.” E pei e foliga mai i le mau a Paulo, so o se mea e tupu ai ni puapuaga ma avevaleina ai le auauna a le Atua, e mafai ona faatuputeleina ai le Tala Lelei.

E peiseai e foliga mai i upu ia o le tusi a le Aposetolo, o lo o ua matuai naunau lava ma le alofa ina ia faatumauina le ola ma le savavali o tagata Filipi i ala o Iesu Keriso e pei ona ia faailoaina atu. E ui lava la ina ua faa-falepuipuiina i Roma, ae le o galo lava ia Paulo le soifua ma le ola faatuatua o tagata kerisiano o Filipi, ina ia tafa tasi pea i le Atua.

O se faamanatu foi lea mo i tatou le fanau. Ia ‘aua nei galo ia i tatou se galuega lelei na faia e se isi ia i tatou. Ia tatou amanaia pea lo latou agalelei mai, ma ia faapena foi ona tatou ofoina atu i nisi tagata, faapei ona faia e nei tagata ia i tatou. I le ma lenei, ia

‘aua foi nei galo ia i tatou, le alofa laveai o le Atua, na faasaoina ai tatou mai le amo o le agasala.

GALUEGA FAATINO: Taliga Fesili

1. O le a le galuega na faia e tagata Filipi ia Paulo?
Tali: Na latou ofoina tupe ma meaalofo mo ia ao faa-falepuipuiina.
2. Aisea na le galo ai ia Paulo Filipi?
Tali: Ona o lo latou alolofa ia te ia i mea na mativa ai o i le falepuipui.
3. O le a se feau o ta’ua i le tusi a le Aposetolo?
Tali: O le agaga faafetai e faafoi e tauia ai le agagalelei atu.

PESE: Pese 82 (Pese ma Viiga)

A’OA’OGA:

1. ‘Aua nei galo le sa agalelei atu ia te oe.
2. Ia tauia le alofa i le alofa.
3. Loto fesoasoani.

.....

ASO SA: 28 IULAI 2024

MATAUPU: TASI LAVA LE MALO
(*Only one kingdom*)

SINI: Ia malamalama tamaiti, o le malo o le Atua e tumau e oo i le faavavau.

TUSI FAITAU: Nauma 1:1 – 11

FESOASOANI MO FAIAOGA:

A faamatala le malo, e aofia ai tagata ma le ituaiga siosiomaga o loo ola ma soifua ai.

Faataitaiga: A faamatala le malo o Samoa. O se malo e faavae i le Atua. A o se atunuu foi e mapo lana aganuu ma lana agaifanua. E lima taitaiina e le pulega mamalu a Alii ma Faipule. O ona tagata nuu, o ni tagata kerisiano. O tagata e talitonu ma faatuatua i le Atua soifua.

Ae a faamatala le malo o le Atua, o le malo e tumau e oo i le faavavau. O le malo na tapu aaina ma foafoaina e le mana silisili ese o le Atua, o mea uma foi o loo tumu ai, na foafoainaina lava i lona lelei ma lona atoatoa. E le mafai foi ona sao atu i ai ni tu ma ni aga eleelea ma le lē faapaiaina i le malo o le Atua.

O lona uiga, e mo le aso o le Alii. E faamasinoina ai ma tuu mavaevae ai mea mama ma le malie, ese mai mea eleelea ma le palapala e le sao atu i le malo o le Atua. Ae faaumatia ma faafanoina e faavavau.

Atonu e tai foliga faapea le finagalo o le Atua e pei ona tau faailo mai e Nauma. O le Atua lava ia o le Atua e fuā. O le Atua e alofa i le tausi mea o lana foafoaga. Peitai e le avaea lea ma avanoa e ‘alofaga ia i le tagata mai lana mea sese.

O Nauma o le isi lea perofeta ei le lio o perofeta laiti. O lana feau tupito o le faailoa lea o le faamasinoga a le Atua ia Asuria, ao le faamafanafanaga sili mo lona nuu o Sa Iuta. O lo o manino lava ma tuusao le feau, e ia i le taimi e oo mai ai le toasa o le Atua i le tagata agasala, o se fuafuaga e aaoaina ai le tagata ina ia iloa ona toe saga tonu le faamoemoe i le Atua. O le mea manino lava pei foi ona molimau ai Nauma, e leai se isi e mafai ona ia masuesueina le finagalo fai toatasi o le Atua. E le auga foi le tagata agasala ma le Atua soifua.

O le tagata e na te teena le Atua ma le talitonu i ai. E nofosala o ia ma faafanoina, a o le tagata e alofa i le Atua ma faia le finagalo o le Atua, e luga ia te ia le faamalumaluga alofa a le

Atua. Aua o Ia e pule aoao i mea uma lava. Le pule aoao lea a le Atua na ia fa’aaogaina ai le foafoaga e momoli mai ai le feau mo le tagata e fiafia i le agasala, ma le ituaiga tafi e tafia ese ai.

Fai mai Nauma, e i ai le Atua i le asiosio ma le afa, o ona aao o le ao o le efuefu. E na te aoa’iina i le sami, ma faamateina ai, na te faamamateina foi vaitafe uma. Ma e mamae Vasana ma Karamelu, e mamae foi fuga o Lepapanona. E na te faagateteina mauga ma liu suavai.

O ia mea uma ua talatala pipi e Nauma, o le fa’aaliga o le mamalu ma le silisili ese o le malo o le Atua i le lalolagi, e na te pule malo uma. Ua le gata la o se lapataiga ma se timaiga mo Nineva ao se upu faamafanafana foi mo le nuu o le Atua.

O le uiga o le igoa Nauma o le “Faamafanafanaga / Comforted”. O le faamafanafana mo le nuu o Sa Iuta. Le faamafanafanaga lea o lea e tautino ai Nauma fai mai, “O loo agalelei le Alii, o le ‘olo ia i le aso o le puapuaga; o loo silafia e ia e o faatuatua ia te ia.”

Le fanau e, o le faamanatu pea lea mo i tatou. E tasi lava le malo e sili i malo uma. O le malo e i ai le pule aoao a le Atua, e i ai le faamalumaluga a le Atua ma lana faamafanafanaga sili. O le malo e le agavaa i ai faiga le talafeagai ma le ola femoumoua’i o le tagata. A vaavaai foi i le tele o suiga ma le feilafi mai o faiga faafiafia o lenei vaitau. Ua tele le soifua ua maumau ai. Ua tele le tupulaga ua tafili saunoa ai le alii o le lalolagi. A o faiga ia o lo o taumafai ai le malo o lo o pulea e satani ma ana a’u. E ao ai ia i tatou le fanau ona faaeteete ma matau toto’a le gasologa o lenei ola. Ina ia iu ane le tausinioga, ao tatou auai faatasi ma le Atua i lona malo e faavavau.

GALUEGA FAATINO: Tusiga Solo

Tusi sau solo e faatatau i la tatou ulutala o lenei taeao.
“Tasi lava le malo”

PESE: Pese 259 (Pese ma Viiga)

A’OA’OGA:

1. E le finagalo le Atua ia ola le tagata i le agasala
2. Ia amio i amioga e tatau ma le malo o le Atua.
3. Ia matau mea uma i le Atua.

.....

ASO SA: 04 AUKUSO 2024

MATAUPU: FIAFIA ONA O ESEESEGA
(Delight in diversity)

SINI: Ia malamalama le vasega o le Atua na faia mea uma lava e tofu fo’i ma lona eseeseega ina ia ola fiafia le tagata ma manuia i mea uma.

TUSI FAITAU: Kenese 1:9 – 13

FESOASOANI MO FAIAOGA:

E faatalofa atu i le tatou vasega i lenei taeao fou. Ua tuvae la tatou savaliga i le Aso Sa muamua o lenei masina, Faamalo ia te outou le fanau le faamalolosi mai, ae sili ona viia lo tatou Atua ona o lana pui-puiga ia te i tatou uma. O lea lava o lo o tatou molimauina le faamaoni o le Atua e ala i lana foafoaga o lo o ua tatou fiafia ma manuia ai.

O le autu o lenei aso Sa, “Fiafia ona e eseeseega”. O le tala sa faitauina o lo o faamatalaina ai le foafoaina e le Atua o le lalolagi i le amataga e tusa ma le molimau a Kenese. Ua faaigoa le eleele matutu o le eleele ae ua faaigoa le faapotopotoga o vai o le sami. Fai mai ua silasila atu le Atua ua lelei. O le taeao ma le afiafi o le aso tolu lea. A fua i le manatu autu o lo o ta’ua ai

eseeseega, e foliga o le eseeseega o lo o aga’i i le tuumatamaga e le Atua o le eleele ma le sami. Ua le fesopoa’i ia vaega tetele e lua o le foafoaga, ae o le eseeseega ua tapena e le Atua ina ia ola fiafia lana tagata na fai. Ua ola laau uma o le vao, ua ta’itasi foi ma ona fua ma o latou uiga, ua felanulanua’i fo’i ma ua lasi mo le filifiliga sa’oloto a le tagata. Ae o le faamoemoe lea o le foafoaga a le Atua, ia felanulanua’i, ia aua nei tagatasi, ae ia i ai sona eseeseega ina ia maua e le tagata le fiafia. O le faailoga o le Atua o le Ola na te faamaite le ola i mea uma lava, na te faia fo’i suiga tetele, ina ia ola lana tagata i se siosiomaga felanulanua’i ma le matagofie. E mafai e ia eseeseega ona faamatala le matagofie o le Atua ma lona soifua fesoota’i mai i le tagata.

Ia fiafia i eseeseega, o se fafagu taua mo i tatou uma, e le faapea o le eseeseega o ni suiga le lelei e pa’u ai i le agasala le tagata ae o le fiafia i eseeseega o lo o faataua, ia soifua galue, ia sogasoga e faatino nisi galuega lelei e maua mai i isi galuega lelei. Ia e fiafia e te soifua i se siosiomaga felanulanua’i. O le tapenaina e le Atua o lana foafoaga ua tele ona eseeseega, e le tutusa manuia o le sami ma le eleele o tofu fo’i lana ma lona uiga, ma o se tapenanaga ua lelei ma atoatoa aua e mafai ona faamatalaina le eseeseega o lo o i le manatu autu o le tamaoaiga. Ua tamaoaiga le eleele i tapenaga eseese a le Atua ina ia ola fiafia le tagata na ia faia.

GALUEGA FAATINO: Faasoia manatu

Ia faasoia le vasega e uiga i le mataupu. Fiafia i eseeseega, ia faasoia le vasega e uiga i le eleele ma lona tamaoaiga e pei ona tapenaina e le Atua.

PESE: Pese ma Viiga 370

A’OA’OGA:

1. E pule aoao le Atua

2. E faia e le Atua mea silisili mo lana tagata.

.....

ASO SA: 11 AUKUSO 2024

MATAUPU: LAVA MO TAGATA UMA
(Enough for everyone)

SINI: Ia malamalama le vasega o le Atua ma lona alofa ua lava ma totoe mo tagata uma.

TUSI FAITAU: Kenese 26:17 – 22

FESOASOANI MO FAIAOGA:

Lava mo tagata uma, e foliga i le manatu autu o lenei taeao o lo o aumai o se feau alofa ae o se tapenaga ua lava ma totoe ua aofia ai tagata uma. A oo ina feagai Samoa ma ana taligamalo, tasi ia o ala e ta'uleagaina ai se faamoemoe e fai, o le lava o tapenaga aemaise lava la ina ua taape e le'i maua se taumafataga. E mautinoa e fai tala, toatele ae le lava tapenaga, sa sili lava ona tuu 'aia le faia. O lona uiga e taua tapenaga, ia tapena i le mafai e mafai ai.

E foliga e faapena le uiga o le manatu autu, "lava mo tagata uma" fai mai le tala o le vaiata o le oge o le nuu o Isaraelu ua tuana'i taimi o le toaina o Aperaamo. Peita'i e ui na tuana'i ma ua mavae ese atu Aperaamo, ae o lo o taoto ana galuega na tapena mo le manuia o lona nuu aemaise lava le itu tau le suavai pea oo taimi o le oge. O vaieli o galuega e foliga o ni ana sa suaina mo le faamoemoe ia mafai ona faaputuina ai se suavai. O ia galuega lelei sa tanumia e Filisitia i le taimi o taua. O lea la ua tula'i mai Isaako ua ia toe lalaga ma toe sua vaieli ina fa'aaogaina mo tagata Isaraelu. Peita'i o le toe suaina o vaieli o

lea fo'i ua tupu ai le finauga i le va o tagata Isaraelu ma Filisitia, ae ui i ia fevaevaeaina, e le'i faavaivai ai Isaako ma ana auauna e tapena isi vaieli sa eliina e lona tamā mo le faamoemoe ia manuia lona nuu o Isaraelu.

O le fa'auau o le toe suaina i luga o ia vai, o le avanoa fo'i ua tatala e le Atua e manuia ai fo'i ma tagata Filisitia, aua ua lava le suavai mo tagata uma, ae o le fa'aalia lava lea o le alofa faasoa o le Atua mo tagata uma na ia faia. O le isi vaega taua e faamanatu pea ia te i tatou e ui ua mavae tua'ā, ae o lo o mafai ona olaola pea a latou galuega lelei, o lo o mafai ona tatou fa'aaogaina ma o tatou manuia ai fo'i i o tatou taimi.

GALUEGA FAATINO: Tusitusiga

Ia tusi sau faamatalaga, e 5 fuaiupu e faamatala ai le sao taua o matua o ou matua ma a latou galuega na fai o lo o mai i le taimi lenei o lo o tatou fa'aaogaina ma manuia ai.

PESE: 184 (Pese ma Viiga)

A'OA'OGA:

1. O le Atua o le alofa lava ia
2. Aua nei galo le sao taua o matua
3. O le agalelei o le Atua ua lava mo tagata uma.

.....

ASO SA: 18 AOKUSO 2024

MATAUPU: UA TU'UA E ATAMU MA EVA O ETENA
(Adam and Eve leave Eden)

SINI: Ia malamalama le vasega o le taunuuga o le tagata ola lē usita'i i le Atua, o le

tuliese i se isi nofoaga e galue ai, aua ua agasala.

TUSI FAITAU: Kenese 3:22-24

FESOASOANI MO FAIAOGA:

O le mataupu o lenei aso Sa, o loo fa'amamafaina ai le tu'ua poo le o ese o Atamu ma Eva mai Etena. O Atamu ma Eva, o ulua'i tagata na faia e le Atua i le amataga, e tusa ma le tala o le foafoaga. Ona tu'u lea i le fa'ato'aga i Etena, e nonofo ai ma ola ai. O le faamoemoe lava o le Atua, ina ia avea ma tausi mea (dominion)(*The concept of "dominion" signifies a responsibility to care for and steward the Earth and its inhabitants with wisdom, compassion, and a sense of moral obligation. It does not imply unbridled exploitation but rather a role of custodianship and stewardship over the natural world*).

O lona uiga i se vaaiga faigofie, o Etena, o le faasinomaga na saunia ma tapenaina e le Atua mo Atamu ma Eva. O le tofi mo le tagata mai le Atua. E moomia ai le apelepele ma le tausi lelei, ina ia faatumauiina ai pea le tamāoaiga ma le uluola o mea uma o loo ola a'e ai.

Pagā lea, ua lē o gatasi le finagalo o le Atua, ma le lē usita'i o le tagata. Ua lē savavali Atamu ma Eva i tu'utu'uga ma tulafono na tapui ai le va nonofo ma le Atua i Etena. Ua kolosi le laina sa fai ma malosiaga e va ai le malosi o le tagata, ma le pule a le Atua.

O le i'uga, o le aveese mai le Etena matagofie na saunia e le Atua, ae tuuina i le laueleele na faia mai ai o ia. O le laueleele se'iloga e galuea'ina ona fa'ato'ā maua lea. E ese mai le Etena na tapena e le Atua, e totō ma fa'atupu e le Atua. O le tau'i lea o le tagata lē usita'i ma lē faalogo. A talatala le fa'auigaina o le tuli ese mai Etena o Atamu ma Eva, o le tuli ese mai lava lea mai le manuia i le malaia. O le aveesea mai foi lea mai le lelei i le leaga, poo le aveese mai le filemu, i le pologa ma le saisaitia.

Peita'i, i totonu lava o puapuaga ma faigata ua tuuina i le tagata, o loo i ai lava le alofa lavea'i o le Atua. Le alofa o le Atua e ui ua tu'ua e Atamu ma Eva o Etena, ina ua tuli ese mai i lana lava Pule, a ua uma ona Ia saunia lavalava e pei o ofu pa'u, ma fa'aofuina ai i la'ua. O lona faasinomaga foi, e galue i le laueleele na faia mai ai le tagata.

E lē o se tala manaia le tala o lenei aso Sa. A tuli ese mai se tagata mai se galuega, o se aiga, o se nuu, poo se atunuu, o le a leai ni faamanuiaga e maua. E inosia ma fasinoinomia e tagata. E lē toe fia uo ai se tagata, e lē toe fiafia foi i ai ni tagata. Peita'i, a tuliese mai loa se isi o tatou le fanau e matua, ona popole lea, auā o le malaia lona i'uga.

GALUEGA FAATINO: TUSITUSIGA

Tusi mai sau faatoesega, ona o se mea sa e faia, ua mafua ai ona tuliese mai oe mai lau aoga. O le tāua o lenei galuega faatino, ina ia i ai se faamoemoe mo le tagata ua sesē, e lagonaina ai le faatauvaa ma le loto maulalo, e toe fa'afouina ai.

PESE: Faalogo ma Usita'i.

A'OA'OGA:

1. Usita'i e faamanuiaina, a o le lē faalogo e tulieseina.
2. O i tatou o tausi mea a le Atua, tatou faamaoni i ai.
3. Taumamao i tatou mai le tuliese ona o le lē faamaoni.

.....

ASO SA: 25 AOKUSO 2024

MATAUPU: FAATINOINA O MATAFAIOI
(*Taking responsibility*)

SINI: Ia malamalama le vasega e ao ina tatou faamaoni ma alofa i le Atua e ana matafaioi ua tofia tatou e faatinoina.

TUSI FAITAU: Iona 1:1 – 17

FESOASOANI MO FAIAOGA:

O le faatinoina o matafaioi, e aiga tutusa ma le faatinoina o valaauina. A fai o le leoleo, faatino feau faa-leoleo. Po o le foma'i, ia faatino matafaioi faa-foma'i. E tofu le tagata ma ona tofiga ma lona valaauina, o lona uiga, e tofu foi le tagata ma ana matafaioi e faatinoina.

O le tala o lenei aso Sa, o le tala ia Iona, o lē na faatonuina e le Atua mo le feau i Nineva. Peita'i, ua fai le loto o Iona, ma ua ia sola ese ai i Tasesa, ae tuu le feau na poloa'ina ai e le Atua mo Nineva.

O lona uiga, ua lē faatinoina matafaioi a Iona. O ia o le perofeta, o le ave feau a le Atua. O lē e nafa ma le faatinoina o mea e finagalo i ai le Atua. O ana matafaioi, o le faia o tiute ma nafa faa-perofeta, aemaise lava i le fa'ao'oina o le finagalo o le Atua i se mea ua finagalo i ai, faapei ona fia momoli i Nineva.

O le i ai o Iona i luga o le vaa a'o faimalaga mo Tasesa, na tuuina ifo i ai e le Atua le matagi afā, ma soua'ina ai le vasa. O le tuuina ifo o le matagi e le Atua, o le faatinoina lava lea o le tiute o le Atua, o lana faamasinoga tonu ia Iona ina ua lē faalogo ma usita'i.

E lē gata i lea, o se avanoa lelei mo le au vaa, ina se'i a'oa'oina lelei ai, i le mata'utia ma le silisiliese o le Atua o Iona. O faatinoga o le au vaa ma la latou tauvalaau i o latou atua mo se fesoasoani, o le faatinoina lava lea o o latou tiute faa-seila (salor). E lē gata o le faamāmā o le vaa, ae saili foi i o latou lava atua mo se fesoasoani. O le talitonuga foi o le au vaa, ma le faia ai o le vili e saili ai le mafuaaga o le oo ifo o le malaia i le faigamalaga, o le faatinoina lava o matafaioi a le au vaa. E ui i le

fesiligia o le moni ma le faamaoni, ona o le faatinoga o le vili, e faia lava e le tagata, peita'i o faiga masani faa-tagata faigaluega i luga o vaa.

O le faasaga ai foi o le vili ia Iona, o le isi lea avanoa mo Iona, e faatinoina ai ona tiute faa-perofeta, o le faailoa atu lea o le silisiliese o le Atua ia i latou e lē o iloa, faapei o le au vaa. “O a'u o le Eperu. Ou te mata'u i le Alii le Atua o le lagi, o lē na faia le sami ma le eleele mātūtū”. O le matafaioi a le perofeta, o le ta'u atu o le Atua ma lona mata'utia i tagata. O le maka lelei lea mo Iona ma ona matafaioi faatinoina, e ui ua lē usita'i, a ua fai lona loto.

“Matou te aiaoi atu ia te oe, le Alii e, aua ne'i fano i matou ona o le ola o lenei tagata o le a aveesea, aua foi ne'i faae'e i luga ia'i matou le toto o le tagata e lē sala.....” Ta'utinoga a le au vaa ua liliuina le talitonuga mai i io latou atua, i le Atua na tala'ina i ai e Iona.

Mulimuli ane, ua lafo Iona i le sami. Ae lē tuua ai lava le faatinoga o matafaioi a le Atua, o le olafa lavea'i, e faaola i ana auauna ma ona tagata. Ua faaolaina le au vaa, ae sili ai, ua saunia le i'a tele e foloia Iona ina ia faasaoina mai ai lona ola.

Tele matafaioi o lo o faatinoina i totonu o le tala o lenei Aso Sa, e pei ona tau faamaninoina atu. E lē gata ia Iona ma ana matafaioi, o le au vaa ma a latou foi matafaioi, ae sili ai o le Atua ma ana foi matafaioi. Ua a'oa'o mai mo i tatou uma i lenei aso Sa lenei mataupu, ina ia tautuana o tatou matafaioi, e tatau lava ona faamaoni le faatinoina. Auā a lē faatinoina, ona lu'itauina lea o o tatou ola, i le silasila mai o fofoga o lo tatou Alii le Atua. E tiga lava ona leaga le tagata, o lo o faatinoina lava le matafaioi a le Atua, o le faaolaina ma le faasaoina, e le gata o nei, a ua oo lava i le faavavau.

GALUEGA FAATINO: FAATINOGA

E lelei ona faatino le tala, ina ia saga malamalama ai pea le vasega i matafaioi eseese o lo o faatinoina i totonu o le tala.

PESE: 177 (Pese ma Viiga)

A’OA’OGA:

1. Ia tautuanā o tatou valaauina, ina ia faatino ma le faamaoni.
2. E fesoasoani mai pea le Atua i le faatinoga o o tatou faiva.
3. Ia ola usiusita’i ae lē o le sola, e afaina ai le ola.

.....

ASO SA: 01 SETEMA 2024

MATAUPU: O LE TAGATA MAU’OA
(*The wealthy man*)

SINI: Ia malamalama le vasega, o le ola fa’avavau e lē fuaina i so tatou tamao’aiga po’o le poto ma so tatou malosi, a’o le alofa tunoa o le Atua.

TUSI FAITAU: Mareko 10: 17-34

FESOASOANI MO FAIAOGA:

O le tagata mau’oa, o le tagata e tele mea na te maua. E lē ola fa’alagolago i se isi, ae fa’amoemoe lava ia te ia, auā ua ia manatu, o lo o lava ma tele lona tamao’aiga. E manatu fa’amauualuga, ua na o ia lava ma lona poto, ma lona malosi, ma lona tamao’aiga. O le talitonuga ta’atele lea o tagata nei i le vaitau o Iesu, e maua le ola e fa’avavau ona o le lelei o ana taumafaiga fa’aletagata.

O uiga ma manatu fo’i ia na alu ane ma le tagata lea o lo o tā’ua i le tatou tusi faitau iā Iesu, e iloa ai o ia o se tagata mau’oa. Lea e iloa i lana fesili iā Iesu; ‘*Le a’oa’o lelei e, se a se mea ou te faia ina ia ou maua ai le ola fa’avavau?*’ O le manatu mauualuga na fai ai e lenei tagata lea fesili, ina se’i lagolago ane ai e Iesu lona talitonuga lea, o le lelei o ana taumafaiga fa’aletagata na te maua ai le ola e fa’avavau. (1) O ia o se tagata e tausi i tulafono (f.19). O lona talitonuga, ua lava lea na te maua ai le ola e fa’avavau. (2) O ia o se tagata e lelei lona tamao’aiga (21). O lona manatu, tusa lava po o le a le tau e fa’atauina ai le ola e fa’avavau, ua ia te ia le malosi na te fa’atauina ai.

Aepeita’i, e lē o lea le finagalo o Iesu. E 2 lava mea tāua na fetalai atu ai Iesu e tataua ona ia faia. (1) Ia fa’atau atu ana oloa. O mea ia o lo o fa’amauualuga ai lenei tagata. Ua avea ma ona fa’amoemoe, ae ua le fa’amoemoe ai i le Atua. (2) Ia fa’asoa atu i tagata matitiva. E tele mea na te maua, ae lē iloa ona alofa atu. E lē fiafia e fa’asoa ma tufa atu i ē o lo o mana’omia se fesoasoani. Fai mai le tala, e lē i faigofie i le mau’oa ona talia le fetalai a Iesu. Ua ia lagona lona fa’anoanoa, ma ua alu ese ma le tīgā.

E lē ese le manatu o le mau’oa ma le talitonuga o lo o nonofo ma le au so’o. E iloa i le latou fesili ina ua uma ona fetalai atu ai Iesu: ‘*Afai o lea, o ai se tasi e mafai ona fa’aolaina?* (26) O le mafua’aga lea na fetalai atu ai Iesu: ‘*E matuā faigata ona sao atu o e mau’oa i le mālō o le Atua.* (f.23) *E faigofie i le kamela ona ui atu i le pu o le au, ae faigata i le mau’oa ona sao i le mālō o le Atua.* (25)’

O a’oa’oga nei a Iesu, se’i fa’asa’o ai le talitonuga sesē e pei ona taofi ai le tagata mau’oa ma le au so’o. O le ulufale atu i le ola fa’avavau, ma le fa’aolaina o le tagata, e lē o se mea a le tagata, ua na o le Atua ma lona Alofa Tunoa, tatou te maua ai.

O se fe’au tāua fo’i lea mo outou le fanau i lenei taeao, ‘aia nei tatou fa’apei o le tagata mau’oa, e manatu fa’amauualuga i mea ua ia maua, e maua ai lona fa’aolaina. E leai lava so tatou mafai ma se malosi tatou te fa’aolaina ai, ua na o le alofa tunoa lava o

le Atua. E ala lea i lo tatou olaina o lea lava alofa. Ia agalelei ma fa'asoa atu le alofa i isi tagata.

Uiga o Upu:

- i) pu o le au (f.25) - pu o le nila
- ii) tauemu (f.34) - faifai, amusia, inosia.

GALUEGA FA'ATINO: Su'esu'ega i le Tusi Pa'ia.

- Vaevae le vasega i vaega se 3. Tofu le vaega ma le tusi faitau o lo 'o tā'ua i lalo.
- Fa'atusatusa molimau a Fai-Evagelia e uiga i lenei tala.
- O a ni mea e tutusa ma eseese ai molimau?
- O le a fo'i le fa'amamafa a le au Fai-Evagelia e uiga i lea tala?

Vaega 1 - Mareko 10: 17 – 34

Vaega 2 - Mataio 19: 16 – 30

Vaega 3 - Luka 18: 18 – 30

PESE: 165 (Pese ma Viiga)

A'OA'OGA:

1. Ia fa'amoemoe ma fa'alagolago i le Atua, ae lē o le potu ma so tatou malosi.
2. Ia agalelei ma alofa atu i ē o mana'omia se fesoasoani, o lou olaina lava lena o le alofa tunoa o le Atua.
3. 'Aua le manatu fa'amauualuga i mea ua tatou maua.

.....

ASO SA: 08 SETEMA 2024

MATAUPU: O LE MALOSI O LE TALA LELEI
(The gospel imperative)

SINI: Ia malamalama le vasega, o le malosi o le Tala Lelei, e tutupu ai ni suiga lelei i o tatou olaga

TUSI FAITAU: Mareko 12: 28-34

FESOASOANI MO FAIAOGA:

O le malosi o le Tala Lelei, e fa'amalosia ai se uso ua fa'avaivai; e fa'amafanafanaina ai se loto ua mafatia; e toe maua ai le nofo lelei o se mafutaga na fe'ese'esea'i; e līua ai le tagata fa'amauualuga ina ia lagona le loto mauualalo; ia lagona ai fo'i e le tagata lona sesē. O le fa'aalia lava lea o le silisili ese ma le mata'utia o lo tatou Ali'i o Iesu Keriso.

O le malosi fo'i lea o le Tala Lelei na līua ma suia ai le talitonuga na alu ane ma le Tusi'upu. O le tusi'upu, o lē tasi lea ta'ita'i o le lotu Iutaia, e ola i tulafono. E tele ma anoanoa'i tulafono latou te taulotoina i aso uma. Lea la na ia faia ai se fesili e tofotofoina ai Iesu, aemaise ai, o lo o tau sailia pea e ta'ita'i o le lotu Iutaia se mea e molia ai o Ia. *“Po o le fea poloa'iga e sili i poloa'iga uma?”* E lē o fesili lenei Tusi'upu ona o le fia malamalama, ae na fesili se'i sa'ili se mea e ta'usalaina ai Iesu.

Peita'i o le tali a Iesu na tu'uina atu i lea Tusi'upu, o lo o fa'ailoa ai le malosi o le Tala Lelei. *Fetalai Iesu, E sili lenei, fa'alogoa mai ia Isara'elu e; o le Ali'i lo tatou Atua, o le Ali'i e to'atasi ia. Ia e alofa fo'i i le Ali'i lou Atua ma lou loto atoa, ma lou agaga atoa, ma lou manatu atoa, ma lou malosi atoa. O lona lua lenei, Ia e alofa atu i lē lua te tua'oi ia pei o oe lava ia te oe. E leai lava se poloa'iga e sili i na poloa'iga. (f.29-31)* O

le tali lea na matuā fa'amalieina ai le loto o le Tusi'upu, ma suia ai lona manatu na ala ai ona ia fesiligia Iesu, ma ia ta'utino ai: *Mālie a oe le a'oa'o e, o le tonu lea ua e fetalai mai na; auā e to'atasi lava le Atua; e leai lava se tasi ua na o ia. ia alofa fo'i ia te ia ma le loto atoa, ma le manatu atoa, ma le malosi atoa; ma ia alofa i lē la te tuā'oi e pei o ia lava ia te ia.* A'o le malosi lea o le Tala Lelei na fa'ailoa e Iesu i lana tali, na ta'utino ai le Tusi'upu, afai ae fa'atinoina lea alofa, e sili atu lena na i lo taulaga mu ma taulaga uma. E lē gata o le fa'amalieina o le tusi'upu i le tali, ae ua tatala fo'i lona malamalama e uiga i le poloa'iga sili. Ua ia iloa ai, o tulafono uma lava, o le alofa e fa'avae ai. E maua ai le maopopoga o so o se fa'alapotopotoga. O le tau, fetalai Iesu, *E te lē vāvā mamao oe ma le mālō o le Atua (f.34).* O le fa'amanuiaga lea e maua e le tagata e suia i le malosi o le Tala Lelei, ina ua ia taliaina. Tamaiti, o Iesu Keriso o Ia lava o le Tala Lelei, o le ala malosi fo'i lea. O le malosi lena o le Tala Lelei, e suia ma līua ai le tagata, mai le taupulepule e fa'ao'o le leaga fa'apei o le Tusi'upu, i le fa'amalieina ma talia lelei le finagalo o le Ali'i. E mafai e le Tala Lelei ona fa'apotoina oe ma fa'amanuiaina lou olaga pe afai, e te taliaina o ia. E mafai e le malosi o le Tala Lelei, ona suia lou olaga mai le leaga i le lelei. O lona uiga, ua na o Iesu lava e mafai ona ia faia suiga lelei i o tatou olaga. O se suiga fo'i e fa'avavau. Ia tatou fiafia e fa'alogologo i le Tala Lelei ma ana a'oa'oga, auā e mafai e lona malosi ona fa'amanuiaina oe.

GALUEGA FA'ATINO:

Tu'u le avanoa i le vasega, fa'asoa mai ai e le tamaitiiti ia, po 'o a ni mea o lo'o ia molimauina ai le malosi o le Tala Lelei i lona ola tuputupu a'e, pei ona fa'amatalaina i luga i le matā'upu. Fa'ata'ita'iga: o le malosi o le Tala Lelei, na te aumaia le filemu ina ua tatou lē mautonu.

PESE: 370 (Pese ma Vi'iga)

A'OA'OGA:

1. Ua na o Iesu e mafai ona ia faia suiga lelei i o tatou olaga.
2. Tatou talia le Tala Lelei ma ana a'oa'oga, e fafagaina ai lo tatou ola fa'aleagaga.
3. Ia tatou tasi i le poloaiga sili pei ona a'oa'o mai ai Iesu, ona tatou manuia lea.

.....

ASO SA: 15 SETEMA 2024

MATAUPU: ARETO I LE TAIMI VAVE
(Bread in a hurry)

SINI Ia malamalama le vasega, o areto i le taimi vave, e manatua ai le alofa o le Atua i le tagata.

TUSI FAITAU: Esoto 12: 33-39

FESOASOANI MO FAIAOGA:

O le areto i le taimi vave, o le areto e lē fa'afefeteina. O le palugāfalaoa e le i tu'uina ai se fefete (yeast). E aogā mo le vave e mana'omia ai, ma e leai se umi e tapena ai. O se taumafa e maua gofie ma e fa'aaogaina i aso uma, auā fo'i o mea ia e maua i aso uma. O se taumafa fo'i e umi ona aogā auā e lē o tu'uina ia i se fefete. Peita'i sa avea o se tasi o taumafa e taumafa i taimi o le Fa'amanatuina o le Paseka (Festival of Passover) e le nu'u o Isara'elu, e fa'amanatu ai le

fa'asa'olotoina o i latou mai le nofo pologa ai i Aikupito. Le areto lea e ta'ua o le areto e lē fa'afefeteina.

O le tusi faitau la o lenei taeao tamaiti, a'o tagi tu'i Aikupito ona o le fasiotia o ana tama ulumatua uma, fa'atasi ai ma manu, na tonu ai loa iā Aikupito, ua tataua ona fa'anatinati ona tu'uina atu Isara'elu e o, auā o le a uma lava i latou i le oti. E tusa ai ma le tala a le Esoto, e leai lava se fale sa aunoa ma le oti. O le tāpena ese la o Isara'elu mai Aikupito, na tapena fa'atasi ai ma le areto e lē fa'afefeteina, e manatua ai le malaga ua o ese mai le pologa. O le fa'anatinati la ona o ese, lea ua tā'ua ai o le areto i le taimi vave. E faigofie ona gaosi, ma e leai se umi e faia ai.

O na i mafaufauga fa'aleagaga o lo o momoli mai e le tatou matā'upu i lenei taeao:

1. O le areto i le taimi vave, e manatua ai pea e Isara'elu le o ese mai le pologa.
2. O le areto i le taimi vave, o lo o aumai ai se ata o le fa'atuatua o Isara'elu i lo latou Atua, na te saunia ni a latou mea e 'ai a'o i ai i le faigamalaga.
3. O le lē tu'uina o se fefete i le palugāfalaoa na malaga ma latou, o lo latou tu'ueseina lava lea o le olaga tuai ae fai se amataga fou, mai le pologa i le ola sa'oloto. O le ave'eseina o tu ma aga fa'a-Aikupito, fa'atasi ma o latou atua, o le ola agasala ma le lē mama na ola ai.

Vasega Matutua, o se fa'amanatu fo'i lea mo i tatou i lenei taeao, ia tatou lagona le loto fa'afetai i le Atua ona o Iesu Keriso, o Ia o le Areto o le Ola, o Ia o le Areto mai le lagi, o Ia o le Areto i le taimi vave, auā o le fa'amoemoe lea o lona afio mai, ia fa'asa'olotoina i tatou mai le pologa o le agasala. Po 'o a lava foi au taumafaiga ma mea e te maua, lava ma totoe mea na e te manatua ai le alofa o le Atua. Na te tapenaina o tatou lumana'i manuia. Po 'o le fa'ananati, po 'o le olaga e tumu i

lu'itau, tatou fa'atuatua ma talitonu, e lē tu'ulafoa'iina i tatou e le Atua. Fai laia o se amataga fou, ae tu'uese o tatou uiga tuai.

Uiga o Upu:

- i) nanati - fa'avave, fa'atopetope.

GALUEGA FA'ATINO:

- Fa'aaoga se polo mamoe.
- Ia nonofo valavala le vasega.
- Togi lea e lau susuga le polo mamoe po 'o ai lava le tamaitiiti e sapoina, ona tu lea i luga e fa'amatala sana mea aogā na maua mai i le tatou matā'upu.
- A ma'ea ona toe togi mai fo'i lea o le polo mamoe i lau susuga i le faiaoga, ma fa'apēnā ai lava ona fa'aauau.
- O le fa'amoemoe maualuga, ia malamalama le vasega i le matā'upu.

PESE: 238 (Pese ma Vi'iga)

A'OA'OGA:

1. E tapena ma saunia e le Atua o tatou lumana'i manuia, pe afai tatou te fa'atuatua ia te Ia.
2. Tu'uese o tatou olaga tuai, ae fai se isi amataga fou.
3. Ia lagona le loto fa'afetai ia Iesu le Areto o le Ola, ona o le fa'amoemoe o lona afio mai, ia fa'asa'oloto i tatou mai le pologa i le agasala.

.....

ASO SA: 22 SETEMA 2024

MATAUPU: FIAFIA (*Gladness*)

SINI: Ia malamalama le vasega, e na o le Atua lava e malie ai o tatou loto.

TUSI FAITAU: Salamo 104: 14-30

FESOASOANI MO FAIAOGA:

O le fiafia, o se fa'alagoga e tupu a'e i le loto pe a o'o ina fa'amalieina. A o le fa'amalieina lea o le loto, e fa'aosofia ai le agaga i le fia vivi'i i le Atua. Auā o lo tatou talitonuga fa'aletagata fa'atutua, ua na o le Atua lava e malie ai o tatou mana'o i mea lelei uma.

O le fa'amalieina fo'i lea o le loto o le fai-Salamo na ia lagona ai le fiafia, na afua ai ona ia lagiina le Salamo lenei e 104. Lea tatou te iloa i ana upu tomua ma ana upu fa'aiu: *"Lo'u agaga e, ia e fa'amanū atu i le Ali'i..."* A o le fesili, AISEA? Ona ua fa'aalia i lana lalolagi matagofie ma fai, le mamana ma le silisili ese o le Atua. Ua gagana mai mea o le foafoaga ma molimauina lona mamalu ma lona malosi.

O le taofiga o nisi o le au atamamai o le Feagaiga Tuai, o le Salamo 104, o lē isi lea faitauga o le Kenese 1 e uiga i le tala o le Foafoaga pa'ia a le Atua i le amataga, lea e lauiloa ai le fuaitau lea: *'ua silasila atu le Atua, ua lelei...'*

Lea fo'i la o lo o atagia i le tusi faitau o le tatou matā'upu i lenei taeao. A fai se aotelega o le faitauga o lenei taeao, ona fa'apea lea: o le pule aoao, o le silisili ese ma le mana o le Atua, e mai lava i le lau'ele'ele, se ia o'o i lea e nofo ai le Leviatana. O lo o tā'ua le Leviatana (f.16) o le fa'ailoga o le loloto e lē o'o i ai se tagata ola, ae o'o ai le pule a le Atua. O lona uiga, e leai lava se mea a le tagata e faia i le foafoaga, o lo o tausia lava e le Atua ma fa'atumauina le lelei mea uma.

A leitioa lagona le fiafia o le fai-Salamo, auā o le Atua na te tausia mea uma. Lea o lo o ia molimauina, e fa'atupu e le Atua le mutia e aai ai manu vaefa, na te fa'aola mea toto mo tagata,

pei o le vine, e gaosi ai le uaina e fa'afiafiaina ai loto o tagata; e o'o lava i manu felelei ma manu tata'a o le vao, na te saunia mea latou te nonofo ai; o laau fo'i e lē galuea'ina e se tagata, fa'apei o arasi o Lepanona, na te fa'atupu lauolaola; ma isi lava mau mea e tele e pei ona tolaulauina e le fai-Salamo. Foliga mai i le manatu o le fai-Salamo, e leai lava se mea e le i tapena lelei e le Atua. E tofua lava fo'i mea o le foafoaga ma lona aogā. O le afuaga lea o le fiafia o le fai-Salamo, ma vivi'i ai i le Atua, auā o le Atua lava na ia faia mea uma.

O lea fo'i se fe'au tāua mo i tatou le fanau i lenei taeao. E leai lava se isi na te fa'amalieina o tatou loto i mea tatou te manana'o ai. Ua na o le Atua lava. O le fiafia lena e fa'avavau. Auā a fa'afiafiaina i tatou e isi tagata, o le mea moni lava, e i ai le taimi e muta ai. E le tau sa'ili se mea fa'afiafiaina ai i tatou, o lea lava e molimau mai le natura o mea. A o le tatou tali lea tamaiti, ia tatou vivi'i ma fa'amanūina lo tatou Atua.

GALUEGA FA'ATINO: Fefaasoaiga

Ia fa'asoa le vasega po o a ni mea e iloa ai le silisili ese ma le mata'utia o le Atua, ma fa'atupuina ai lo tatou fiafia.

PESE: 324 (Pese ma Vi'iga)

A'OA'OGA:

1. E leai se mea e lē mafaia e le Atua.
2. O le malosi o le tagata e muta, a'o le Atua e o'o i tuluiga e fia o le lalolagi.
3. Ia tatou fiafia e vivi'i i le Atua, ona ua fa'amalieina o tatou loto i lana tausiga alofa.

.....

ASO SA: 29 SETEMA 2024.

MATAUPU: O AI LO’U TUAOI ?
(Who is my neighbor?)

SINI: Ia malamalama le vasega i le t̄aua o le alofa ma faasoatu i tagata o loo fia maua se fesoasoani.

TUSI FAITAU: Luka 10:33-37.

FESOASOANI MO FAIAOGA:

Tala i le Samaria sa faitauina, o le ata lea o le Atua e faatasi pea ma le tagata. E ui e i ai tapulaa ua uma ona faataoto, peitai e talitonu o ia i le alofa. Aua o le "alofa" e poupu ai tuaoi ua uma ona faataoto, ae faatino le galuega tausi, e tusa pe l̄e aiga ma l̄e masani foi. Silasila foi i le tagata ae faatonutonu e le alofa lana t̄of̄a, ua iloa e le Samaria le tagata o taatia i le auala, "ona mutimutivale lea o lona alofa." Le tagata ese na alu Malaga ae f̄asia i le ala. O le ositaulaga ma le s̄a-Lev̄i, o tagata ia na tuuina i ai e Mose faatonuga i le amataga ma lo latou nafa faaauau i le falefetafa’i e tausi ma faasoatu. A o lea ua fetalai Iesu i lana faataoto, o i laua nei na matilatila le ui ese. Ua avea lava le tulafono o lo o tapasaina ai le olaga faaositaulaga ma le tulaga faasa Levi ma ala ua le mafai ai lava ona faavagavaga sina taimi e faatino ai le alofa.

O se lagona e loloto i totonu o totoga le mea e afua mai ai. Ua alu atu, ma "fusifusi ona manu’a," ua "liligi i ai le suauu" ma "faatietie i lana lava manu," ma "taitai i le faletalimalo," ma "tausia ia te ia." E oo lava foi i lana ato tupe, ua "to ae tenari" ma totogi ai le fale talimalo. O faatinoga ia o le alofa e leai se tuaoi. Lona uiga, o le tausi, e faasolosolo ma faaauau e isi ma isi. E l̄e gata i se tagata se toatasi. Le fanau e, ua uma ona taoto le alafua ua faasino mai e le Alii Faaola. O galuega lelei e leai ni tuaoi. O

le finagalo o le Atua mo tatou le fanau, e tutusa tagata uma i lau vaai. Aua na o lou tuaoi e te fiafia ai, a ia faapena foi ma le o ita mai ia te oe. O le galuega e te faia atu, e faapena foi ona toe fai mai. A o le sili o na mea uma, ia viia ai le Atua.

GALUEGA FAATINO: Fesili ma Tali

1. O le a se tali a le ositaulaga ma le sa Levi i le tagata o taua i le tala?
Tali: Ui mamao ese/l̄e alolofa/tutuli taliga
2. O le a se galuega lelei na faia e le Samaria?
Tali: Laveai/fusifusi/alofa mutimutivale
3. E faapei ona tatou faia ni galuega, lelei mo isi?
Tali: Fesoasoani/Alofa/Faasoatu
4. Na e faia se galuega alofa faapea i se isi tagata, pei ona faatino e le Samaria? Faamatala mai le mea na tupu.

PESE: Pese 380 (Pese ma Viiga)

A’OA’OGA:

1. Ia maua le loto fesoasoani.
2. Ia faatino galuega lelei.
3. O ai lo’u tuaoi?

.....

ASO SA: 6 OKETOPA 2024

MATAUPU: O SE AMATAGA O LE ALOFA LOLOTO. (A passionate start)

SINI: Ia malamalama le vasega, i le loloto o le alofa e fefaasoa'i.

TUSI FAITAU: Pese a Solomona 1:1-8.

FESOASOANI MO FAIAOGA:

O le Pese a Solomona, ua iloa lautele o tusitusiga a le potu. O loo fa'aalia ai le alofa moni o le fatu pese i le Atua. Ua faauigaina o le pese silisili. O upu o le pese, o lo o aumai ai lagona o le alofa moni i le e sili i ai lona alofa. O upu aualofa. O alofa molipo o lo o faananau atu i le manamea ua mafanafana se faigauo ua uma ona osi feagaiga. Le gagana lea a le Isaraelu ua toe aumai e le Pese a Solomona i se ata faatusa, i le talanoaga a le tamaitai ma le tama.

O le naunau o le tupu i le tamaitai na galue i lana tovine ma ua uliuli lona pa'u i le la, e mafai ona amata ai iina se faatusa o le alofa loloto o le Atua i le tagata. O le faamaoni ma le auauna lelei i tiute ua aumai e fai, o le moni lea o le alofa o le e ana le galuega. O upu e faamatalaina ai le alofa o lo o fia momoo i ai le Isaraelu e fia maua. O le alofa ua tuu matāmaga mea uma aua o le alofa ua feuluulua'i. O le alofa ua susua ma puaina lona manogi. Le Isaraelu ua faaiipoipo ma le Atua e ala i le feagaiga ua osia, ma ua avea o se mafutaga e tumau. O le mafuaaga lea o le aumai o le ata faatusa o le moomoo o le tamaitai i le mafutaga ma lona alii. E faapena i tatou, o le auauna faamalosi ma tautua ona o le Atua, o le amataga lava lena o le loloto o le alofa i le Atua, ma avea ai le tagata ma uo e mafuta ma le Atua i le ola e faavavau. O le naunau o Solomona i lana uo, e faapena le naunau o le Atua i ai tatou, ina ia mafuta mai pea.

GALUEGA FAATINO: Faasoa le vasega.

Tusi mai sau solo e faatatau i le "ALOFA LOLOTO"

PESE: Pese 83 (Pese ma Viiga)

A'OA'OGA:

1. Ia moni lou alofa i le Atua e pei ona alofa mai ia i tatou.
2. Aua le femoumoua'i le alofa, a ia tumau.

.....

ASO SA: 20 OKETOPA 2024.

MATAUPU: MAMANUINA E LE ATUA.
(*Shaped by God*)

SINI: Ia a'oa'o le vasega ia malamalama, o le Atua o le pule aoao i mea uma lava.

TUSI FAITAU: Iopu 10:8-12

FESOASOANI MO FAIAOGA:

E lē taitai ona lava upu tatou te faamatala ai le Atua ma lana foafoaga. O le gasologa foi o le olaga ma le siosiomaga o lo o ola ai tagata, e le taitai tutusa ma le tamaoaiga ma le atamai o le Atua na faatulaga ai mea uma na Ia faia. Fai mai le mau faafeagaiga tuai, a agasala le tagata ma lē usitai i le Atua, ona feagai lea ma faigata. A'o Iopu o le tagata amio sa'o ma faamaoni i luma o le Atua. O se tagata faatuatua ma usitai i le Atua. Lona uiga e oo foi tagata usitai i le Atua, e feagai foi ma faigata ma puapuaga o le olaga. Iopu usitai i le Atua a ua faamativaina, ua aveesea le oa sa ia te ia ona o tofotofoga. O le tualaga a le tagata o lo o ia silafia le afuaga o mea uma. E ui ua lagona le leo ona o tigā ae sa piimau pea le faatuatua i le Atua. Ua tautino le faamaoni o Iopu i le la mafutaga ma le Atua. O le Atua ua faaliliuina lona tamaoaiga sa iai i le mativa, lona tino

aulelei i lona tino maimaia ma le matagā. O le ofoofogia ma le ma'oa'e o le Atua, lea ua iloa nei e Iopu ma tautino ai, "Ua ou iloa e te mafaia mea uma, e lē mafai foi ona vaoia se mea e te finagalo i ai, o ai ea lenei ua na faapouliuligia lau pule ma le lē iloa? Ua molimau Iopu, o ia ua na o se tagata faatauvaa, o ia foi, ua na o se vaega o mea o le foafoaga na fausia ma mamanuina e le Atua. Mamanu faapefea? Ia onosai, usitai ma faalogo i le musumusuga a le Atua e manuia ai.

GALUEGA FAATINO: Fetufaa'i le vasega i le fesili lea.

"O a ni mea ua faamamanuina ai e le Atua o tatou tagata kerisiano?

Faaitaiga: Onosai

PESE: 259 (Pese ma Viiga)

A'OA'OGA:

E leai se mea e faigata i le Atua.
E ofoofogia mea e faia e le Atua.
Na faia e le Atua mea uma.

.....

ASO SA: 27 OKETOPA 2024

MATAUPU: **GUTU: E FAASOAINA AI LE UPU A LE ATUA.** (*Mouth: for sharing God's word*)

SINI: Ia malamalama le vasega, i le tāua o le faalogo ma faasoa atu le Tala Lelei i isi tagata.

TUSI FAITAU: Esekielu 3:1 – 4

FESOASOANI MO FAIAOGA:

O tama a manu e fafaga i fuga o laau, a o tama a tagata, e fafaga i upu ma tala. O upu ma tala e tulei mai fofoga o le Atua e faatalalelei ai tagata uma. O upu o le ola ma le Tala Lelei i a Iesu Keriso e puaina mai fanau i le lumanai auā a matutua, e lē toe te'a ese ai. Tasi lea meaalofa tāua i le tagata, o le fofoga po o le gutu e pei ona taua i le faitauga o lenei aso. O le gutu e faasoa ma faailoa mai ai le mea o'i le loto o le tagata. O le faaaliga na vaaia e Esekielu o le tusi taai o lo o i le aao o le Atua, ua na tuu ifo i lona gutu. O nisi o vaaiga ma fa'aaliga, e faatatau lava ia Isaraelu ma ona tagata-nuu; o nisi foi e faatatau i atunuu eseese ma malo o lo o fai Isaraelu ma o latou fili. A'o nisi foi faaaliga, e fitoitonu lava ia Esekielu ma ona tiute e tatau ona fai e faasoa ma talai atu ai le finagalo o le Atua i tagata. Le finagalo lea o le Atua mo lana fanau uma i le lalolagi, ia alofa le tagata ia te Ia ma alofa i lona uso. Ia fai ma mea fiafia le tausisi ma faasoa i afioga paia a le Atua, e mafaufau i ai ma teu mau i le loto upu e manuia ai. A o se feau taua o aumai e le Atua e ma'oa ma malilie ai tagata uma i le ola faaleagaga, e lē na'o meaai e ola ai le tagata, a'o afioga uma e tulei mai le fofoga o le Atua.

Valaau alofa lea mo tagata uma, auā latou te le o iloa le matuia o la latou agasala o faia. A o le feau ua valaauina ai Esekielu, e alu e a'oa'i ma faatonu, ma faapoto ai foi i le amiotonu tagata, ina ia atoatoa ona lelei ma tautatala ai i le upu a le Atua. Tamaiti o le gutu e faagaganaina ai e le Atua le fanau ina ia tautatala ma le fa'aaloalo e le gata o mātua, ae faapea foi isi tagata. O le gutu e feaasoa'i ai tamaiti uma i le Tala Lelei iā Iesu.

GALUEGA FAATINO: Fesili ma Tali

1. O le a le ta'u o lo o fa'a'upuina ai le galuega a Esekielu?

Tali: Tagata va'ai

2. O le a le galuega a le Atua na faia ia Esekielu e ave mo tagata?

Tali: *Ina 'ai ia lena tusi taai, i le e alu ma fai atu i le aiga o Isaraelu.*

3. O le a le fa'amoemoe o le Atua mo ona tagata uma?

Tali: Ia ola tagata uma, ma iloa o Ia i so o se taimi.

PESE: 157 (Pese ma Viiga)

A'OA'OGA:

1. E le na'o meaa e ola ai le tagata, a o afioga uma e tulei mai le fofoga o le Atua.

2. Faitau le Tusi Paia.

3. Gutu: e pese ma vivii ai i le Atua.

.....

ASO SA: 03 NOVEMA 2024

MATAUPU: **O LE A LE MEA E TA'U O LE ATUA ESE?** (*What is a false god?*)

SINI: Ia malamalama le vasega, ua na o le toatasi le Atua moni, auā e soifua e faavavau ma fesootai ia i tatou. O isi faatusa ma amioga ua fiafia i ai nisi, o atua ese ia auā e lē maua ai se ola.

TUSI FAITAU: Teuteronome 4:6 – 20

FESOASOANI MO FAIAOGA:

O le faafaigofieina o le faauigaina o le “atua ese,” o se atua e ese mai i lo tatou Atua (ua tatou talitonu ma faatuatua i ai) ua tapua'i ai se tagata. O le upu moni, e tele lava atua o lo o talitonu ma fa'atuatua ai tagata e lē o ni Kerisiano. Fa'ata'ita'iga, tagata Initia, e tele lava atua ese'ese o lo o tapua'i ai tagata Initia e pe a ma le 33 miliona o a latou atua o lo o latou tapua'i ai. Sa fa'apena fo'i Samoa a o le'i taunu'u mai le Tala Lelei. E tofu lava le itumalo, po o le nu'u, po o le aiga fo'i ma o latou atua e tapua'i ai. 'A e ina ua taunu'u mai le misionare ma le Tala Lelei, ua tatou talitonu ma fa'atuatua, ma fa'avae ai lo tatou olaga i le Atua Tolutasi Paia, o le Atua le Tamā, le Alo, ma le Agaga Paia. Lea ua tatou 'ae'ae ai nei i ona fa'amanuiaga e tele, ma e tatau lava ona lē fa'agaloina.

Na fai tulafono ina ia maua ai e tagata le soifua maloloina, amiotonu ma le ola naunau i le Atua; ina ia iloa ai foi le auala e tuliloa ma foia ai le agasala. O le tulafono, o le fa'asinoga manino lea i le natura ma le ala o le Atua, ua ia finagalo tatou te savavali ai. E leai se tulafono na fa'avae e le Atua e aunoa ma sona fa'amoemoe taua. Peitai ua tatou iloa o le tele o tulafono mai le Feagaiga Tuai, sa patino lava i le soifuaga ma le aganuu o tagata o Isaraelu i na ona po. E ui la e le ono mea nisi o tulafono i lo tatou lava taimi, ae e tumau pea ala fa'aAtua na fa'avaeina ai (*principle*), ma o fa'avae la lea e aoga lava mo i tatou.

Mo se fa'ataitaiga, o aso nei ua le toe fa'aaoga ni manu fasi e osi ai taulaga i le Atua, a o talitonuga sa fa'avae ai osigataulaga – o le fa'amagalo o agasala ma le momoli o le fa'afetai i le Atua – o mea ia o lo'o tumau ma talafeagai pea mo tatou. O le osiga taulaga lea sa fai e Isaraelu i ia ona po, o le taimuaga lea o le taulaga sili na saunia e Iesu Keriso mo tatou. O le mau o le Feagaiga Fou, sa fa'ataunuu tulafono uma o le Feagaiga Tuai e ala i le maliu ma le Toetu o Iesu. O le a le uiga o lea mea? O le fa'amoemoe o tulafono o le Feagaiga Tuai ina ia iloa ai e le tagata lona sesē, ma fai ai le fa'atatau. Peitai na o Iesu Keriso

lava sa atoatoa lona usitai i le tulafono, sa ia tausia tulafono taitasi uma; ua avea foi ia ma faataitaiga sili. O Iesu na iloa ai e tagata le agaga moni o le tulafono; na o Iesu foi sa mafai ona aveesea o tatou agasala e fa'avavau.

O le fa'amamafa lava la a le tusitala, ia aua nei galo ia Isaraelu galuega mamana uma a le Atua. O le mea lea na ia fautuaina ai matua e fa'amatala i a latou fanau vavega a le Atua na fai. E le gata o se auala lea e faigofie ai foi i matua ona manatua le fa'amaoni o le Atua, a ia mafai ai foi ona fa'asolo le tala i le Atua mai lea tupulaga i lea tupulaga. E faigofie ona galo ia tatou mea lelei ua faia e le Atua mo tatou. Ae e mafai ona tatou taofimau, pe a tatou fa'alologolo i o tatou matua, fa'apea i Faifeau ma tagata matutua, galuega mamana uma a le Atua ua tatou molimauina i o tatou olaga.

O le ifo i tupua, e tusa lea ma le lagolago i amioga ma fa'avae i tua atu o tupua (ft. o le fasioti tagata, o amio fa'atalitane, sauaga matuia i taimi o taua, o le manatu fa'apito). A tatou fa'aeaea pe fa'aviivii i malosi'aga ma agavaa o tagata (po o manu foi), afai foi tatou te fa'aviivii i malosi fa'alenua, e aunoa ma le fa'a'ailoa o le suafa mamalu o le Atua o Le na foafoaina nei mea uma, o le ifo lava lea i tupua. Ua matua malamalama Isaraelu i le Atua, sa latou molimauina fa'afia i le fa'atasi o le Atua i soo se tafa o lo latou tala fa'asolopito. Sa leai la se alofaga mo Isaraelu, leai se fa'amatalaga talafeagai latou te faia e ono tonu ai lo latou tuua o le Atua, ae fa'amoemoe i nisi tagata po o nisi malosiaga. Ua na o le Atua moni e toatasi e ao ona tatou ifo ma tapuai ai.

O le fa'amanatu lea mo i tatou le fanau. O le fa'atusatusa o le ifo i atua ese po o tupua, o lo tatou fulitua lava lea i le olaga fa'aKerisiano. O le tatou sola 'ese ma tu ma aga ua tatou iloa, e tataua ona tatou savalia ma ola ai. Manino i le tusi faitau, e silisili ese lava le Atua i atua uma o le lalolagi. E tataua lava ona fa'amuamua o Ia o lē ona le mana ma le malosi uma lava.

O le fa'atusatusa o atua ese i nei ona po, o se mea e mafua ona vāvāmamao ai lou tagata ma le Atua. O lona uiga, afai ua tatou

saili i le tamaoiga e aunoa ma le avea o le fa'amuamua i le Atua, e maua fua lava e leai ma sona uiga. Afai foi tatou te saili manuia ae lē saili muamua i le Atua, e pei o le 'ai i le matagi ma e fa'atauva'a lava mea e maua. O le uiga lea o le fa'amalosi'au a Mose ia Isaraelu, ia 'aua ne'i fa'atuatua' i le Atua ae fa'amuamua isi mea i lou olaga. O a lava ni mea e faia, o mea uma foi tatou te faia, ia fai mo le Atua ma sona viiga. Ia fa'amuamua le Atua i mea uma, auā o ia lava o le afuaga o mea lelei uma.

GALUEGA FAATINO: Talanoa

O a ni mea ua avea ma atua ese i lou olaga? Pe fa'apefea foi ona toe foi i le Atua? *Ia avea ma ta'iala le fesili lea e fai ai se talanoaga ma le fanau. Ia fesoasoani atu foi faiaoga i ni auala foi e mafai ona toe fa'aleleia atili ai le soifua fa'alefaatuatua a le fanau.*

PESE: O oe le tupu moni (Pese ma Viiga: 259)

A'OA'OGA:

1. O le Atua Tolutasi Paia, o le Atua tutasi lava lea mo i tatou ua tatou talitonu ma fa'atuatua i ai.
2. E leai lava se mea i le lalolagi nei e mafai ona fa'atusatusaina ma le mana silisili 'ese a le Atua.
3. O le alofa ma le fa'amaoni o le Atua e na te fa'atoilaloina faigata ma fa'afitauli uma e feagai ma le tagata.

.....

ASO SA: 10 NOVEMA 2024

MATAUPU: O LE ALA E MANATUA AI E LE ATUA (*How God Remembers*)

SINI: Ia malamalama le vasega, o le alofa mai o le Atua ma isi fesoaosni ua Ia faia mo i tatou, e ao ai lava ona tatou manatua o Ia ma le faafetai i viiga.

TUSI FAITAU: Salamo 103:1 – 14

FESOASOANI MO FAIAOGA:

O le tatou mataupu i lenei taeao, e foliga mai, o lo o fa'atatau i uiga ma le natura o le Atua. Auā fo'i, e le mafai ona fa'atusatusaina le mafaufau a le tagata e manatua ai mea e tutupu, ma le silafaga paia a le Alii e na te manatua ai ma iloa mea uma o tutupu i le lalolagi. E lē pei o le mafaufau o le tagata, e i ai taimi e lē atoatoa ma e ona fa'agalogalo. A o le silafaga paia a le Atua e atoatoa, o lo o i ai le amiotonu ma le alofa mutimutivale, e lē mafai ona galoina se mea e tasi. Peita'i, a fa'apea mai se tusi a le Tusi Paia, "ua manatua e le Atua." E lē fa'apea ua galo e le Atua. 'Ae o le silafaga paia a le Atua, ua ia fa'amaoni ma toe alofa ai i ona tagata. E pei ona aumai e le Salamo ua avea ma tusi faitau.

Ua vivi'i le faiSalamo ona o mea lelei na fai e le Atua mo ia. E faigofie lava ona tatou muimui ona o fa'alētonu o le olaga, ae o lo o manatua e le faiSalamo le anoano o mea e ao ai ona tatou fa'afetai ai i le Atua: na te fa'amagaloina o tatou agasala, na te fa'amaloloina o tatou ma'i, na te fa'aolaina tatou mai le oti, na te fa'apaleina tatou i le alofa ma le alofa mutimutivale, na te fa'amalieina o tatou mana'oga, na te aumaia le amio sa'o ma le amio tonu. A o ala uma ia o lo o manatua ai i tatou e le Atua. Ua tatou maua nei mea uma, e ui i lo tatou lē agava'a 'ae ua Ia alofa

mai pea ia i tatou. Po o le a lava le faigata o folauga o lenei olaga, ua uma ona saunia e le Atua fa'amanuiaga mo tatou – o fa'amanuiaga mai aso ua tuana'i, o fa'amanuiaga o le asō, o fa'amanuiaga o le a maua i aso o i luma. A tatou lagona i isi taimi e leai se mea e ala ai ona tatou fa'afetai i le Atua, ua tatou lē manatua lava le alofa tunoa a le Atua e lē tu'ulafoa'iina i tatou.

Lea o lo o fa'amatalaina i le fuaiupu e 13 ma le 14, o tatou o tagata ma'aleale ma le lē tumau, a o le alofa ma le tausiga o le Atua e o'o i le fa'avavau. E tele ina tatou va'ai tasi i le Atua o se fa'amasino po o se fai tulafono, ae seasea tatou manatu i lona alofa taunapa mai. A iloilo e le Atua o tatou ola, na te iloilo ma lona silafia o tatou ua na o ni tagata lē atoatoa. Aua ne'i fa'aaoga lo tatou tulaga fa'aletagata (vaivai ma le lē atoatoa) tatou te taumafai ai e ta'uamiotonu ni o tatou agasala e fai. Ia tatou manatua ma mautinoa foi, e alofa mutimutivale le Atua i le auala na te su'esu'eina ai ma feagai ai ma le tagata. O le uiga foi lea o le "ua silafia lava e ia," auā o le uiga foi o le silafia, o le manatua. O lona uiga, e manatua uma e le Atua o a tatou mea e fai i le lalolagi ma le olaga nei.

O se fa'amanatu foi lea mo i tatou le fanau, ina ia manatua pea ma mafaufau pea i le Atua i taimi uma. Auā na te manatua lava i tatou i taimi uma. E lē fa'agaloina ma tu'ulafoa'iina i tatou e le Atua. O a lava ni faigata ma fa'afitauli o lo o feagai ma i tatou, o lo o fa'atasi mai pea le Alii ma i tatou. O lo tatou fa'agaloina o le Atua ma Lona alofa ma Lona agalelei, o le tu'uvalelimaina lava lea o lo tatou ola valaauina. O le mafai foi lea ona tatou fa'avaivai ma toilalo i mea ma uiga fa'alelalolagi. O le fa'amalosi'au a le faiSalamo, ina ia tatou manatua pea mea lelei uma a le Atua ua Ia faia mo i tatou. Aemaise foi o Lona pule aoao ma Lona malosi silisili'ese. O a ni o tatou fa'aletonu, ia manatua, 'ae 'aua ne'i toe faia. Ia avea ma a'oa'oga auā le alualu i luma o lo tatou savaliga fa'alefa'atuatua. O a foi fa'amanuiaga ua tatou maua, ia manatua, ia lagona le vivi'i ma

le fa'afetai e fa'afoi i le Atua, o Ia o le pogai o mea lelei uma ma le puna o lo tatou ola.

GALUEGA FAATINO: Tusitusiga: Ia manatua le alofa o le Atua

Ia tusi ma fa'amatalaina e tamaiti se vaega o latou olaga na feagai ma faigata ma fa'afitauli. A mae'a, ona fai i ai i tamaiti, e toe tusi le mea ua latou tusia ma taumafai e manatua ma fa'auiga ni mea na tutupu e foliga vaaia ai le alofa ma le fa'atasi ai o le Atua ma i latou. O lona uiga, e toe tepa i tua i le tala sa o latou tusia, ma taumafai e mafaufau loloto i ni vaega o le tala ma mea na tutupu ua latou manatu, na i ai le Atua ma i latou.

PESE: E le alofa o Iesu (Pese ma Viiga: 73)

A'OA'OGA:

1. E lē tu'ulafoa'ia i tatou e le Atua.
2. O a ni tatou sesē ma fa'alētonu, ia tatou lagona le salamo moni. A ia avea foi ma ala e toe fa'asa'osa'o ma toe faufau ai lo tatou olaga fa'alefa'atuatua.
3. Ia o tatou manatua le Atua i mea uma, ma taimi uma o lo tatou ola.
4. 'Aua ne'i fa'agaloina le alofa o le Atua, na ala mai i le maliu ma le toetu manumalo a lo tatou Alii Faaola o Iesu.

.....

ASO SA: 17 NOVEMA 2024

MATAUPU: MATAI FOAFOA (*Master Creator*)

SINI: Ia malamalama le vasega, ua na o le toatasi lava le na foafoaina le lagi ma le lalolagi ma mea uma ua i ai. O Ia o lo tatou Atua Soifua.

TUSI FAITAU: Kenese 1:1 – 8

FESOASOANI MO FAIAOGA:

O lo o fefinaua'ia pea lea mataupu e o'o mai i le asō. Fai mai nisi sa tu'ufa'atasia le lalolagi i le mae'a ai o se *explosion* po o se pa tele (*Big Bang Theory*). O nisi ua taofi sa amata e le Atua le foafoaga, ona tuputupu pea lea o le lalolagi mai lena taimi e oo mai i lenei taimi. O le mea moni lava, a tatou vaavaai i tapuaiga ese'ese mai aso anamua, e tofu lava le tapuaiga ma lona fa'amatalaga, e uiga i le foafoaina o le lalolagi. E tai tofu uma foi tagata saienisi ma o latou lava mau fa'apitoa, e uiga i le mataupu. Na o le Tusi Paia lava o lo o ta'ua ai le Atua Silisili ese e toatasi, o le Matai Foafoa lava lea. Na Ia foafoaina le lalolagi ona o lona alofa i tagata, ma lona finagalo ina ia i ai se nofoaga fa'apitoa latou te nonofō ai. Atonu e o'o mai lava le oti tatou te le maua se tali mae'ae'a i le tele o fesili ma mea lilo e uiga i le foafoaina o le lalolagi. A ua fai mai le Tusi Paia, *sa faia e le Atua le lalolagi*. Ua lava lea tatou te iloa ai, e taua ma aloaia le tagata i totonu o le lalolagi.

O lo o a'oa'o mai le tala o le Foafoaga e uiga i le Atua. O lea ua tatou malamalama: 1) O le Atua e foafoa ma fa'atupu mea; 2) E le gata sa ia faia mea uma, ae e tulaga ese lava Ia mai mea sa Ia foafoaina; 3) O Ia e tumau e fa'avavau, e pule toatasi foi i le lalolagi.

O le mea lava lea e ese ai le tala lenei, auā foi, a vaai lelei lava i le molimau a le tusitala, o lo o manino lava le fa'amatalaga o le ituaiga lalolagi sa i ai, o se lalolagi matagā ma le leaga, sa pogisā ma gaogao, sa ufitia i le sami ma le suāvai. Ae o le fetalaiga a le Atua lea na ala ai ona mavaevae, o le mea lava i

lona tulaga. O i foi la, na matuā aliali mai ai le silisili ese o le Atua, lea na ona fetalai lava, ona i ai lea.

O le tali atu la a le natura ae maise o le lalolagi matagofie ma mea uma na faia, o le galulue fa'atasi lea e fa'atino o latou tofi ma tiute e pei ona fa'atonuina mai. Ua tu'u matamaga e le Atua mea uma i lona lava nofoaga. O le malamalama mai le pouliuli, o le ao ma le po, o le vanimonimo ma le lagi, o le sami ma le eleele matutu, o le vao mu'a ma laau afu fa'apea laau fua, o le mea ma lona aoga.

E tele ma anoanoai itu e tāua ai le foafoaga a le Atua, e fa'ailoa ai lona matautia atoa ai ma le mamana o ana fuafuaga. E fa'ailoa ai lana pule e aoao, ae le gata i lea, ae e fa'ailoa ai foi, lona fa'atuatuaina lea o le tagata e fai ma ana tausii mea, e vaai fa'alelei ma fa'apelepele i ana galuega. Auā foi, o ana galuega uma, na fa'atino lava i le mea e gata ai le lelei, o mea uma foi lava, na faia lava i le mataisau o le Atua. O lona uiga la, e tatau foi ona fa'apena ona fai e le tagata. Auā o a tatou galuega uma lava, e toe silasila lava i ai le Atua, pe ua lelei pe leai foi. E lē mafai lava ona tuuina mai e le Atua se mea fa'aletonu po o se mea ua lē lelei i le lalolagi, auā o lona lava finagalo, ia ola fiafia ma sa'oloto le fu'a taualuga o ana fuafuaga mamana, o le tagata lea, ae le gata i lea, a ua fa'amanuia mai foi o Ia i mea uma na faia.

O se fa'amanatu foi lea mo i tatou le fanau. O le a sou tali i le fetalai mai o le Matai Foafoa? Tali atu i le fetalai mai o lo tatou Alii, tali i se mea ua finagalo lo tatou Atua ia te oe ina ia fa'ataunuina. Fai se tali lelei mo se feau ua valaauina ai i tatou uma e le Matai Foafoa ina ia momoli auā se manuia o nisi tagata ma ni agaga leiloloa. Fa'amautu se tali o lo tatou ola valaauina mo Ia ma lana Ekalesia i totonu o tatou aiga, se nuu, se atunuu, ae maise e o lo o manaomia le fesoasoani. Ae o se tali ia lelei atoatoa ma ua lava saunia mo le galuega alu i luma a le Atua. Silasila toto'a ma taga'i ane i ai po o ua lelei ma matagofie e pei ona tuuina mai ai lana foafoaga i o outou aao ma o tatou lima.

O le fetalai mai o le Atua na ia aumai ai i le atoatoa o lana foafoaga i le mea ua aupito sili ona lelei ma ua lava saunia, o le mea na tuuina uma i ai lona tamaoiaiga, o mafaufauga ma le atamai i agavaa e tele. Ae maise ai o le ofo'ofogia ma le maoa'e na ia fa'avaeina ai le lalolagi matagofie. O fetalaiiga mamana ma le silisili ese a lo tatou Alii lea na tu'u matamaga ai mea uma o le foafoaga. O fetalaiiga a le Atua, o le fetalaiiga e usita'ia ma fa'alologo i ai so o se tagata, o fetalaiiga e maua ai le malosi lilo ma le fa'aola totoga auā le agai i luma. Fetalaiiga e tuu sa'o auā se manuia o tagata lautele. O lea lava foi fetalaiiga na usitaia e lona Alo pele e toatasi, na maluu ai i luga o le satauro, na tanumia, ae na toe soifua manumalo mai le oti ma le tuugamau, o le tali lava lea o lana fa'aolataga mo le lalolagi. Le lalolagi na ia foaiina mai i lona tulaga lelei, lea foi na ia saunia ai le taulaga ina ia fa'atumauiina ai lea lelei. O le mea foi lea e alagata ai ona tatou tali atu ma le atoatoa i lona fetalai mai.

GALUEGA FAATINO: Trivia / Taliga Fesili

Ua fau ni fesili e sefulu e uiga i le tusi faitau ma ia tali e tamaiti. Fa'ata'ita'iga:

1. O ai le Matai Foafoa na faia le lagi ma le lalolagi e pei ona aumai e le tusi faitau?
2. O a ni fa'amatalaga e uiga i le lalolagi a o le'i faia le galuega a le Atua?
3. O le a le mea muamua na foafoa e le Atua?
4. O le a le igoa na fa'aigoa ai e le Atua ia mea?
5. O a ni mea na tutupu i le aso lua?
6. O le a le mea na fegaoioiai i le fogātai?
7. Pe na galue e le lima o le Atua le foafoaga, pe na o na fetalai mai ona i ai lea?
8. E fia aso na faia e le Atua le foafoaga?
9. Ina ua mae'a le galuega a le Atua, o le a lana mea na fai?
10. O le a le mea mulimuli na foafoaina e le Atua?

PESE: O le Atua e tele / My God is so big

A’OA’OGA:

1. Ia ‘aua ne’i tu’uvalelimaina le foafoaga a le Atua, ae ia tausia lelei.
2. O le Atua o le Matai Foafoa, na Ia faia le lagi ma le lalolagi ma mea uma o lo o tumu ai.
3. Na foafoaina e le Atua mea uma, o le lagi ma le lalolagi, ona o lona alofa tunoa ma lona alofa mutimutivale.

.....

ASO SA: 24 NOVEMA 2024

MATAUPU: O SE MEA OFOFOGIA MO SARA
(*A surprise for Sarah*)

SINI: Ia malamalama le vasega, e mafaia e le Atua ona faatupu mea fou e ofoofogia i le ola o le tagata faatuatua ia te Ia.

TUSI FAITAU: Kenese 18: 9 – 15; 21:1 – 8

FESOASOANI MO FAIAOGA:

O se tala malamalama i le toeaina o Aperaaamo ma le ‘ataata ai o Sara, ina ua ia faalogo atu, ua valoia mai e le agelu, o le a fanau mai se tama tane mai ia te ia. O lo o fai lava ana tapanega mo se falaoa mo ana malo i totonu o le fale. Ae taia loa i ona taliga, le tala fou lenei ua faalogo atu i ai. Ona ‘ataata ai lea ma le fiafia tele, faapea lava ia, e le o iloa mai e se tasi. Ae te’i i le faalogo atu, o lo o fetalai le Alii ia Aperaaamo, pe aisea na ‘ata’ata ai? E le o iloa pe fia tonu tausaga o Sara, ae o Aperaaamo ua 100 tausaga lona matua. O lona uiga, e mafai ona faapea ua 90 pe 95

tausaga ua oo i ai le matua o le loomatua. Ua matutua Aperaaamo ma Sara, ua mavae le tu o fafine ia Sara, ua le toe i ai se avanoa, e maua ai se laua pepe, ina ia taunuu ai le feagaiga ma folafolaga a le Atua mo Aperaaamo.

O le autu lea o lenei aso, i le ofoofogia ai o galuega mamana e faia e le Atua, mo le tagata e tumau ma faatuatua ia te Ia. E toatolu agelu ua faaape e Aperaaamo, ona amata ai lea o le talanoaga. Ua folafola ai e le agelu, le fanau mai ai o se tama tane, i le taimi lava lenei, i le tausaga o lumana’i. O le ala lea o le ‘ata’ata ai o Sara, auā ua ia iloa lelei, ua siliga le taimi na te toe sapaapaia ai se pepe.

O se fesili faatupu manatu, ae pe aisea na ‘ata’ata lemu ai Sara? Ai o le ala tonu lea na faa-uiga ai le igoa o Isaako, le tama o le folafolaga, o le ‘ata’ata. Auā, e fai o le ‘ata’ata o Sara i le taimi tonu na ia faalogoina ai lea tala fou, a’o le ‘ata’ata ai foi o tagata Isaraelu, o le a faalogo ma molimauina lenei mea ofoofogia ua faatupu e le Atua ia Sara ma Aperaaamo. Lea lava ua faataunuuina e le Atua le la feagaiga na osia ma Aperaaamo, na Ia suia ai lona igoa, ma avea ai o se tamā, e fai ma tupuaga o se nuu tele i le lumana’i. Na sui ai foi ma le igoa o Sarai ia Sara

O se tasi lenei o mea ofoofogia i le talaaga mai o Aperaaamo, i le amataga o le faavaeina ai o le nuu lenei o Isaraelu, le nuu filifilia o le Atua. O le fanau mai foi o Isaako, na mafua ai foi ona tulia ese ai Akara ma lana tama o Isamaeli. Atonu, o le finagalo lava lea o le Atua, ina ia mafai ona tuufaasolo mai lona finagalo paia mo tagata uma o le lalolagi.

O le autu foi lea mo lenei aso, e mafaia e le Atua, ona faatupu se mea fou, e le oo i ai le iloa o le tagata soifua. E faigata i le tamaitai ona toe maua sa na tama i le ituaiga matua lea ua oo i ai Sara, ae e leai se mea e faigata i le Atua. Ioe, na valoia e le agelu, ae na iu lava ina, taunuu, ma atili ai lava le latalata o le mafutaga a Aperaaamo ma lona Atua i lea taimi.

O se feau taua foi lea mo i tatou uma i lenei taeao, e mafaia e le Atua ona faia o so o se mea tatou te manana’o i ai. Pe a tatou talitonu ma faatuatua i lona Suafa mamalu. Ta’u i le Atua mea o

lo o tatou manana’o ai e ala i le tatalo. Faitau le Tusi Paia ma tatalo i aso uma, e i ai lava le taimi e tali mai ai le Atua ia te oe.

GALUEGA FAATINO:

Fesili:

1. O le a le uiga o le igoa Sara?
2. O ai lona igoa muamua sa i ai?
3. O fea le nuu o Sara?
4. E te talitonu e faia e le Atua se mea fou i lou olaga?

PESE: Le alofa o le Atua e ofoofogia

A’OA’OGA:

1. Ia talitonu ma faatuatua i le Atua
2. E silafia e le Atua mea uma tatou te mananao ai
3. E faamaoni le alofa o le Atua

.....

ASO SA: **01 TESEMA 2024**

MATAUPU: **SAUNILE ALA O LE ALII**
(Prepare the way of the Lord)

SINI: Ia malamalama le vasega, o ala o le Alii, e tatau ona tapena faa le Agaga i ai tagata uma. E maua ai le filemu ma manuia ai le tagata e talitonu ma faatuatua ia te Ia.

TUSI FAITAU: Isaia 40: 1 – 5

FESOASOANI MO FAIAOGA:

Ia tapena ma sauni le siosiomaga o le tagata taitoatasi, ina ia faigofie ona ulufale i ai se feau o le a aumai. O le valaau faamalosi lea a Isaia i tagata Isaraelu, ia faamafanafana ma faamatala loto ia Ierusalema, ina ua toe foi le tafeaga mai Papelonia. Ia toe liuliu le tofā, ona e le mafai ona tuulafoaia i latou e le Atua.

“Ina teuteu ia e outou le ala o le Alii; ia outou faalauleleia le ala tele i le vao lafulafua mo lo tatou Atua”. O a faigata ma lu’itau o loo feagai ai ma le tagata i le soifuaga nei, o lo o sisila mai lava fofoga o le Atua, o Ia lava na te fesoasoani mai.

O le autu lea o lenei aso, o le ata o le Atua o le a oo mai, e tatau ai ona faalaulelei ma sauni tagata uma. Ia teuteu, tapenapena ma faatalitali lou tagata atoa, i le Atua ua oo mai i le lalolagi, e ala ia Iesu Keriso. O le masina mulimuli o lenei tausaga, ua sauni mo le faamanatuina o le Kerisimasi, o le Emanuelu, o le Atua ua ia te i tatou.

Ia tapena lou va i fafo, aemaise o lou lava loto, ina ia e talia ma ofo atu ai sau meaalofa mo le afio mai o le pepe o le Kerisimasi. O le tapenaina ma teuteuina o le fale i moli emoemo, o meaalofa, laau kerisimasi felanulanua’i. O tapenaga uma ia e fai e tagata, ae ia sili ai ona tapena le agaga, ina ia o faatasi le faamanatuina i le tino, ae sili ai le itu faa le agaga.

O le autu lea o lenei aso, aemaise o lenei masina atoa, ia tatou vaavaai ma faatalitali, saunia le ala o le Alii, ina ia oo mai lea aso, ae o lo o sauni tatou uma. Ae a le tagata e le o tapena, e leiloa po o le a le tali o le a fai atu i le Atua. Ia fa’aavanoa o tatou loto, ina ia i ai se avanoa mo le Alii, e maua ai le fiafia, ma le filemu moni o tatou uma. E afio mai le Alii i le ala ua tatou saunia, pe afai tatou te tapena mea uma mo lona afio mai ma le loto faatuatua, ua tatou i ai faatasi ma Ia.

GALUEGA FAATINO: Fetufaa’iga

Faitau manino i le Tusi faitau, ma fetufaa’i ma le fanau po o a ala o le Alii e tatau ona tatu sauna i ai.

PESE: Faalagolago i aao o le Alii po o se Pese Kerisimasi

A’OA’OGA:

- 1. Ia tatou nofo tapenapena i taimi uma
- 2. O ala o le Alii, e filemu ai o tatou tagata
- 3. Faaavanoa lou loto mo le Alii

.....

ASO SA: 08 TESEMA 2024

MATAUPU: O IA LAVA O LE FILEMU
(He shall be the one of peace)

SINI: Ia malamalama le vasega, ua na o le Atua lava e maua ai le filemu moni o le tagata

TUSI FAITAU: Mika 5: 2 – 5

FESOASOANI MO FAIAOGA:

O le vaega 2 lea o le faatalitali i le toe afio mai, i se tala ma i Perofeta o le Feagaiga Tuai, o lo o vaavaai ma vavalo mea o le a tutupu i aso o i luma.

O se molimau leni a le perofeta o Mika, o lo o faamalosi ai i le nuu o Isaraelu, o le a fanau mai i Peteleema-Efarata le Mesia, e faaola ia Isaraelu. O le vaitau lea i le vaivai ma le maualalo o le

ola faale agaga o le nuu, lea ua valoia ai e le perofeta o Mika le Mesia, ina ia toe fafagu ma faamalosi ai tagata, i le ala e manuia ai o lo latou ola

E tele tala faamaumauina i le salalau ma taunuu ai le Tala Lelei a Iesu Keriso i nisi o atunuu o le lalolagi i tausaga ua mavae. Ae o Samoa lava ia, na valoia ai e Nafanua, “Ia tali i lagi se ao o lou malo”. O le tausaga 1830 na taunuu ai, ma suluia ai laufanua o Samoa i le Tala Lelei a Iesu Keriso na aumai e Ioane Viliamu ma lana au malaga.

E pei e tau faapena le ata o lo o vavalo ai Mika ia Isaraelu, o le a fanau mai i Peteleema le tama e fai ma Faipule e faaola ia Isaraelu. O le Alii o le filemu. O le Emanuelu, ua ia te i tatou le Atua. O le vaitau tonu o Mika, o lo o fai ai Asuria ma fili o Isaraelu.

O le taulogologo a le perofeta o Mika, ia ola amiotonu, alofa ma ola i ala o le Alii, e sili atu nai lo taulaga. Ae oo mai i le Mataupu 5, ua valoia le fanau mai o le Alii o le Filemu. Ioe, o se tasi leni o valoaga i le Feagaiga Tuai, pe a ma le 700 tausaga lumanai, ae fanau mai i Peteleema le tama o Iesu, o le Faaola mo le lalolagi atoa.

O le autu lea mo tatou i leni aso, le tama lea na valoia e Mika, na fanau mai lava i Peteleema, o lo o tatou faamanatuina e ala i le Pepe o le Kerisimasi; o Ia lava o le Alii o le filemu. Ua na o Iesu lava e filemu ai o tatou agaga. Sa fanau o Ia i PeteleemaO le uiga o Peteleema, o le fale o falaoa, a o le afio mai o Iesu- o Ia lava o le areto o le ola.

Ua na o le pau lea o le auala ua fa’aali tino mai ai le oo mai o le malo o le Atua i le lalolagi. O le tali foi lea o faafitauli e tutupu i totonu o so o se malo. Ia faamoemoe ma talia e tagata uma, ina ia manuia ma lelei taumafaiga uma e faatino. O le Liona o Iuta, o le Upu o le potu. O le Leoleo mamoe lelei, e malu mamoe uma ia te Ia.

O le tapenaga lea mo le faamanatuina o le oo mai o le Alii o le Filemu i leni masina ua tu vae i ai le tatou faigamalaga taufaaiuiu o leni tausaga.

GALUEGA FAATINO: Taliga Fesili

o suiga e mafai ona a'oa'o ai, ma suiga e manuia ma fiafia ai.

Tali mai i fesili nei:

1. O a ni faamatalaga faatatau ia Peteleema o ta'ua i le fuaiupu e 2?

Tali: (itiiti i le afe o Iuta, tupu mai ai le faipule ia Isaraelu)

2. E faapefea ona leoleo e Iesu ona tagata?

Tali: (leoleo i le mana o le Alii ma lona mamalu)

3. O le a le uiga o le igoa Peteleema?

Tali: (fale o falaoa or meaai (house of bread))

PESE: Se Pese o le Kerisimasi

A'OA'OGA:

1. Na o Iesu lava e filemu ai lo tatou ola

2. Tatalo i le Alii pe a ua leai se filemu i lou aiga/nuu ma le atunuu.

3. Ia talitonu ma faatuatua i le Atua

.....

ASO SA: 15 TESEMA 2024

MATAUPU: UA SOSOFA E LE ATUA AGA MASANI (*God invades the ordinary*)

SINI: Ia malamalama le vasega, po o lea tonu lava le uiga o aga masani ua sosofa, po o ua suia e le Atua. Ma ia malamalama ai le vasega, o le Atua a le afuaga o suiga uma,

TUSI FAITAU: Luka 1: 5 – 17

FESOASOANI MO FAIAOGA:

A faamatala faafaigofie le uiga o aga masani, o lona uiga, o lo o talanoa i mea ua masani ai le ola, ma o lo o soifua ai lava i aso uma. O le mea moni, e i ai a tu ma aga masani e faaosofia ai pea le fiafia e faatino, ma a o'o ina tutupu suiga, ona liua foi lea i le faanoanoa, ae e i ai foi aga masani o tiga ma faigata o le ola, ae a oo ina suia, ona avea a lea ma ala e maua mai ai le fiafia, olioli, ma le manuia.

E foliga faapea le ata lea o lo o talanoa ai Luka

O le tala lenei sa faitauina, o lo o manino mai ai lava, o le vaitau ao avea Herota ma tupu o Isaraelu, sa i ai se tasi o faitaulaga e igoa ia Sakaria. O lana ava o Elisapeta o le sa Aronā. Ae fai mai le tala e ese le amiotonu o lenei ulugalii i luma o le Atua. O lona uiga a faamatala faafaigofie lenei ulugalii, o i laua o tagata o le Atua. E tausi i poloaiga ma tulafono uma, ma ua le mata'uleagaina ai i laua i luma o le Atua. E leai foi se la fanau aua e pa le loomatua. O lona uiga e le fanau si loomatua.

Peitai, e i ai tu ma aga masani ia o lo o taua i le tala o lo o faia ma nafa tausi a lenei toeaina po o lenei foi ulugalii. O Sakaria o le tagata o le malumalu, na te faia le faiva o faitaulaga, e ulu ia te ia le malumalu i vaega tonu e mu ai taulaga manogi. A oo la ina mu taulaga nei, ona tatalo lea o le motu o tagata o e o lo o i ai faatasi i le malumalu e faailoa ai lo latou agaga faafetai ae i le Atua, faatasi ai ma o latou manaoga.

Peitai na faateia Sakaria i le oo mai o le agelu a le Alii, ma ua fefe ai si toeaina, e le o le fefe ua fefeale, ae o le mata'u a le tagata faatuatua, lagonaina lona faatauva. Lea o lo o faapea mai

ai le Agelu, “Sakaria e, aua e te mata’u; auā ua faafofogaina lau tatalo; e fanau lau avā o Elisapeta sou atalii, e te faaigoa ia te ia o Ioane.” O i tonu foi o loo taoto ai le uiga o le igoa o Sakaria, (God remembers) aua ua faafofoga o Ia i le tatalo a lenei ulugalii,

O i tonu la lea ua sosofa ai e le Atua aga ua masani ai lenei ulugalii i aso uma, i la la’ua tatalo i le ao ma le po. E le gata o le tino, o le mafaufau, ae silisili ai lava le agaga. “E ia te oe le fiafia ma le olioli; e toatele foi e fiafia i lona fanau mai” e le gata ina i ai le fiafia mai le faanoanoa i o la loto ona o le leai o se tama mo i laua, ae o le fiafia ma le olioli tele foi lea mo tagata uma. O lona uiga, o le ata lea o le oo mai o se e faaola i le nuu, ma lona aiga uma.

A fua i ai i upu o lo o faamatala ai e le tusitala le fanau mai o Ioane, o le ata lava lea o le oo mai o le Atua e sosofa mea uma ua masani ai le soaiete. E le gata mo lona aiga, ae o lagona, tu ma aga ua masani ai tagata. Lea o lo o faapea mai ai, e sili o ia i luma o le Alii, e le inu uaina po o le ‘ava, e tumu o ia i le Agaga Paia. Na te faaliliu i le soifuaga pologa ma le saisaitia o le Israelu mai faigata o le ola, ae tepa taulai i le Atua.

GALUEGA FAATINO:

Faamatala sau oe lava tala i le soifuaga o lo o e ola ai nei, po’o a ni mea, a’o ni tu ma aga sa e masani ai lava, ua suia i lenei taimi, ae pe aisea foi ua sui ai, ao ai foi na mafua ai ona sui. O le faamoemoe o lea galuega faatino, ina ia iloa ai e le faiaoga, o lo o malamalama le vasega i le uiga o le mataupu i lenei asosa.

PESE: 175 po o se Pese o le Kerisimasi

A’OA’OGA:

1. O le Atua a le afuaga o mea lelei uma
2. Lagona le taua o suiga lelei i le soifua ma le ola

3. Aua le popole i tiga ma faigata, o lo o soifua le Atua

.....

ASO SA: 22 TESEMA 2024

MATAUPU: O A’U LENEI (Here I am)

SINI: Ia malamalama le vasega, e tatau i le tagata ona tali atu i le valaau ma tofiga mai le Atua, ae lē o le faia o o latou loto

TUSI FAITAU: Luka 1: 26 – 38

FESOASOANI MO FAIAOGA:

O le manatu autu o le Aso Sa lenei, o lo o taoto i le tulaga o le tali atu a le tagata. Faataitaiga o se faatonuga, po o se valaau fo’i. O le tali lava lea, o a’u lenei. Ma e foliga faapena le ata o loo aumai i le tala sa faitauina i lenei taeao. I le tali atu a Maria i le oo mai o le feau mai le Atua e ala mai i le agelu.

O le tala ua masani ai la tatou faalogo, o le tala i le oo mai o le agelu mai le lagi se i faailoa ia Maria le taupou o le aiga o Tavita, ua alofaina o ia e le Atua, o le a to, ma fanauina le tama tane, ia faaigoa ia Iesu.

O le vaega lea o le tala o lo o taoto ai se vaaiga uiga ese, pe a fua i ai i le tala, o lea ua iloa atu ataata o tauleleia, ina ua matala faitotoa o le lagi, ae ua agai mai le agelu se i faailoa le sootaga o le lagi ma le lalolagi e ala i le fanau mai o Iesu.

E ui lava la i le atuatuva, ma le faatauvaa o lagona o Maria, ae peitai, e lei avea lea ma ala na le talia ai e Maria le savali a le agelu o le Atua. E ui foi ina le mautonu manatu ma lagona o lenei tinā i le faate’ia i le oo mai o lea valaau uiga ese lona taua, ae sa tali a e pei ona i ai le manatu autu o lenei Aso Sa. “*Ua fai*

atu Maria, Faauta, o a'u nei o le auauna a le Alii; ia faia ia te au e tusa ma lau fetalaiga."

A lea ua manino le tali a le tagata ua ia te ia le ola talitonu ma le faatuatua i le Atua. Po o a manatunatuga sa tutupu i le oo mai o le valaau a le Atua e ala i le agelu. Ae sa faia lava, e pei ona i ai le tali a Maria, o a'u nei, ia faia ia te au e tusa ma lau fetalaiga.

O le feau taua foi lea mo le tatou vasega i lenei taeao, o lo o faamanatu mai le tali a Maria i le finagalo ma le valaau a le Atua, o le tali foi lona tatou te tali ai i so o se valaauina o le soifua ma le ola, i le feau ma le galuega. Aua lava na'ou matua, ae ia faia mo so o se tagata. Ia manatua, o le "**a'u**" a Maria o le a'u lelei, aua ua i ai atoa lona loto e talia le faamoemoe o le Atua ua ia te ia. O le fanau o Iesu, o se fesootaiga e toe soso'o ai le lagi ma le lalolagi i agasala i ona maliu ma lona Toetu.

GALUEGA FAATINO:

Toe faamatala mai e oe i au oe lava upu, le taua o le tali a Maria e pei ona i ai le mataupu i lenei Aso Sa, ma aumai ma se faataitaiga faigofie e fesootai ma le soifuaga nei, ina ia manino ai ma malamalama, ua e malamalama i le tatou mataupu.

PESE: Pese o le Kerisimasi

A'OA'OGA:

1. A sau loa le valaau, talia ma faia loa
2. O valaauina uma, e mai le Atua ia
3. Faia meauma i le talitonu, faatuatua ma le loto faafetai i le Atua
4. Aua nei faia o tatou loto, ae tu'u le finagalo o le Atua.

.....

ASO SA:

29 TESEMA 2024

MATAUPU:

FAAMANUIAGA MO ANA
(Anna's blessing)

SINI:

Ia malamalama le vasega. O faamanuiaga na maua e Ana i lona ola tatalo ma le anapogi i le Atua i aso uma, ma le aumau ai i le malumalu, i le ola mafuta i le Atua, o faamanuiaga o le folafola atu o le finagalo le Atua, ma le avea ai ma perofeta fafine o le Tala Lelei, o faamanuiaga ia mai le Agaga o le Atua. O lona uiga, o faamanuiaga mo Ana, o faamanuiaga o le Agaga Paia.

TUSI FAITAU:

Luka 2: 36 – 40

FESOASOANI MO FAIAOGA:

Pe a tusa ai ma sailiga i le Tusi Paia, o Ana o le ulua'i perofeta fafine lea o lo o taua i le feagaiga fou. O ia o le afafine Fanuelu mai i le ituaiga o sa Asera, se tasi o ituaiga mai ituaiga e 12 o Isaraelu. O le uiga o le igoa Asera i le Tusi Paia, (happy one) o le *fiafia*. E i ai le manatu o le mafuaaga foi lea e faapea ai lagona ma manatu o lenei tinā.

A fua i ai i le matua o lona soifua, ua leai se tane e faalagolago i ai lona ola, ma ua 84 foi tausaga o lona soifua. Ae fai mai le tala, e lei alu ese ia i le malumalu, a ua auauna o ia i le Atua i anapogi ma talosaga i le ao ma le po.

A fua la i ai i le tala, o vaega ia o lo o atagia ai faamanuiaga mo Ana, e le o faamanuiaga faa-le-tagata, ma faa-le-tino, ae o faamanuiaga a le agaga. A lea e manino i le fuaiupu 36 i le fuaiupu e 38, a vailiili lelei le anofale o ia fuaiupu ma lona

lalagaina, o i tonu o lo o taoto ai mamanu tai tasi o faamanuiaga mo Ana.

Muamua, ua leai se toalua, tuua na o ia, ae ua le alu ese ma le malumalu. O le ata o faamanuiaga o le tagata ua ola le agaga o le Atua i lona loto ma lona mafaufau. O faamanuiaga o le ola fia mafuta pea ma le Atua i taimi uma.

Lua, ua auauna i le anapogi, ma le tatalo i aso uma ma po uma. Tasi lea faamanuiaga a le agaga mo Ana. O le ola mafuta ma le Atua i le anapogi, ma le tatalo i aso uma e le aunoa.

Ma le faamanuiaga mulimuli, ua ia maua le loto faafetai i le Alii, ona ia faia ai lea o le faiva faa perofeta, ua talanoa atu, ma faailoa i tagata uma o lo o faatali mo le oo mai o le togiola mo Ierusalema. A o lea ua toai i fanua, o le tama o le folafolaga, o Iesu lea.

Ese le oa o faamanuiaga na maua e lenei perofeta fafine mai le mafuta ma le ola talitonu ma le faatuatua i le Atua. Ae o meaalofa uma ia a le agaga ua faaosofia ai moealuaga i le tinā e faasusulu ai lana lamepa e ala i le perofeta ane, ma tautala ane i tagata.

GALUEGA FAATINO:

Tusi mai sau tala e uiga i faamanuiaga a le Atua i lou soifua, mo ou matua, o lou aiga, o totonu o lou nuu, aemaise a i lou ola faa-le-agaga i totonu o le aoga Aso Sa, ma le Ekalesia.

PESE: Pese Kerisimasi

A'OA'OGA:

1. Tele faamanuiaga a le tagata ola faamaoni
2. Toaga e tatalo ma anapogi
3. O faamanuiaga uma, e mai le Atua ia
4. E le o faamanuiaga faa-le-tino, a o le agaga.

.....

Manuia le Kerisimasi ma le Tausaga Fou